

午夢堂集



# 午夢堂全集

明·葉天寥纂輯



第一輯  
第四十九種

據原刊本排印  
貝葉山房張氏藏版

中國文學珍本叢書  
第一輯第四十九種

中華民國廿五年十月初版


# 午夢堂全集 (三册)

普及本實價七角  
特印本實價九角

纂輯者  
校點者  
主編者  
發行人  
總經售

葉天  
洪葭  
施蟄  
貝葉山  
張靜廬  
上海雜誌公司

上海總店：四馬路三二二四號  
廣州支店：永漢北路二二九號  
南京支店：太平路二四八號  
雲南支店：土主廟街四七號  
成都支店：華興街  
漢口支店：湖北路中



初版本1—2000本

# 午夢堂全集下 目次

## 伊人思

小引

詩・詞・賦・序(共四十四家)

唐宋遺事

## 百旻草

序

賦(二首)

詩(二首)

序(一首)

詩(七首)

## 百旻草附

祭文(九章)

兩邑申文

目

次

## 秦齋恐

詩(二百二十二首)

詞(三則)

附劉仲甫讀午夢堂集感賦

## 杞雁哀

題辭

小引

詩

葉世佺(哭母五言古十六首)

葉世裕(哭母雜體十二章)

葉世侗(哭母四言體十五章)

葉世儋(四言一章五言絕句十首)

葉小紉(哭母一章)

葉世佺(哭亡弟聲期十二首)

一

葉世俗〔哭亡兄整期十首〕

葉世侗〔全右〕

葉世儻〔全右〕

葉小統〔哭整期第八首〕

葉世任〔挽從弟整期一首〕

葉世位〔全右一章〕

葉世儉〔全右四首〕

### 彤奩續此上

題辭

小引

名媛挽什

詩〔十一家〕

詞〔一家〕

遊仙曲〔十二章附贈詩一章〕

### 彤奩續此下

詩〔三十二題〕

賦〔二首〕

祭文〔六章〕

誄〔二章〕

### 靈護集

序

賦〔二首〕

詩〔九題〕

哭母擬離騷體十二章〔葬祀雁哀〕

序〔二首〕

記〔三首〕

表〔二首〕

碑銘〔二首〕

誄〔二首〕

### 靈護集附

挽什

詩〔十八題〕

祭文〔十則〕

### 瓊花鏡

### 跋語

# 伊人思小引

詩曰：兼葭蒼蒼，白露爲霜。所謂伊人，在水一方。又曰：相彼鳥矣，求其友聲。矧伊人矣，不友生。故知北斗橫參，停雲伫籟，芳草因之，寄想幽桂，可以相思。山水將歸，共陶風月，琴樽有侶，不負煙霞。領契游深，迴懷神遠，允班荆於綺帶，詎投分於羅裙。然嚶鳴猶切，求聲疇，婉孌無容，同好歟。奚必蓉桂箱劍，榴黛梳釵，碧篋調笙，紅裙按舞，燕膏曼翠之旨，梭躡流黃之機，適稱婦女事哉。內人沈宛君，遐情慨獨，曠性慵孤，閑詠陌桑，效題團扇，所憾典型雖邇，軌躅載遙。特於近代名媛，簞摘一二，採其佳句，作我清音。彩映錦囊，香翻綺袖，明妃胡塞，還留杜若之洲。帝子湘波，卽是靈均之友，郵花十里，盡啼春樹之鶯。暮羽重簾，半入秋燈之夢。蓋澗綃鏡，賦嘯隱鍼床，非裘線旗亭，金傾紙價者也。君今往矣，卷固存焉，零落殘篇，荒涼敝篋，寂寥誰賞，僅餘秘枕之書。嗚咽奚堪，遂似鄰家之笛，傳傷心於綠字，俾出人間，供雅玩於青閨，爰登木簡。

崇禎丙子，罔余之望，天寥葉紹哀題。

# 伊人思

吳江 沈宜修宛君 輯

世選名媛詩文多矣。大都習於沿古。未廣羅今。太史公傳管晏云。其書世多有之。是以不論。論其軼事。余竊傲斯意。既登瑣瑛者。弗更採擷。中郎帳祕。適稱美譚。然或有已行世矣。而日月湮焉。山川阻之。又可歎也。若夫片玉流聞。并及他書。散見俱爲彙集。無敢棄云。容俟博蒐。庶期燦備爾。

原有刻集得十八人

朱盛藻（字瓊蕤。黃州人。楚宗女。）

## 灌春逸尚序

盛藻託體禮華。敦懷稚布。偃蹇擇對。遲暮成歸。徵傅玄之好逑。媿杜禕之淑德。弋鳧既叶。挽鹿可追。蟻聚之視爲輕。牛衣之泣爲鄙。一聞緒論。決志幽棲。夫耕妻鋤。我負子戴。忘憂乎灌。

園之役。敬恭乎春廡之間。似可以嗤鶴唳於華亭。廣鳳歌於楚澤矣。乃介琴書之潤。竊比几杖之銘。褒讚古來借遜之備。用激今家狃榮之俗。慨論筭帷弱質。允首苦樂絲人。咏絮擅才。恨伊人於天壤。迴紋補過。咸倫匹乎江湖。下此賢行險情。奚取慧心妍狀。大都怨生於窮。禦好隙於豐家。纏綿贈謝女之詩。富貴啜珠妻之泣。百爾莫爽。千載同揆。而猶或羞杜面而莫來。懟蘇機而不下。及乎勢移情變。援寡禮衰。然後屏篋筓而求養。甘淪蹟而誓鞠。不亦惑乎。又況乎強赴功名之會。棄妻子而不顧。既履盛滿之機。多傾覆而靡遺。假令霍顯發收兒之夢。強練呈作婢之讖。雖欲撫蓬歷之難。課環趨之步。其道無繇也。然則區區所向。不獨向之提甕質春者。道然可以同韻。即使當世副珈曳翟之子。亦必釐然當心。憾其聞之晚矣。他如傲妻毗女。國是攸謬。徐淑鮑暉。人文足述。恐遠春秋。謀及婦人之誠。兼愆詩雅。無非無儀之旨。即許姆之明哲。曹家之型訓。總不如葦巾賁趾。偶景併好之爲得也。故一不著於篇。

## 方孟式（桐城方御史女張夫人）

## 維儀妹清芬閣集序

皇甫玄晏隻語千金名。公鉅卿事也。我輩嗜睨。深聞終日。行不離咫尺。何足當弁簡之贊。



雖然吾姊弟間子墨倡和可得。而更僕數也。憶吾姊弟稚穉時。從家侍御。遊天雄。及燕侍雪而咏。輒津津霽林下風。歲月流易。分飛中落。備極斷腸之歎。余幸託副筭。車塵女弟桃。則已哀清。臺而號柏汎矣。生涯辛苦。賴有文史。問難字。差足慰藉。乃吾女弟玉節冰壺。加慧益敏。而不炫其才。居恆仰天曰。女子無儀。吾何儀哉。離憂怨痛之詞。草成多焚棄之。偶一繪施金相。競炙莊嚴。卽沈閣弗錄。鄙爲末技。窺其學不減女博士祭酒。下上古今。聲聲成章。偶示扇頭。衛楷永真。咸捧如寶。常諱之爲餘藝。嗟乎。阿妹墮體黜聰之意。固已遠矣。余抱病適志。小有積什。附遊豫章。閩粵山水奇勝。復納交名媛。印可以娛。影殘願當吾身。而令懷瑾握瑜。啖茶嚼藥之。碩人不顯於名媛。方幅載。半百窮愁。空悲腐草。發洪鐘而撞雷鼓。何忍須臾忘之。於是載其近編。用覘寤寐。其有名公鉅卿流擢彤管者。當必擇琳瑯之一枝。存湘閩之斑淚云爾。

方維儀（孟式妹十七適姚十八守節）

共姜

憶昔城門前。車馬相追旋。何當一時盡。哀哀呼蒼天。至今柏舟曲。使人心默然。獨居衛宮北。明月那可得。秋樹蔽其陰。寒階嗚促織。

寒月憶妹茂松閣

惆悵南窗下，霜風寄苦思。  
雁聲落芸閣，言晤在何時。  
階空深夜寂，月色冷梅枝。  
白雪對人殘，孤燈搖薄帷。  
猶憶清秋日，黃花共咏詩。

曉庭

東城溪曲水，遠岫蕩烟霞。  
曉笛引愁淚，秋風吹落花。  
白雲當戶牖，碧沼暗叢葭。  
寂寞憐雙燕，徘徊顧我家。

蛩聲

靜夜與秋寂，桂枝綠影疏。  
虛窗促風怨，小月上樓孤。  
獨對清燈案，閒看古傳書。  
煩階問蟲語，切切故何如。

空庭

涼氣初開八九月，滿階梧葉落紛紛。  
一簾疏影含秋怨，孤鶴清音切夜聞。  
歲月淹留花自老，霜風吹縷雁成紋。  
中庭寂靜無殊玩，坐對青松拂白雲。

暮春與吳姊話別

楊子江邊蒲柳華，征帆白日向天涯。  
且將杯酒邀明月，莫待春風吹落花。  
別後重關多礙

氣料應三載未還家。斯須聊復酬今夕。車馬門前動曉霞。

古意

曉來望天氣。山深飛鳥還。空餘一片石。相對白雲間。

春夕

花落春無色。簫前柳絮飛。何來一歸雁。夜半到柴扉。

夜琴

春移楊柳拂清絃。去雁新聲起暮天。惟恐風吹深夜月。薔薇枝上怨年年。

同二美人文莊溪望

前村新柳拂烟雲。一望南天野水分。日落芳洲春色遠。滿溪桃李不如君。

獨坐

獨坐空階清露涼。夜深有影落衣裳。砧聲何處頻催月。照見愁人欲斷腸。

花影

碧牕明月露清光。花影深陰夜未央。休歎故園春色老。忽然臺畔下秋霜。

至東郊望何夫人居

殘光斜落照芙蓉，顧影徘徊問路蹤。遙望孤村垂柳處，君家門對白雲峰。

田玉燕（字雙飛，錢塘人，田子藝女）

攜二女如瑜如瑾遊半山

啼鳥喚朝暾，鼓棹凌晨露。病骨強登山，名山昔所慕。村村乏桑麻，夾路櫻桃樹。遊女何紛紛，崎嶇少安步。香烟起殿中，半空結雲霧。

寄嬌飛妹

柳色正依依，桃花傍水飛。臨粧記曉夢，憶爾換春衣。鶯語年仍巧，人生故已非。遙看原上草，幾度轉斜暉。

和洪掌珍風花雪月（掌珍未知何人，閩媛屬，或亦女子邪）

春山爲捲白雲飛，繞樹花飄香點衣。蘋未搖青度珠箔，柳邊分翠透羅圍。枝枝笑口麗名園，不是成蹊自有源。三徑蒼癡休待掃，紅英席地掩柴門。昨夜瑤姬下玉京，綈衣乘鶴凍雲橫。天花亂灑冰田滿，萬里銀河蕩曉明。玉輪一片輭長天，晚傍粧台鬪鏡圓。若箇開簾能睡去，喜他秋夜恰如年。

看紅梅

樓前春信到紅梅。小綻朱唇。乍開。莫作大堤桃李看。曾餐絳雪。傲寒來。

夜柳

依依柔態不勝飄。幾度東風拂露條。何事姮娥偏妬影。卻教暗裏舞纖腰。

屠瑤瑟（字湘靈，屠赤水女，年二十卒）

子夜歌

子夜夜轉長。簾前月華吐。只解歌調工。誰識歌心苦。清商激涼風。佳人在淮楚。

元日

青陽佳氣入庭除。補戶新粧逐隙初。綺閣當筵歌白紵。瓊樓試舞擊紅祛。牕前風度梅將落。簾外春寒柳未舒。蕨蕨椒盤當此日。闌膏影積夜牕虛。

燭影

畫梁疏影按紅牙。光入花叢比桂華。時伴瑤筵翻廣樂。乍浮紈扇隔輕紗。溶溶春夜疑宵永。閃閃秋闌共月斜。散盡纒頭天欲曙。清光猶照五侯家。

螢

隨風緩度畫樓前，縹緲殘星下碧天。  
枝上光輝分玉露，堤邊掩映拂清泉。  
有時明滅棲紈扇，偶爾高低墮綺筵。  
粧閣夜窺羅帳寂，傍人又點翠花鈿。

秋夜贈七襄

蘋花紅蓼趁江斜，暮色芙蓉映彩霞。  
常得與君酬白雪，夜闌清露在蒹葭。

沈七襄（狀元沈君典女屠赤水子婦）

睡蝶

一夜東風遍海棠，梁園蝴蝶拂柔桑。  
飛隨芳樹霞衣好，倦宿琪花玉夢香。  
似與名蕙分隴色，不堪清露濕秋棠。  
尋春又度雕欄去，卻伴游絲過石梁。

秋雁

兩行雁字點虛空，蘇蕙應憐錦字工。  
北去春和初振鰲，南來秋冷已吟蟲。  
霜高夜度秦淮月，露白聲兼荻葦風。  
誰坐流黃寒屈戌，一聲腸斷燭花紅。

自君之出矣

自君之出矣。孤月鑿虛牖。思君如飛花。隨風不同首。  
自君之出矣。花落聞啼鴉。可憐今夜月。清影爲誰圓。

### 黃昏聽雨

東望懷鄉有夢思。盈盈烟雨洗瓊枝。江南候雁無消息。淚與春波無盡期。

### 閨思

流蘇香夢曉朦朧。漫道蘇娘錦字工。願得花前長倚笑。天桃春鎖合歡宮。  
紫燕雙雙在上林。銀箋寶牋自情深。韶光三五人如玉。歲歲藤蘿寄藁砧。

### 坐雨有懷

高樓寂寞坐來清。春雨蕭蕭落暮聲。沈水香殘寒漏永。夢魂猶逐片帆輕。  
沙棠偶挾中流楫。芳草前溪歸路遲。何處烟波江上闊。清清一水是天涯。

虞淨芳（錢塘人。虞德園女。年三十卒）

### 梅花

小曲梅花曙。亭亭雪霽時。臨風如憶別。照水似相思。粧影夢猶見。寒香醒自知。傾城不解笑。幽獨更多姿。

梅花落

春來梅漸落，布地有花茵。  
薦酒清魂乍，繁粧笑靨新。  
凌風香尙遠，却月影猶勻。  
驛使那堪寄，江城笛吹頻。

春盡

小牕孤坐自徜徉，點檢流光日竟長。  
幽鳥一聲春欲去，落花無數燕飛忙。  
青梅碧酒林香遍，荀脯芹芽野味芳。  
莫歎韶華容易老，還饒清景入詩囊。

九日有憶

登高何處可擾游，黯爾魂消正暮秋。  
漫對黃花兒女恨，驚看白髮歲時愁。  
關心藥餌儲多尢，極目燕雲上小樓。  
珍重遠書何日至，鱗鴻自昔有沈浮。

題畫(二首)

茅茨結深廬，楓葉紅猶染。  
山人不出山，石扉終日掩。  
雲來青山白，日落青山紫。  
青山不改容，雲日自相爾。

看月

碧天如洗淨無霞，皓月當空照碧紗。  
獨坐瑤階風露冷，一庭修竹伴梨花。



春日有感

燕子雙雙遶畫梁。殘紅點點落西廂。幾朝別後心如醉。長漏催更欲斷腸。

玉鳳嫺（雲間張夫人與二女名世久矣因題云喬夫人善詞翰不勝神佳存之記

見喬作也）

寄喬夫人

夫人張閨媛善詞翰與余素相契自丁酉燈夕分手余隨宦楚城夫人已歸喬進士矣。至今屢更寒燠絕不相聞。適有南歸之雁賦此奉寄。

深閨分袂幾燈殘。三載驅馳道路難。仙範每思瞻北斗。故人無奈滯南冠。九秋深契湘江遠。兩地相思越嶺寒。今日喜逢初去雁。題詩惟有報平安。

秋夜寄元慶二女（有似余懷故并錄之）

霜寒烏鵲繞南枝。孤客那堪聽漏遲。三處離愁憑一夢。滿枝愁緒屬雙眉。賦成宋玉悲秋日。琴廢相如病雨時。黃葉打牕添不寐。屋梁落月伴遐思。

寄瑞妹妹

夢覺池塘怯夜闌。薄衾半剩五更寒。黃花幾度愁中句。鴻雁三過病裏看。尺素久贖雲錦斷。寸心空戀蔽裘單。要知別後孤燈客。憔悴難禁鬢已殘。

悲感元慶二女遺物（余因兩女載入擬欲周和傷心未能也）

空閨

壁網蛛絲鏡網塵。花鈿委地不知春。傷心怕見呢喃燕。猶在雕梁覓主人。

塵鏡

學書蛾眉逞豔粧。嫁來常歎舊容光。如今無復嬾蛾影。空掩清輝匣底藏。

廢琴

半生花月病中緣。閒理絲桐指下玄。斷腸廣陵聲已絕。蕭蕭風雨弔哀絃。

拋書

芸牕管蠶五車書。蠶雪晨昏樂自餘。可惜謝娥拋卷後。黃雲白草掩精廬。

砌花

紅紫當年手自栽。紛紛無主爲誰開。賞花人去春零落。愁逐東風點綠苔。

憶秦娥（月夜憶亡女引慶）

牽裾別欲行，還止心摧折。心摧折，羅衫袖漬，衷腸淚血。倚門目斷魚書絕，驚聞已逐波流月。波流月，空悲老我，雙鬢垂雪。

長歌咽，芳魂不返，徒悲切。徒悲切，寒煙蒼樹，爲將愁結。烏棲啞啞人聲絕，傷心一片中。天月中，天月可憐，猶照舊粧空閣。

張引元（文妹）

初夏寄母

一春羈思寄雲箋，又見槐陰鎖綠煙。擗管鑪多游子賦，倚門頻詠式微篇。松篁隱隱雲封石，池館悠悠風弄絃。寂寞斑衣愁正結，相逢准擬月初圓。

寄妹（絕類余家諸女情景）

金風初度井梧枝，正是懷人病起遲。兩地愁懷懸一水，九秋新恨上雙眉。久虛詠雪聯毫句，每憶挑燈共課時。塞雁已歸書未達，江城寒月照相思。

張引慶（娟妹）

遷居留別母夫人

斷腸尊酒慰殷勤，淚溼斑斕五彩紋。莫檢剩粧傷弱質，頓令圍帶長休文。夢回兩地淒清月，目斷三山縹緲雲。總使朝朝托雙鯉，也應寬穩嫁時裙。

沈叔蘭字開韻秀水舉政黃履素夫人

湖舫贈楊夫人

何意山前逢紫芝，一簾幽趣落紅時。憑闌柳映溫柔態，卷幔花明姣麗姿。驟領玄談飛韻韻，頻攜執扇咏班詞。歡娛卻恨歸舟促，聊把離情寄此詩。

旅邸傷女

音容宛爾昔長安，此日珠沈淚不乾。散盡彩雲天自碧，疑來仙佩夜增寒。春春芳草庭前綠，樹樹風飄秋裏丹。惟有北邙山下月，孤魂照斷去無還。

酬丁夫人來韻

蕭蕭初開雨乍晴，木蘭搖曳送君行。消魂最是今宵月，偏向離人隱外明。別來歲月任居諸，又是花黃雁到初。玉藻忽從天外落，大家聲價幾人如。

秋日舟中懷孟晚暨仲芳姪女

雨後不蕪色更青。蕭蕭笛韻不堪聽。芙蓉江上秋如許。好憶前年共採菱。

黃淑德（字柔卿秀水人）

泛月鶯湖（二首 三詩附見頂孟晚裁雲草中）

泛月遊鶯渚。愁多興自孤。鳴橈依落照。拂席近蘼蕪。笛韻凌空漢。歌聲度滿湖。遙思天外客。知我斷腸無。

落葉報秋聲。飛帆景自清。林疏垂露重。風靜暮潮平。蛩語牽人怨。鳥啼動客情。娟娟明月外。偏向別離明。

秋暮寄懷子孟晚

孤館蕭條落葉紅。故人遙隔水雲東。追思往事渾如夢。回首繁華總是空。徑草亂垂猶帶露。庭花漸老不禁風。愁懷萬種憑誰訴。閒倚欄杆數斷鴻。

黃雙蕙（字柔嘉卽閩麗夫人仲女本傳云端麗娟靜年十六卒）

和會稽女子驛亭三絕

誰道臨風半是塵。飄零猶惜異鄉身。梅花不入愁人眼。能得山陰一刻春。  
少婦何堪學遠遊。陟阿又問水悠悠。癡心只寫燈前恨。自古芳容幾白頭。  
憔悴天涯對阿誰。若爲多露獨含悲。空憐子夜孤亭淚。盡作霜楓帶雨垂。

姑蘇懷古步孟晚嫂韻

幾年濠上繫孤舟。不到荒臺夢亦遊。越女自來傾敵國。至今城外水空流。

周慧貞（字挹芬吳江人）

久病經年朝起對鏡不覺自歎（二首）

拂鏡試新粧。無言暗自傷。但看花上露。愁斷九迴腸。  
無限傷心事。朝來一照中。自憐顏色減。不似舊時紅。

七夕

雙星暗度巧雲飛。玉漏聲殘日正西。秋思不堪凝獨立。數竿風竹小牕低。

董氏婦（南潯人嫁始適年抑鬱而死）

秋夜

秋夜立空庭。寒波漾明月。天際搖輕雲。萬山沈碧闕。孤鴻海上來。聲聲怨離別。聞淚染臙脂。一淚一點血。吾生長不逢。幽恨何時歇。

私語

欲語語還歇。道儂儂不知。寸心千萬結。天邊月一口。

初嫁三日

卻憶含羞嫁阮郎。弱枝不勝綺羅裳。可憐命似春雲蕩。爛與梅花鬪晚粧。

落花

桃花片片春風飛。落草沾泥著處依。阮郎採藥歸山後。惟有啼鶻空自歸。

無衣

早起臨粧粉黛消。攬衣欲看又還拋。梅花點雪春衫薄。豈爲多情鬪楚腰。(可)

聞雁

一聲叫徹楚天秋。聲裏如含怨婦愁。豈是雲間無泊處。暫依沙岸立蘆洲。

自歎

紅藥倚闌迷曉霧，花色籠煙春半度。妾憐妾貌勝如花，寶鏡空將西子恨。

春日小牕

遲日停針倚北牕，飛花鼻鼻過東牆。不知我是愁眉婦，也點春來一片香。

張嫺靖（廬州人世稱行矣，余愛其人，故不忍置）

苔

不帶亦無華，雨餘色更佳。積衣藏古石，凝蔓抱寒沙。茵薄襯紅雨，鞋弓瘦綠花。香塵多滯跡，應愧石崇家。

書懷

幾年借隱寄林泉，簷倚蕭蕭竹數竿。嘗因讀史忘春去，每爲敲詩耐夜寒。窗草盆魚增悟幻，溪雲嶺月說空禪。此中恍有西來意，莫認拍愁借簡編。

蓮

人知蓮蕊香，誰識蓮心苦。爲憂秋風來，搖落無人主。

秋月



玉鳳揮江白，銀鈎掛碧天。關山吹笛者，今夜幾人看。

春園卽事

于飛燕燕穿花喜，茶蘼蹴落霏香雨。紅入幽叢不見衣，蒼苔綠潤弓鞋底。

秋夜

愁多自是夢難成，不爲床前蟋蟀吟。蟋蟀也憐秋寂寞，邀子伴月共三人。

夜吟

繞天落葉倚繩床，苔砌寒蛩泣夜長。閉把玉簪敲檻竹，棲鴉驚起月如霜。

挽薄少君（少君百首久傳，余故不存，此正以存少君）

紅顏銷盡命疑霜，梨酒誰人灑北邙。山水儻才果有意，應將墳草變鴛鴦。

菩薩蠻（同海棠）

海棠晝睡騰脂冷，杜宇枝頭呼不醒。想是怯東風，沈沈春夢中。閑來花檻外，漫把花愁

解，切莫更朦朧。輕將錦被籠。

又（連城山房）

風捲落花愁不歇，枝頭燕翦裁桃葉。花氣沁羅香，遊絲掛綠窗。蕉青鸞翅影，草碧龍鬚

冷。無語對瑤琴。闌花落膽瓶。

憶秦娥（聽杜鵑）

春去矣。蘼蕪綠遍苔痕紫。苔痕紫。暗葉啼風，老紅泣雨。燕解人愁已不語。杜鵑猶在寒煙裏。寒煙裏。道不如歸。何時歸去。

又（秋夜聽雨）

寒雨澁。寒風響響寒箴鐵。寒箴鐵。叮叮點點，蕭蕭瑟瑟。寒蛩趨趨吟寒葉。寒衾寂寂寒燈滅。寒燈滅。嘈嘈唧唧，淒淒切切。

翁孺安（字靜和，常熟翁太常女）

落花

揭來塵定自西東。近逐游絲遠趁風。細綴草頭文毅亂。暗飄書帶翠煙籠。凝眸殘蕊疏簾度。袖餘香曲檀通。莫向陽關增別淚。輕塵已惹燕泥紅。

暮春

寂寞幽窗試啓闌。亂紅輕撲小亭闌。菲菲花色和春老。怯怯鶯聲入夢殘。斜照留暉橫遠

黛微風送暖拂輕髮。暮來心醉松梢月。香閣簾垂好倦還。

### 梅花

影落空庭照玉卮。清人肌骨月明時。樽前傳出東君信。須折南樓第一枝。

### 海棠

春睡方酣醉暈潮。芳菲時向御園飄。自憐受得梅花聘。蘸雨迎風深淺嬌。

丘劉（湖廣麻城丘長孺夫人集唐最工今所錄皆集句也）

### 憶長孺

魂歸冥漠魄歸泉。落日深山哭杜鵬。忽見陌頭楊柳色。悠悠生死別經年。  
不堪芳草憶王孫。地迥難招自古魂。往事悠悠增浩歎。獨留青塚向黃昏。  
江流曲似九迴腸。愁思非春亦自傷。明月不知人世變。夜來依舊下西廡。  
鶯聲不散柳含煙。寒食家家送紙錢。心折此時無一寸。杏花零落寺門前。  
鶯聲初盡漏聲長。添得離人兩鬢霜。陪下青苔與紅葉。九原何處不心傷。  
窗殘夜月人何在。一見清明一改容。墜葉飄花難再復。生離死別恨無窮。

亡弟劉金吾延伯歌姬盡散有感賦集

十里鶯啼綠映紅。每驚時節恨飄蓬。何時最足相思處。月落長安半夜鐘。  
樓上殘燈伴曉霜。天涯一望斷人腸。回身掩淚挑燈立。拭却千行更萬行。  
一枝殘菊不勝愁。雖恨歸心雙淚流。無限別魂招不得。滿天風雨下西樓。  
寂寞閑塔草亂生。紅霞映樹鷓鴣鳴。重門深鎖無人到。顛倒青苔落絳英。  
北書不至雁無情。橫笛休吹塞上聲。此夜曲中聞折柳。高高秋月照長城。  
杏花榆莢晚風前。祇是當時已惘然。江上見人應下淚。楚山花木怨啼鴉。  
殘花悵望近人開。南國佳人去不回。回首可憐歌舞地。年年春色爲誰來。  
落花寂寂委青苔。黃竹歌聲動地哀。天若有情天亦老。怎教紅粉不成灰。  
溼雲如夢雨如塵。自有春愁正斷魂。人面不知何處去。空留鶯語到黃昏。  
高樓獨上思依依。海闊天長音信稀。日晚江南望江北。山川滿目淚沾衣。  
煙籠寒水月籠沙。楊柳絲絲拂岸斜。小院迴廊春寂寂。夜來風雨送梨花。  
耿耿銀河雁半橫。淒淒長似別離情。鴛衾別久難爲夢。斜倚薰籠坐到明。  
蕭蕭落葉送殘秋。寂寂長江萬里流。獨倚欄杆正惆悵。寒鴉飛盡水悠悠。

千山萬水玉人遙。人事音書漫寂寥。惆悵一年春又去，更無消息到今朝。  
誰家玉笛暗飛聲，總是鄉關離別情。妾夢不離江上水，夜來歸到洛陽城。  
離人到此倍堪傷，雲雨巫山枉斷腸。回首舊游真是夢，起看天地色淒涼。  
青山重疊樹蒼蒼，雨霽憑高只自傷。無路從容倍笑語，此生何處問劉郎。  
神女歸山更不來，豈無香跡在蒼苔。窗前碧月蛩聲急，去恨離愁醉不開。  
斜背銀缸半下幃，錦衾香冷夢來稀。多情自古還多恨，今日思君淚滿衣。  
楊柳陰陰細雨晴，碧天如水夜雲輕。春來處處聞啼鳥，獨擁寒衾不忍聽。  
未有刻集幸見藏本得九人

袁彤芳

(字履貞蘇州人憲使袁德門女年二十九卒自稱廣寒仙客才色俱絕世)

坐月有懷

月色太無賴，窺窗一何明。之子隔千里，懷君詩酒盟。玉爐煙篆息，銀漢夜縱橫。坐看雙星  
隔，應思長別情。

贈王孃

翠竹深深一徑斜。閉君獨坐誦三車。胸藏錦繡羅星斗。詞吐琳瑯映曉霞。自是當年學避秦。年年花發不知春。春波亂湧桃花出。未許劉郎來問津。問津未罄情已退。別離繼之令人嗟。不隨謝女吟飛絮。願侍天孫學散花。花飛花落春如織。越水吳山恨南北。早知相見不相親。何似當年不相識。便擬乘鸞向紫煙。紫煙深處弄鳴絃。得聞祕笈何辭死。但吸瓊漿便作仙。青鸞白鶴真堪羨。雙宿雙飛常作伴。生憎花折並頭時。卻怪玉釵雙燕斷。玉釵雙燕隔瀟湘。一別銀河路渺茫。點點行雲飛易散。紛紛梁月照還亡。吁嗟乎青田碧海須臾改。王嬙西子今秋霜。

病中逢立秋

臥病驚花落。桐枝忽報秋。懶容羞對鏡。弱步倦登樓。去水杳難復。行雲不可留。故人搖落盡。惆悵使予愁。

九日

玉露泣秋草。金風綻晚蕖。白衣三徑少。黃菊一枝疏。病減登高興。愁無射雁書。遙知二三子。相向正愁予。

春日寫懷

風暖閒庭春日移。紅英一夜盡芳枝。身如遊子隔千里。心獨思親十二時。秦樓鳳去玉簫

杏。若水鱗稀彩筆遲。曾似呢喃雙燕子。年年飛向畫梁窺。

傷春

東風拘束苦相禁。花落鶯啼葉作陰。無徑可通青足信。有情空作白頭吟。淒淒病骨侵肌瘦。脈脈閒愁入夢深。不信只看羅袖上。斑斑點點血遍芳襟。

遊山（時年十四）

楓林葉墜紅。荷沼波翻綠。回首歸路遙。雲山萬重曲。

無題

陳宮破鏡還重照。弄玉瓊簫卻共吹。何事彩雲飛鶴下。年年不作一雙歸。

宮詞

楊柳初濃午夢長。懶持紈扇學宮粧。美人睡起思無賴。惟有風吹菡萏香。

落花

粉糝紅消黯自思。臨風不敢怨春枝。一辭並蒂分飛後。誰惜殷勤未放時。落紅點點綴蒼苔。何事音書久不來。病起最嫌風入幕。侍兒莫把錦屏開。羅袂春寒怯曉粧。繡紅微倦倚雕床。閒愁空攬一春恨。羞對呢喃宿畫梁。

蝶夢初醒午風憑欄極目望飛鴻。小牕坐久情無奈。惟有落花滿地紅。

三月三日

韶光九十春將半。羨憶金閨思欲迷。一水似添千里隔。滿庭飛絮亂鶯啼。  
桃花落盡柳煙濃。病裏愁閒午夜鐘。別後滿懷離索恨。一齊收拾錦箋中。  
禁煙三日清明雨。寒食幾番花信風。遙憶故人應寂寞。小欄斜倚怨飛紅。  
楊枝飛絮草煙萎。黃鳥間關只亂啼。夢裏不知身是蝶。時時飛過大江西。  
多情常是因花瘦。獨坐閒吟畫掩扉。好句似從天外得。春心時在夢中歸。  
木蘭花發最繁枝。錦字何繇寄我思。一自武陵人別後。至今只有夢相期。  
彩筆漫題幽曲怨。錦箋難寄辟寒香。故人爲我應憔悴。我爲思君泣夢長。

長相思（旅思）

問歸舟。風滿樓。月滿樓。月白風清動客愁。旅況不堪留。燈半篝。香半篝。香沈燈燼漫凝眸。天際

黃鴻（字鴻耀仁和大參黃又謙女詩名廣寒）



無題

幾度黃昏後，懷人住上樓。花陰空結夢，竹影欲翻愁。願隨明鏡裏，飛繞最高頭。

偶成

落日卿山轉，星稀月漸明。東風不爲吹愁去，欲訴幽懷誰與評。

謝妹貽檀香梅

簾外鴛鴦久未開，忽聞青鳥送春來。蜂脾色嫩香檀透，淨掃花欄取次栽。

春暮

一階芳草落紅梅，小幅羅衣獨自裁。喃喃尚有歸梁燕，爲愛春光去復來。

得梅花示仲女瑗

珍重一枝迎煖日，等閒重幕擁寒灰。無端香遞渾隨夢，楚楚依依玉鏡臺。

長相思（愁怨）

倚欄杆，步欄杆。鶉鴉三更枝上寒，如何桂影團。記難難，話難難。那堪清漏喚邯鄲，啼紅

燭未殘。

菩薩蠻（梅花夢中）

開闌十二幽香賦。分明睡在梅花裏。風動晚粧前。殘雲冷翠鈿。花花何處問。向晚愁來近。橫枕一張琴。琴心曲裏凭。

張倩倩（吳江人別有傳）

詠風

蕭蕭竹徑鳴。捲幔如有情。木落寒山裏。千林共一聲。

憶舊

故人別後杳沈沈。獨上高樓水國陰。鴻雁不傳書底恨。天涯流落到如今。

過行春橋

行春橋上月如鉤。行春橋下月欲流。月光到處還相似。應照銀屏夢裏愁。

偶題

春衫帶館縷金綃。畫永空閒碧玉簫。情到寄將何處好。曲欄杆外折紅蕉。

浣溪沙

幾日輕陰冷翠綃。起來慵把柳眉描。春情無奈困人嬌。

簾外錦鴝啼恨絮。天邊征雁寄書勞。小牕閒撥篆芸燒。

### 憶秦娥

風雨咽。鷓鴣啼碎清明節。清明節。杏花零落，悶懷千疊。情悵依舊和誰說。眉山鬢鎖空愁絕。空愁絕。雨聲和淚，問誰淒切。

### 蝶戀花

漠漠輕陰籠竹院。細雨無情，淚溼霜花面。試問寸腸何樣斷。殘紅碎綠西風片。千遍相思纔夜半。又聽樓前叫過傷心雁。不恨天涯人去遠。三生緣薄吹簫伴。

### 黃媛貞（秀水人）

黃媛介（皆字令貞，妹詩詳彤齋續此）

### 吳山（字文如，金陵人）

### 題壁上刻竹

誰謂汝無情。何以岳陽醉。誰謂汝無恨。何點湘江淚。謂汝不學仙。曷有壺公異。謂汝不學史。胡作孤臣記。奇汝不佞春。春朝骨不媚。奇汝不怯冬。嚴霜未常悴。疏可漏月窺。密可籠煙睡。

迎秋早帶寒，近水波深翠。大都動而勞，不若靜而粹。主人能領神，懶作涓川事。藏之別有軒，不令子猷視。十尺壁上天，一林粉中地。寒可斗酒澆，燭代月光賦。形與神俱忘，君與公無二。

病起

風雅原無命，多情山水留。見詩如故友，步室似重游。乍起愁宜遠，躊躇貧且休。眼前無所事，閉目悟根繇。

月夜訪孫夫人夫人善詩呼我爲得意友

新入志年社，輕舟過竹扉。無心茶正熟，得意友方依。快句醫詩瘦，親燈笑影肥。羨君池上月，送我一船歸。

禪堂

山寂雲多卽，林聲出竹深。風香迎栢味，月度澹松陰。坐石禪機逸，宣經法性森。雲消山謝納，林靜竹無心。

瓜州舟中夢歸寄妹

關津不阻夢歸游，夜夜相逢返客舟。山坐尙多煙水換，腳根豈保梓桑留。瘦自去年愁裏得，笑從別日淚中收。瓜州水徑分南北，遙見南船卽故丘。

獨此

月自移雲出。風從拂樹來。空庭人子立。瘦影共徘徊。

自遣

一自知春不喜春。因一春味細無倫。天生俊骨從來傲。恥聽人間稱美人。

秋江

蓼花楓葉雨輕濛。似是離人別淚紅。今日金風帆去疾。明年歸莫在秋中。

閨情

夜雨含愁默對檠。無聊且自索茗烹。燈光欲告頻傾舌。茶亦關情作泣聲。

周蘭秀（字弱英吳江人）

野望

眺高人籬絕。鳥關落雲忙。總冷香浮幕。帷閒夢是鄉。煙光攜柳靜。霞氣覆苔香。野致應如許。玄心若箇長。

春游即事

芳草重重襯徑蘿，遊情澹遠欲如何。無端紈扇因風墮，是處桃花映水多。榜女戲拈新綠笑，黃鸝初對客樵歌。山光爲共春光醉，宛棹迴谿自逶迤。

偶述

愁多不堪語，塵緒縷於絲。花落空相負，秋情浪蝶知。

閨思

花影搖懸暎色鮮，燕泥斜墮雨風天。寒深小帳春無緒，衣捲殘香憶夢眠。

曉起

曉風疏柳掛樓西，霧合秋臆半欲迷。衾冷不堪重索夢，黃鸝飛向隔花啼。

王徽（字口口蘇州人方伯王二冥女）

秋月賦

虛微子栝坐閒齋，端憂多緒。低首默言，昂然爐氣。四壁蕭條，一庭蕪穢。蟬嘒嘒而長吟，蛩唧唧以怨對。時商秋爲令，宵如未央。桂葉扶疏，蘭露凝霜。隔林孤吹，遠雁翔翔。燈明晦而焰短，帶繁紆而恨長。徒倚中庭，徘徊瞻望。長空澄淨，寥廓悠然。清風時度，皓彩遙妍。衆籟收聲，平池鋪練。如入冰壺，恍然月殿。以愴愴而神傷，冀娥娥而共感。軸湘簾，滌茗碗。爇沈檀，編絃管。陳玉

盤待鸞。盼瓊質之婷婷。會予衷之款款。蓋經天義地。日月之衡。坤順乾剛。陰陽之理。五行六宗。人性多方。春往秋臨。時光代序。日爲陽德。月柄陰靈。昧谷初登。皓魄靜而皎皎。扶光旣引。清輝滿以盈盈。祀芳彩於萊山。迎坤令於西冥。懸水鏡於漸臺。駕冰輪於軒庭。從星多澤。稟日光靈。貞明制令。清朗升平。洪光益壽。連璧德臻。盈虛羣從。晦朔天根。方諸望而水秀。蒨纈至而金清。照虛堂之絕響。觀玉宇之無塵。羨瓊瑤之世界。恐嬋娟之笑人。度光陰之迅速。嗟造化之難均。步閭階之長白。聽旅雁之悲鳴。憐菊蓉之清瘦。惜蘭荃之香馨。視囊季之用信。嗟蟾兔之蠹。慙風颺颺以薦冷。露瀼瀼而霜凝。韻悠悠之朔管。耿寥寥之臯禽。悵幽容之澹淡。傷逝水之泠泠。繫沈憂之莫解。聊咏歌以怡神。歌曰。風淒淒兮月漸流。情默默兮徒自愁。日居月諸兮何時休。懷哉懷哉兮兩鬢秋。於是月倍淒其如耿。如悟。辭濟傷容。迴星轉霧。烟雲四起。寒空失素。漏點將沈。雞聲遠度。又歌曰。宵將曉兮曉又宵。心怳怳兮路迢迢。永歎何時極。朱顏莫可邀。

沈蕙端（字幽馨吳江人）

針線箱（暮春曉起觀雨）

爲昨宵峭寒無寐。聽風雨三更驟起。到朝來見幾樹紅芳墜。一帶麗華俱廢。烟籠池館清

波溢霧鎖溪橋。柳低名園裏。探幽香。蛺蝶空自爭飛。

恰纔問海棠開未。又忽早。薔薇淡矣。卻教人。驀地驚心。碎時序。未經春季。飄零花事。隨流逝。寂寞鶯期。羞浪啼。闌闌裏。啓紗牕。愁對烟景。凄其。

金絡索（夏日閨中）

炎蒸氣。漸衝弱體。生煩冗。惱殺啼蟬。觸處齊喧哄。偏將午夢驚。思無窮。輕步乘涼。水閣中。榴花紅。噴千枝火。荷蕊香。翻十里風。歌聲送。採蓮人。棹畫橋東。韻悠揚。飛入簾櫳。忽逗起。閒情重。

傳聞偶及得六人

雲間閨媛（未詳）

寄夫南都應試

孤燈照妾千行淚。明月隨君萬里行。昨夜啓聽望南北。不知何處是金陵。

楊若仙（未詳）

舟泊西陵話蘇小有感



碧芳氣尙撩人。  
愁絕西陵渡。涇泗未可親。簾鉤虛夜月。油壁委荒塵。松解心頭結。嵐添鏡裏鬢。年年春草

芙蓉

灼灼芙蓉花。臨流似解語。欲採以爲裳。飛橋隔江浦。

昭君怨

漠漠胡天雁字哀。琵琶暗撥恨難裁。飄飛不及南歸侶。一度秋風一度來。

許氏 (未詳)

曉霜

春望憑江閣。寒花綴曉霜。皓疑停夜月。晞似畏朝陽。凍合鴛鴦瓦。光分翡翠梁。遙知衰草  
路。人跡往來忙。

七夕

深閨無夢到星河。花月參差恨轉多。底事摻摻雙素手。長年孤影伴寒梭。

王氏 (嘉興人)

春日

晝長門靜掩，愁病自應憐。倦繡頻餘線，焚香數燕錢。護花嫌蝶舞，問柳愛鶯眠。偶到樓頭望，春光半已還。

周綺生（初出平康終歸非匹，鬱志而死遺稿甚多不傳亦可惜也）

二十初度

作惡春風二十年，愁眉常到鏡臺前。去年楊柳爲誰折，今歲梅花黯自憐。

贈友赴南都

西風一葉白門秋，萬里那知人倚樓。寂寞漫憐桃葉渡，管絃能起故鄉愁。

（有遊天竺落句云：煙深鳥不語，歸路已漫漫。五月六日云：酒到蒲觴冷，門懸艾虎新。以此知名。）

童觀觀（楚人云有殊色，工詩善畫，畫曾見之）

無題

未逢風流願，先愁浪蕩身。聞其小時作也，語非所宜，存其人耳。

凡筆記所載，散見諸書，得十一人。

沈清友（蘇州人）

晚天移棹泊垂虹，閒倚蓬牕問釣翁。爲底鱸魚低價賣，年來朝市怕秋風。

黃嗣眞（字玉娘，金谿人）

漁村唱晚

網影垂簷江樹空，晴川隱映落霞紅。欲知千古滄浪恨，盡在斜陽款乃中。

鏡中燈

寶炬菱花共照臨，風吹不斷影沈沈。五更滄海涵晴旭，半夜金星犯太陰。翠袖拂塵紅燄冷，朱唇呵霧碧光深。任教撩亂飛蛾撲，難滅虛明一點心。

吳氏（歸安人，駕部吳公擇女）

金陵官舍送季父

官舍知秋早，那禁骨肉離。長江望不到，風雨細帆遲。

黃幼澡（字漢薦，籍田人，丰姿韶美，年三十九卒）

夏景

深院塵消散午炎，  
閑情似水淨粧奩。  
綠池菌萑輕風送，  
獨愛香來爲捲簾。

冬景

蕭索隆冬百事閒，  
白茅簷外雪漫漫。  
此身香閣堪誰比，  
曾許梅花共歲寒。

雨中看紫芍藥

粧樓初下自傾城，  
冉冉香生繡戶清。  
厭說廣陵春色暮，  
麝脂和淚雨中傾。

恨白芍藥不開

萬種花開門曉紅，  
含羞無語倚東風。  
素粧不理因誰倦，  
一段春藏粉黛中。

姜氏（新建姜方伯孫女，年三十二卒）

山居

何必入山深，  
居然似漢陰。  
雨殘雲在竹，  
野曠日平林。  
負郭多幽事，  
爲農長道心。  
芸廳開卷

罷多是聽鳴禽。

劉氏（楚人云著作甚多，少年夭折，遂俱散佚。）

### 浪淘沙（新秋）

昨夜雨綿綿，寒澁燈烟。薄衾蕭索不成眠。曉起床頭看曆日，換了秋天。綠葉尙新鮮，猶想爭妍。教他知道也淒然。眼底韶光容易改，樹且堪憐。

朱玉耶（金陵人）

### 空庭閒思

桐樹花香氣似雲，最堪憐處映斜曛。憑誰報取君同賞，可惜桐花滿地分。  
劉玄芝（字秀生，金陵人）

### 宮詞

白玉梨花白雪香，官家賜酒洗新粧。謝恩未了傳呼急，上殿吹笙學鳳凰。  
上陽宮冷葉紅飄，高閣朝元秋雨宵。獨抱錦衾愁莫解，殘燈孤影夜蕭蕭。  
臘雪初殘睡欲遲，寒瓶久坐有冰澌。待兒忽報三更月，已上梅花第一枝。

玉擘春草傍塔生，幾樹梅花四照明。抱得秦箏樓上坐，含愁彈得兩三聲。

周潔（字玉如，金陵人）

望秦淮

秣陵無處望，離水正前流。何不教東下，將心到石頭。

丘慧貞（字法融，建昌人，歸宗室，詩俱不全）

月下溪聲

溪添一夕雨，瀉出萬端聲。

新涼晚眺

隴陰雲忽到，山霧雨初收。

鄧夫人（南昌宗女，鄧御史遠遊夫人）

寄遠遊

春早梅花風故翦。秋聲蕉葉雨偏澀。

附亂仙二人。

王氏（自言宋時人。色美而黠。年二十卒。）

兒家夫婿太輕狂。錦瑟春風淚萬行。孤枕伴人憐夜雨。翠娥蹙盡五更長。

秋波媚

流水東迴憶故秋。疏雨滴更愁。雁來楚峽。風淒江渚。瘦損輕柔。嬌姿絕世偏風韻。斜倚  
向粧樓。慵窺寶鏡。淚懸情眼。恨鎖眉頭。

周烈女（年十七。美姿色。元兵渡江。欲迫汙之。不屈。沈江而死。）

潯陽江上不勝愁。雲去天空水自流。咽盡波聲愁不盡。深深江水恨悠悠。

夫六合雲捲。四海塵飛。婦女不幸。當此際。以烈死者何限。徐君寶婦。岳陽樓詞。流芳千古。才與地兩擅其勝也。蓋有烈矣。而未必能詩。詩矣。而未必人知。知矣。而非好事者。其孰傳之。泣貞魂於冷月。淒玉骨於荒烟。可勝歎哉。

國初松江謝氏婦有殊色。以籍沒給配象奴。婦賦詩云。不忍將身配象奴。自將麥飯祭亡夫。今朝武定橋頭死。一劍清風滿帝都。遂自頸。嗚呼烈矣。曾表章歎。

蘇州女子李氏云。桃花一簇開無主。並不留題崔護詩。國初人有集行世。而終於溲沒。可勝惋惜。

費文憲公女。適宜興吳尚書子。年未三十卒。寄公詩云。染淚裁詩寄老親。洞房辜負十年春。西江不是無門第。錯認荆溪薄倖人。按文憲岳母爲濮夫人。公夫人名秀蘭。母女俱能文。豈夫人獨不能邪。當必有集。識此考之。(以上三則時代稍遠。故附見云。)

### 唐宋遺事

近見稗家記葑門掘一唐墓碑。云夫人張氏。清河人也。素有風容。洞閔辭藻。年二八。適于范。惜乎風容辭藻。杏俱不聞哉。古今何限。良可歎也。

王荆公女適吳丞相子。工詩。亦僅傳一首耳。其姑李夫人。亦最能文。何以不傳。雪夜云。絮飄柳陌三春雨。花落梨園一笛風。百尺玉樓簾半捲。夜深人在水晶宮。又王平甫女。不緣燕子穿簾幕。春去春來可得知。與荆公女姊妹並美。惜爲闕文。

信陽僉判李穆婦。大有才藻。謝范忠宣夫人云。朝來瑞靄遍祥虛。果見麻姑降陋居。



陶令滿籬惟有菊，相如四壁但藏書。蕭條庭館門盈雀，冷落壺樽食少魚。何幸蘅茅借光色，仙標欣接碧油車。

曾子宣在海州，有張氏女甚美而慧，魏夫人愛之，教以詩文，紹聖初，子宣柄政，張氏已入禁中，夫人入謁始相見，敝舊，後夫人歿，張作挽云：香散簾幃寂，塵生翰墨閑。空傳三壺譽，無復內朝班。

陳述古女題雁屏詩云：沙淡蘆欹曲水通，鬢雙容與對西風。扁舟自向江鄉去，卻喜相逢一枕中。曲屏誰畫水瀟湘，雁落秋風蓼半黃。雨薄雲疏孤嶼遠，會令清夢到高唐。以上俱未入選本。

許彥周詩話云：中秋夜月詩押尖字，一婦人云：蚌胎光透殼，犀角暈盈尖。彥周止記二語，不錄全篇，亦不言此婦何人，甚爲兩莽。

張芸叟女題寺中云：滿目煙含芳草綠，倚欄露泣海棠紅。可想其風致，亦以不全失傳惜哉。

世行選本，俱收採未徧，嘗見稗記所載，如陸放翁至蜀宿一驛中，見壁上詩云：玉階蟋蟀鬧清夜，金井梧桐辭故枝。一枕淒涼眠不得，挑燈起作感秋詩。卽亭長女也。放翁遂

納爲妾。

宋女子申屠氏字休光美而黠臨嫁留別詩云女伴門前望風帆不可留岸鳴蕉葉雨江醉蓼花秋百歲身爲累孤雲世共浮淚隨流水去一夜到閩州後以殉節死。

洪武初吳人姜子奇以兵亂失婦乃爲京師一衛弁所得後子奇訪之金陵妻見之以詩云君留吳會妾江東三載恩情一旦空葵葉有心終向日楊花無力暫隨風兩行珠淚孤燈下千里家山一夢中每恨當年分別後相逢難把姓名通弁見詩卽時遣還。

世廟宮人張氏詩云悶倚欄干強笑歌嬌姿無力往宮羅欲將舊恨題紅葉只恐新愁上翠蛾雨過玉天塔色淨風吹金鎖夜涼多從來不識君王面棄置無情奈若何。

留都禁內壁上有詩年久剝落止二句寒氣逼人眠不得鐘聲僅月下斜廊後云端闌仙子書。

張璧娘光麗艷美少寡與林子真交好寄林云黃消鴉子翠消鴉簾拂層冰帳九華裾縷褪來腰束素釧金鬆盡臂纏紗床前弱態眠新柳枕上迴鬟壓落花不信登牆人似玉斷腸空眊宋東家。

福州吳某女未笄甚敏慧玉色穠麗答鄰舟江生詩云自是芳情不戀春春光何事

撩閨人，淮流清浸江邊月。比似郎心向我親。江生名情，時年十六，後爲夫婦。江二十三登進士。

宜山鄧氏女題畫菊云：良工妙手任安排，筆底移來紙上裁。葉綠花黃長自媚，等閒不許蝶蜂來。

（此類選於選外者甚多，不能盡蒐合作一帙也，亦恨事耳，故舉所知附於此。）

伊人思終

## 百旻草序

仲兒僞物。余哀館中。其昆若季請於余曰。僞以鬱死。故非不攻苦下帷也。二三年來。雞鳴風雨。篝燈枕笈。篋中蘊積尺許。觀之。泫然可傷。雖瑕瑜互出。豈無一二全瑜者。曷爲殺青。以稍見其志。摩又私學作古文。蔚然可觀。九原有知。其亦何能已耶。余曰。雖然。甚不必也。天下之爲古文辭。與制舉義。亦未暇及僞也。兒輩曰。姊妹兩遺集出。發於上。駕鮑劉。下掩魏李。何遽僞不可。余曰。非也。紅闈片玉。閒者色飛。彤管寸香。見者神豔。此是世間情。想習障。今古盡然。若應世文。勿論震澤毘陵以下。及慶歷諸名家。東高閣者。競如惠子。卽南宮三年。大社一徹。靡不傾珠萬斛。列市五都。真有窮年攷斲。不能蒐逼之苦。而又欲移其目於僞之文。此亦非僞則罔也。至於古文。旣非若枚舉十七上。梁王之書。王子安十四作。滕王閣序。卽不必傳。亦必不傳。又非若縉紳先生。足爲當世重者。山人寶鼎。且康瓠置之。童子又何問焉。陸士衡醬餽。自有左太冲賦覆之。并不用此爾。已卽遭先太宜人變。斬然由居。嬛嬛謫謫之日。兒輩無敢進言。秋初。內子臥病。以過哀致也。於時。規月乍涼。砌蟲怨響。細雨濕碧。疏花悴紅。余自念情事作惡。中夜起歎。兒輩乃微申前說曰。秋風蕭蕭。河漢斜矣。雁聲一叫。豈無離羣追逝之感。昔僞讀羊太傅。湮滅無

聞使人悲傷之語。輒低徊。余歔。慷慨移日。不意壯懷。今焉至此。塵封舊匣。何時了此胸抱間。願非謂僮必傳。亦非必能傳僮。第使僮白其鬱鬱。以稍見於世。信者憐之。疑者笑之。不信不疑者。擲之。則凡博世之一擲。卽僮不寂寞於世之一日也。不庸多於草木泯而迄無擲者乎。且庶幾亦或以舒母憂也。各相對泣數行下。余潛然許之。開篋觀其生時筆畫。遺篇故紙。舊跡如新。墨染朱塗。嘔心所歷。余恐內子益增病境。哭失聲而反飲者。迨於再三。簡置几上。悽酸心目。未忍卽閱也。夜遂夢僮立於几側。似有喜容。而默然無語。第以一冊呈余。余視之曰。百晏。旋忽驚寤。東方已白。夫其精魂未散。尙留而憑之。平日之手澤歟。抑昔之鬱鬱於此者。深知父與兄弟爲其惜之護之。將表而出之。故喜而託之夢歟。是皆不可知。惟是百晏之義。似無所解。豈號泣于晏天子父母。自一而咨嗟涕洟。以至於百歟。則僮於文殆真有不能已者。而志之可哀也。益以甚矣。余又安能禁涕之漣漣。不傍徨太息拊床而起哉。今去時義。存古文五詩七。其所作者止此。稍以完死者生者志焉。卽名曰百晏草。誌僮夢中意也。天寥道人題。

# 百旻遺草

吳江 葉世僊聲期 著

## 賦(二首)

### 羅浮山賦(癸酉作)

顛生性愛山水。每言及天下名山。心甚慕之。且曰。人生遍遊雲霞。真大快事也。奈徒有志不能。又聞羅浮尤勝。爲天下名山第一。遂隱焉。于是爲賦之。

惟羅浮之異域。實朱明之洞天。二山屹其並立。崖巖薄而綿聯。上絕雲烟之履道。下流逆折之回泉。界中天而舉峰。側橫嶺于重川。巒岩回復。四百餘里。石室長溪。七十二只。上出重霄。突帆囁使。下有深洞。幽藹無底。至若高峰刺天。漣軸蔽日。蠟腸嚙崕。岬嶂崔嵬。驚濤拂石。洄流抱嶺。峻嶒駕磧。吞吐雲霓。出納瑞霧。或疊如雲。或斷如烟。若伏而峙。若絕而連。屹然如立。巖然如竊。萬壑交暎。千岩互旋。峰名會真。羣仙集焉。於是林壑迤邐。千里爭迴。紫霞飛聚。

花首成臺。水簾如掛。錯繡如緞。金沙水宿。石白烟醴。何女望而不見。真人游而自來。飛雲障而夾路。玉鵝峙而雪皚。若夫魚石欲跳。岩磴橫梁。哮虎弭伏。危柱高翔。阿耨夜樂之池。奇泉卓錫之觴。出乎幽澗之中。徑乎曲澗之泱。實神仙之勝覽。跨九疑而挾三湘。而乃尋幽穴。訪仙踪。探所莫探。窮其未窮。瑤臺對距。瓊室龜嶽。玉堂相映。朱閣玲瓏。霞灼雲掩。積疊萬重。更有玉樹成叢。神禽棲枝。如雲之蘭。如月之芝。翠羽金粉。穠蔭迷離。龍公之竹。鸞鳳所依。碧雞羣翔。參差共飛。峻石立而爲樓。瑤石削而成磯。望滄海其在目。爛霞錦而依稀。顛生于是。藏真玉室。停駕金楹。風發水宿。雲臥天行。積墮葉而曳袖。集芝製以霏英。駕雲霓而靈矯。御飄風以遐征。餘飛泉而自舒。餐瓊菓以爲鯖。步瑤水而踟躕。上鴻天以鑿珩。餌仙石之流液。進碧海之琅觥。採扶桑之丹棋。服太上之玉精。於焉步駕青螭。軒乘白鹿。仙子羣來。玉妃咸穆。或飛霄漢。或翔幽谷。齊和步虛之詞。長歌采薇之曲。接高風而遠嘯。泝深流而濯足。撫岩花以賦詩。揚素波而自浴。披芳草以爲茵。援垂陰而爲屋。挹瓊漿而爲酒。瀝水碧而是服。于是忽焉縱體。飄忽飛翻。澹蕩烟霞。出入林麓。友岩畔之蒼松。與山間之綠竹。披薜荔以飄飄。采薜蘿之芳馥。步丹壁之滑苔。臥石門之寒木。攀葛藟之飛莖。弄深泉之流瀉。坐幽林以尋花。步高岩而乘寬。悲哀猿之長嘯。觀虎豹之奔馳。看蒼天之鶴舞。聽綠樹之鶯啼。鶴舞兮翩翻。鶯啼兮連綿。幽谷兮落花。碧澗兮鳴



泉頭生乃乘虛而行，御風而發，出乎混冥之閔，游乎日月之窟，乃抗袖而歌之曰：蔭薛蘿兮，可以作衣，採松子兮，可以療饑，別有天地兮，竊藹翠微，神宇非遠兮，又將安歸，歌畢而返，白雲乘焉，翳何人斯，羅浮之仙也。（句法字法，用事重疊甚多，故是稱小之筆）

曉起賦（甲戌）

倒衣裳以出戶兮，步閒庭而徬徨，瞻雲漢之沈沈兮，色未朗乎蒼蒼，罷餘月于曉山兮，落殘星于錦江，聞鐘漏其將絕兮，聽鄰雞之傳鳴，蟲歌唧吟兮，廷壁悠涼，鳥鳴展翻兮，高樹空揚，顧四字之無聲兮，獨一影以徜徉，曉雲山其縹緲兮，聳分崖以如燿，穿森林而徒倚兮，驚清露以沾衫，雲曉曖其未霽兮，水洗白而先漣，草凝霜以愈翠兮，花滴水而彌鮮，恣心目以棲止兮，任徐步之踟躕，入宿霧之叢蓼兮，蹈濕苔之平原，採木蘭之墮露兮，飲蕉樹之甘泉，望陽谷以延佇兮，仰扶桑之拂遷，時冉冉其漸降兮，日忽忽以將懸，于是乎林映晨霞，壁帶紅暈，江流濯彩，雲行飛旭，目田野之青青兮，入輝光以齊馥，瞻遙嶺之蒼蒼兮，衝初照以重複，天晃朗以彌高兮，日含曜以侵囑，歎良會之難留兮，恨盤桓而反復。

記（二首）

汾湖石記

壬申七月之望，與雲期大兄、威期開期兩弟、瓊章三姊同作。父命也。（瓊章作已別返生  
晉集中）

松陵水鄉也。汾湖爲特著。予家卽在湖之西北。葭汀蓼渚，風帆釣艇，朗朗日夕在目也。忽當大旱，水且幾涸，湖之濱壘壘有石出於波上，往來之人噴噴傳異之。乃棹舟載以歸，則莓苔積痕，雖不甚大，皆磊落多姿，可喜也。于是置之庭前，相與娛而樂之。居然與花草交映矣。然余不能不異于湖之有茲石也。或曰：昔固花壁之址，世遠人亡，以致頽沒于水，而今出之，固百年之舊物歟。尙有高大離奇，峰巒嶮者，先是水涸，已爲有力所得。今之所存，彼之所棄也。彼有力者何人，而敢肆焉？若是乎？惜乎我未之前聞，而不并取以歸。今也不可復得矣。且今所得者，方羣聚而賞其幽美，而已爲彼之所棄，則是其所得者可知也。然彼不過傭奴市販者流，徒以豪力得之，吾知石亦有不樂焉耳。故一石也，在無意間不勞而得之，則可喜；以爲昔人舊物而今出之，則甚可感；若其更有奇姿瑰狀，爲他人所得，而予不一見，則又甚可恨焉。雖然，茲石也，方且綴以碧草，繞以名花，喜其得之無心，而忘其爲可感可恨也。我亦娛我情而已矣。且宋之徽宗以好石亡其國，而米芾以石特聞于天下，然則有國家者，石猶不可好，而騷人詞客之流，

得借石以寄其玩世之思。則予之取此石也。庸何傷乎。

遊陽山大石記（癸酉春）

陽山古秦餘杭山也。又名蒸丘。昔者勾踐伐吳。夫差敗死。葬於卑猶之亭。卽此山也。予從諸父兄掃尙寶公墓。墓去陽山不數里。乃往遊之。悲夫深煙古樹。亂草淒迷。一荒丘斷嶺已耳。烏識吳王之墓。歔歔而弔之也哉。乃相尋所謂大石者。則有一奇峰。傑然插天。與山上連下開。如一石橋。環于半天者。于是嗟異久之。日既將暮。復從壠故道而歸。嗟乎流連終日。竟不知勾踐所葬夫差之墓安在也。且微獨如此。據吳越春秋所載。公孫聖之事。亦莫得而考。則予固不能無恨焉。彼荒煙衰草間。泯滅古人最多。使非得之傳聞。亦孰從而道之也。況江山如故。風景依稀。死而有知。可勝感乎。故蘇來賢人志士。窮年兀兀。懷抱徒然。冀幸附于青雲。終有志而莫達。則憂愁悲憤。揮涕而終不能忘。若是者何也。誠以埋名巖穴。稱道無聞。後之人且有指爲與草木同朽者。深可悲耳。則其所感又當何如也。不然彼吳王以霸圖餘威。生非不赫赫也。今其遺跡猶且如此。而況士君子生當茲世。非有甚盛之業。求其永傳不亦難乎。興言及此。感慨係之矣。（卽此文知其胸中已鬱抑之甚。故宜觀死悲哉。）

序(一首)

嚼無子隱歸墟五山序(癸酉)

開期弟一日偶讀列子。有海名歸墟。中有五山。其上禽獸皆純縞。臺觀皆金玉。珠玕之樹叢生。隨潮波往還。不待暫時焉。甚愛之。乃戲曰。我仙矣。隱于此山。自稱爲嚼無子。余遂戲爲文序之。

蓋聞九州廣矣。披考輿圖。名山數千。大水數萬。或崇嶽而插天。或呀呷而崩日。其間百靈崇樓。蛟人構館。玉女窺牕。神仙岳棟。羽修之儔。往往而在。然而洛陽白社。世鮮吞石。積山秘室。人不知書。徒使湘山之樹。枉赭江濱。壇祠之雲。空浮白晝。逸想霞道。名拒丹臺。飛情煙衢。身乏朱翼。青牛遠逝。絕秦關之書。白鶴遐升。斷周王之轡。邀矣列子。御風杳然。化人登國。茲嚼無子。隱於歸墟五山。山在虛無間。洪濤盤石。嶮巖橫天。吞吐雲霓。蕩沃日月。龍羅駕湖。虎視嘯谷。溯彼往還。隨風上下。嚼無子居之。傲然肆志。子焉遁迹。蓬頭虎齒。王母峴崙之丘。羽蓋雲車。神人龍四之谷。佩青毛之節。乘白鹿之軒。玉女擁來。素娥飛下。欲同覓藥。已效餐瓊。還期碧玉。于凌波。卽見落霞于丹液。芙蓉城裏。自嚼琅菜之丹。白玉洞中。盡捲蛤蜊之食。余遊經北海。訪逾靈

山見處士之迎風。遇洪生而對弈。于是金母清歌。玉妃拂案。遺我瓊漿。贈我玉佩。翔乎翔乎。遊焉泳焉。既而御風而返。駕烟而還。回睇視之。不見其處。

### 祭亡姊瓊章文

### 祭亡姊昭齊文

二文已刻返生香齋言中茲不更贅

### 詩(七首)

### 秋日書懷

西風吹晚散庭槐。蘆葉叢中水急洄。滿臆愁餘聊磊落。半生情況獨徘徊。梧桐搖落悲芳草。楊柳摧殘恨碧苔。感念常懷不如意。煙光堪挹幾人來。

小庭積雨色空妍。獨坐閒齋倍悄然。蟋蟀風盈飄斷簡。蟪蛄露滿恨殘編。憑君意氣堪蕭索。從古賢豪半棄捐。回首自憐同學志。落花相與又經年。

### 憶兩姊卽寓自感之意

暮雨梨花共幾宵。半牕幽況轉無聊。可憐無限青衫恨。獨與思君淚雨消。傷心空自痛離羣。寂寞庭幃不見君。颯颯西風轉相泣。何堪情緒重紛紛。

感懷

人世悠悠難更清，疏風蕭瑟倍淒情。  
羞看壯志空回首，把酒臨風黯自驚。  
夜雨青燈照落梅，紗牕徙倚不勝哀。  
可憐篇簡空懷抱，惟有飛煙去復來。  
唾壺擊關恨何酬，搔首當天淚幾休。  
寥落此時柴閣外，暮雲秋雨盡淒愁。

# 百旻遺草附集

## 祭文

維崇禎八年二月二十有四日。汾湖葉仲子聲期夭卒。嚴命訃於崑山顧氏。泌園老人張世偉。顧之外祖父也。越月。以女絃矢志。將有嫁奩之舉。先五日壬戌。命仲男奔走慰略。次第始末爲文而告之。靈曰。嗟乎。世有情已至而義不足。以達其情者。欲哭則不敢。欲泣則近婦人。吾乃不圖。俠丈夫評量千古。絕躡斷腕不怪。而忽不能自解于身。有如今日。秀令夭折。屬吾眷姻。汾湖葉氏。吳江世望。乃祖乃父。皆名縉紳。惟爾仲子。有聲舞象。擇配得峴之顧也。式維其偷。顧張之自出。伊余視爾同諸孫之振振。往歲締盟。年方二六。踰七稔而六禮未成。實繇爾父貴而能貧。何意爾童子試之暫躓。遂令爾男兒氣之不伸。渣逝來訃。語粘于唇。慮聞之者。或悠悠如行路。或默默而痾心。而茲竟引爲分體之親。揜吭絕粒。裂眦毀巾。余自律頗峻。持物最平。不強人以情之所不出。而義之所可因。抑揚譬解。而終不易其口角之斷斷。余乃諭而外父以達于而翁曰。此事本身既苦。尊行倍辛。今爲母者。識女性之高明。不妨激裂。爲父者。酌禮經之中正。勉就從容。總不出從一之義。而余弟識之以德鄰。雖弱女子之矢志。似無益於夫君。而夫君更

不藉之泯。况爾資稟天授。文章有神。宜乎爲祖母父母之鍾愛。而是舉也。交游兄弟。且得攘臂而議曰。生者不愧。死者復生。不悔不必。俯斷地而仰呼。旻蓋純乎置情殉義。余亦得放聲長慟。不徒爲無疾之呻。嗚呼哀哉。

祭文

維崇禎乙亥二月廿四日。葉子聲期賢倩天卒。其外舅顧咸建。方以文事稽鹿城。三月初八日。始克馮棺一櫛。而中腸哽絕。不能成辭。越十七日丁卯。爰採江籬而酬之曰。痛乎。蘭玉摧折。一至於斯也。維子以運雲之霄。夢日之姿。旣媵修而練要。庶丹書價而青冥期。詎羣昆之鶴起。獨遭迴兮含悲。缺驥引步兮蟻封蹟之。千莫試鋒兮吹髮缺之。疾遂中乎膏肓。而扁跗不可醫。矧文戰之再迫。益維谷而莫支。氣怫鬱以煩冤兮。費幽恨以長辭。天乎痛哉。憶子委禽七年於茲。己巳之夏。先君子養痾郡邸。喜爲加餐。而拜脫於鄰居。余獲從謝庭。觀子之丰儀也。秀眉惠口。鼎角匿犀。余竊慶其爲家駒也。而媿松柏之附乎蒿藜。道子一再挾筴於胥江之涘也。余不獨觀子頭角。而深擊節於子之文詞。胡五色之眩目。乃明月而慙遺。惟余罹先君子之大戚。亦見擯於有司。余伯氏後先叔氏而北馳也。自嘲嘲子。冰玉清潤。固同其數奇。乃余頑鈍如昔。而子遂一蹶而不可復追。豈高明來鬼神之窺乎。抑弱息薄命灑掃之未宜。天乎痛哉。余稽鹿



城而弱息承訃於葑溪。尺帨是持。勺水不御。誓九死以借隨。尊親誨慰。從父之義。不妨透迤。泣不發言。而忍死以待余歸。余亟歸撫諭。謂節與烈而並垂。乃進溢米。僕然衰絰。拜夫子於繡幃。茲手錄祝詞。具述死生離合。焚諸几筵。子其冥知否耶。於戲。子之弃世。積德累仁。罔有或墮。固宜光前昌後。胡爲乎紛逢而百罹。方形管兮紀痛。更玉樓兮賦離。詹尹兮不可問。將擴恨兮訴誰。余搔首兮問天。曷其福所倚兮。詎此理之我欺。

又

崇禎八年歲次乙亥。三月十有七日丁卯。外舅顧咸建謹率筓女絃。祭告於罄期賢信之靈曰。於戲。生死離合。物理恆期。生也永訣。死也于歸。斷腸啼叫。墜羽參差。生者其悲。死者其怡。惟子委禽。余慚倚玉。七載之盟。百年以屬。方期翱翔。如日斯旭。云何昊天。降此大酷。於戲弱息曰絃。義取敬委。詎瞻文采。粗辨綱常。自承哀訃。絕粒扼吭。逝將下從。杳冥之鄉。內外尊親。誨慰哽咽。誼動慈孝。理剖節烈。強以溢米。泣爲引啜。甞勉一息。庶幾同穴。於戲匹婦之諒。九死不同。敦請尊章。惠許來歸。力疾忍性。拜子夜臺。生乖舉案。死酬一杯。於戲未亡。殘喘收累。游滿既見。君子。復我故里。惟余老婦。爲同臥起。謂余不信。昧雉彼視。於戲絃於元日。妖夢是徵。有斃其馬。當戶之庭。俄若化龍。模糊以騰。子生在午。殆兆遐登。仲春既望。更徵慘夢。夢先大夫。呼絃而憫。

撫摩其首。不言心痛。先靈頽頽。天乎奚控。計前丙夜。若扣我門。大聲者再。守犬狺狺。童奴驚起。既聞無人。神者告耶。其子游魂。計聞之後。或嘯於室。永矢靡他。厥聲遂息。累劫冤親。三生精魄。死如有知。今夕何夕。於戲子之諸昆。應繁其枝。尙爲立後。庶勿餒而幽明不隔。生死以之。千古一書。吁矣何悲。

祭文

崇禎八年二月二十四日。次子世僭卒。旋遭先太宜人。大變。蓼莪之哀。無以爲生。復何心。及此。今四月十四日。僭七盡矣。父子之情。又不能闕焉。苦由中勉。搜哀腸。口授兒輩。以告。僭曰。嗚呼。汝年十八。而遽歿耶。憶汝生之日。如昨耳。而已隔世。杳不可問耶。卽汝死之日。如昨耳。而已盈四十。又九日邪。霧煒荒荒。凝垠漠漠。風雨淒其。以黯黯景。光晦曠而蒼茫。爲汝感邪。爲汝淚邪。嗚呼痛哉。自汝亡後。卽欲週如生前情事。少寫哀思。而汝婦未歸汝。而來奔汝喪。汝祖母哭汝。又哭汝婦。而貽我以終天在疚。充充皇皇。形神惛惛。今稍詮次汝所以生。所以死。以告汝靈。嗚呼痛哉。我年二十五。甚愛商瞿。汝祖母舍飴未弄。尤切焦憾。越歲生汝兄。伶甫。生卽有眊篋之警。北堂慈顏。終愁如也。又越二載。生瓊章。又越二載。戊午生汝。汝與祖父實同年。如夜光出淵。靈根茁枝。以爲鍾祥。錫羨昌大。弓冶天祚。衰宗必汝焉藉。而汝又生而長。哲。頎然若削。

峻骨挺上。臙腫點漆。肌肉澤潔。背有一痣。圓周玄潤。端居正中。衛史伏者。或曰此異徵也。我亦爲然。私心竊喜。七歲就外塾。十三學操觚。文有汪洋一瀉之致。兼以傲睨無人之氣。每高足而闊步。必釣奇而棄常。十五出試。瀟灑自賞。風采韶秀。伏曼容之倜儻。眉目疏朗。張伯緒之爽發。我時率汝謁張。異度先生於泌園。李元禮高自標持。許子將世稱我鑒。見汝末坐。卽深器汝。而時命之謬郡試。致遣高靈蠟鬪。長風凋羽。終年顛頓。永日沈吟。悵悵胸懷。悠悠日月。我曲喻汝。泮芹闕藻。亦小事爾。何至困衡。汝對曰否。孰知汝口雖應我。而煩冤莫解。朝縈夕結。一至於斯。揆厥繇防。寧非鬱疹。嗚呼痛哉。誰生厲階。至今爲梗。維彼狂人。貪亂荼毒。人之無良。職盜爲寇。父子之讎。戴天豈共。嗚呼痛哉。癸酉之冬。雨雪霏塗。我攜汝姑試于橋李。庶或失此。傳彼。稍舒憤懣。雖雲山尺咫。川路非遙。而弟昆回首。不無歎愴。迨夫乍啓王正。卽驚驟疾。嘔血幾于數升。隕然殆乎不起。我與汝母。焚瘞莫擬。亟延名醫。窮功診療。爰暨春杪。霍然起色。方幸保于無虞。甘菓捐于進取。遂置禾城。還歸梓里。但求痊好。幾竭消摩。倘有南陽之菊水。詎惜金錢。未逢石上之萑蒲。暫錫痾瘳。於時父母兄弟。相聚之樂。而藁樞初榮。蓮蕙方茂。汝母忽嬰氣虛之疾。奄臥枕蓆。諸兒遶床。朝夕藥餌。汝亦在側。嘻然笑語。笑語宛在。猶可追憶。胡然形影。歛其查而。昔日委弊支離。而汝左汝右。今日康居無恙。而哭汝哀汝。念言忽忽。如往如存。庭花猶故。獨無汝。

矣。誰云八龍今焉七矣。嗚呼痛哉。既已母病漸平。汝體臻復。八月試于邑。九月試于郡。明月在天。黃花映日。方將爲汝歌采芣之章。青子矜之色。胡期疴瘍之響。發于耳後。癩疽之毒。延至春前。塗膏敷屑。湯瀉杙熨。悉惟汝母。手親澆滌。不敢惜勤瘁之勞。不忍畏潰腐之惡。治乎春仲。日以就夷。醫云弱症。受補卽無虞害。第須參朮。葆固真元。而參貴尤甚。逾于金玉。千途典質。百端賒貸。倘可延生。何辭枵腹。無論父母。罄懸臺乏。力殫神疲。卽二月十五日。汝猶自取頭上金簪。俾償參值。以此悲哀。哀可知矣。詎料參服未完。汝身已殞。賤與貧兼。命隨數盡。子淵蚤死。空留白馬吳門。（顏淵登太山望吳門。白馬時年十八）文考既亡。孰問靈光魯國。椎心叩天。踐血隕地。余何罪焉。羅斯異慘。嗚呼痛哉。原汝病根。繇發本以失意生愁。卽有金液銀丸。弗若駿圖之肆。益恨桃膠艾灸。莫傳鳳肺之壺。故自上元以後。日以試事憂皇。余心忡懼。不可弭戢。瞻門司隸。恆恐登遲。開館平津。更嗟來速。且因截截之言。誤聽萋萋之錦。俾我進退維谷。卻願徘徊。猶豫再三。勉爲決策。而事終弗濟。徒怨如簧。病歎彌留。瞑歸泉下。趙邪卿所云。有志無時。命也如何。乃如之人。爲鬼爲蜮。有靦面目。彼奚足惜。第汝死者。何年再還。雨絕雲歸。花落枝枯。逝壑東奔。靈曦西匿。骨肉分離。因緣斷滅。一日長辭。千秋永閉。嗚呼痛哉。汝自二月上岸。猶稱善儆。既望生魄。纔啜粥耳。顧自衡文檄下。憂心癩痒。每云喉痛。至此稍甚。醫家略用黃連以清心火。亦非誤投。

十九之夕。河魚腹疾。遂幾殆矣。廿一昏時。血症復發。我與汝母。涔涔相對。經年舊疾。此時陡熾。精神越渫。勢豈堪支。第恐汝知。致傷汝心。技拭淚痕。歡容對汝。汝兄世侄。率諸季幼。泣草情疏。額求伏覺。大帝各願。自減其所。受于天之物。祈續汝算。叫號哀懇。神聽漠然。豈以聰明正直。弗狗黃熊之祀。精爽英靈。立逝青燈之夢。我與汝母。額膝俱廬。有關可叩。遑恤我躬。而慘瘁劬勞。終難救藥。夜漏將分。奄然永訣。清眸炯矚。曾無亂容。呼汝二郎。隨聲響答。絨口捫舌。固汝素性。生也若斯。死焉如故。傲骨勁氣。將安往歟。嗚呼痛哉。我自乙丑通籍。宗族婦女。其子若弟。貧不克振者。我實希趙文子。生不交利之舉。登之薦剡。指可數也。而天之報施。殊不謂然。獨于我子。故加奇阨。以致戕生。大命殞墜。幾欲叩蒼而彌杳。恆思問天以無從。嗚呼痛哉。汝兄弟輩攻苦勤事。蕭然數椽。日共披誦。汝性不喜韻語。所好先秦兩漢。古人文詞。竊擬步武。私或構作。琴樽風月。山水登臨。夷然不屑之概。逸矣天際之想。我語汝母。此兒委骨不凡。英采或能似祖。豈期大數奄淪。九原草露。蚌車忽駕。遂傷李賀之生。鴟鳥集舍。卽隕賈生之涕。滿塔萱草。樓前孤冷。月之闕。一樹荆花。夜半叫殘春之雁。家門慘毒。酷禍焉追。嗚呼痛哉。汝年十二。爲汝締婚。岷山顯漢石女。文康公之曾孫女。張異度先生外孫女也。醴源茂于中外。芝彩昭于弈葉。降明星于玉女。探機石于天孫。霞蘿幸附。貧陋空慚。故百年方託。而六禮未成。維伊令淑。神惠挺生。參過

寤之明訓。稟絕人之曠識。一聞汝訃。誓死不二。絕粒扼吭。矢從冥漠。父母苦喻。僅免玉折。斬焉  
衰絰。來歸我室。執喪拜汝。執酒奠汝。爾時旁觀者。靡不悽酸悲感。不能仰視。況在二人。有不九  
迴摧裂者哉。嗚呼。汝之今日。無婦有婦。汝之異日。無子有子。汝氣雖散。不與灰燼偕燼。汝精雖  
徂。不與草木同朽。非藉竊窺。曷繇致此。霸城少婦。或飛繫絲之燕。潁川貞女。如留漬粉之書。固  
知奇節烈行。耀今燦古。第何咎何孽。而萃我兩門。娟然女子。稱未亡人。是日也。黑雲崩頽。疾雨  
噴注。屋瓦洶裂。楹礎砰激。一堂聚哭。如鬼羣嘯。天地幽晦。疑非人境。時三月十七日也。而適慘  
中致慘。變外生變。婦猶在堂。祖母先入。謀所以款汝婦者。徐俟汝婦之入。而欲一覲其明姿。令  
采以爲痛哀之慰。孰意填胸悲憤。攪傷肝隔。迷瘖忽升。頭目眩暈。亟扶摩拊。而猝起不測。何從  
碾餌。卽有神岐。焉能俄頃。卽有萬身。焉贖一息。晡時疾作。虞淵均矣。天乎人邪。禍至此歟。我年  
十一。汝祖蚤世。母子周旋。三十餘載。倖徵微祿。歸養五年。私謂遐齡可保。期頤必至。昊天不備。  
降此鞠誦。嗚呼痛哉。矧乃素無疾病。午猶匕箸。恐伊哲女。踰起艱勞。叮嚀至再。悽愴鳴泣。積哀  
已深。但化遽速。是皆繇汝。失我慈闈。怨汝恨汝。汝知否耶。汝若有知。依歸祖母。祖母愛汝。可以  
娛日。夜臺不寂。代我晨昏。嗚呼痛哉。汝則一死有四異焉。昔在丙寅。我以瓊章許字。張方伯公  
子甫及七載。我女芝焚。己巳之秋。我又爲汝締結顯盟。迨今亦七更寒暑。汝歌薤露。胡一嶼岳。

數符于七而婿不成婦。婿不成婦。未成婿者執升堂之禮。未成婦者矢靡慝之誓。其異一也。天官家言。人爲命域。吉凶定于干支。災祥應于年運。昔我哲齡。方行乙亥。運中巽君捐背。實戊午生。而今歲在乙亥。汝則夭折。汝之生年。故同乃祖。刑傷相準。祖孫同符。其異二也。汝不死則顯。女不以節顯。婦不歸則祖母不以哀死。有因有緣。有端有委。總以標俠烈之奇行。成家門之大事。蓼莪風木。感愴明發之思。柏舟髮鬢。式繫簡書之勒。死有重于泰山。汝則似之。其異三也。自汝殂歿。終朝哭汝。視焉淪形。聽焉寂響。聞之顧云。丙夜扣門。幽精嚙室。則汝魂魄固往彼邪。季春八日。汝岳翁來哭汝于總幃。招汝以迺些。指共姜之矢。定赴歸之期。則是夕。汝乃端旋。僮子睡者。咸起驚痛。若或椽屏。俄焉長歎。似汝病中呻吟。桑欬之聲。履蒸錯然。出戶適息。香殘舊館。仍返書生之魂。夢轉他鄉。無恨射聲之鬼。其異四也。遺文餘卷。觸目增哀。斷墨零香。嬰心生感。陪荒子真之跡。戶闌仲舒之帷。枝折嶧山之桐。心傷卷蘼之草。東門任誕。我則未能。西河貽譏。竊深自愧。寶盃無情。玄經有勸。康隕穹天。猿驚絕峽。嗚呼痛哉。語云。有奇福者必有奇禍。祖母七旬餘六。強固康寧。汝父涼德。愴然松菊。當茲北山靡盬之秋。獨有板輿色養之樂。三女爲榮。則孝儀家風。八子執祥。則朗陵品目。豈余斗筭所能。膺受天道。忌盈。斯言豈虛。故以掌中珠碎。膝下龍撫。風襲伊蒿。山窮陟屺。喪女之驚魂甫定。旋傷喪子。哭兒之啼血方斑。已悲哭母。陪

原跼高，但存髮白，柴心爨骨，惟有淚紅，嗚呼痛哉。汝母新喪，居廬讀禮，辯踊哀餘，恍惚及汝，欲見無繇，涕零曷已。苦蓋之間，口授汝兄與弟，隨時濡墨焚之告汝。汝性不飲，醢醢既陳，是必饗之。若平生歡筭，葢辛毒，概不進汝，倘或幽明不殊，仍須忍性攝疾，毋以父母而傷汝神。母以兄弟而瘁汝形。汝婦風儀，春月冰操，秋霜。毋以婦故而縈汝念。汝有祖母可依倚，大姊三姊可聚首也。嗚呼痛哉。

又

嗚呼汝姊瓊章，昭齊死，俱作餓口佛事。獨汝以祖母大故，哀毀皇追，未暇及汝。今五月六日，祖母七七期也。敦延法師，衍瑜伽義。汝與八弟附焉。四月十四日，我作文祭汝時，八弟方病。汝幽冥中亦未知我又遭此慘也。十六日八弟殤亡，今又二十一日矣。我祭汝文云：誰云八龍，今焉七矣。七又亡一，能不悲哉。汝兄諸弟，在祖母靈帷前朝夕執事，獨不見汝。常疑汝在病中，恐不勝答拜跼起之勞，而嗚嗚一聲，又未嘗不疑爲八弟哭也。方今葵花盈庭，萱草繞砌，蘭蕙馥郁，以生香。蕙枝婀娜，而挺綠。獨汝長辭人世，閨然一棺，壯志雄心，愁思悶想，盡付之荒煙蔓草。爐冷塵銷，紅淚飄殘，猶作倚閭之望。清閨夢斷，空鎖化石之魂。舊硯生苔，遺書繫網，紙窗晝寂，鬼火夜寒。嗚呼痛哉。汝素有傲性，待諸季弟，時有不可犯之色。今八弟依汝，汝慎勿然朝餐。



暮癡。幸善視之。棗栗之類。供諸儿上。亦時時分與之也。八弟未能識字。汝可語以父母之意。相見無期。淚痕在袖。重還何日。腸寸如絲而已。

### 祭弟聲期文

葉世佳

嗚呼聲期。與爾同生。恩篤情結。願言卒歲。攜手黃髮。嗟我人斯。胡然忽歿。芝焚玉折。骨肉離查。痛難言矣。傷如何矣。爾年十八。爾志甫壯。有何罪惡。遂至于死。死亦一耳。慘則萬狀。風哭雲愁。霜淒露冷。泣斷猿腸。淚殘鷓血。嗚呼痛哉。自爾亡後。兄弟無聊。一室悄然。半窗寂寞。有思必悼。靡感不傷。矯首悲風。徒空涕隕。舉頭杲日。長與恨綿。猶憶少時。爭花弄草。嬉笑紛然。長就外塾。稍識詩書。未嘗一日離也。又幸雁行多序。私竊自喜。凡今之人。莫如兄弟。少幸敦睦。長克天倫。身慚至行。匪同共被之風。家雖小康。實有易衣之事。故嘗相與語曰。古人稱兄弟猶手足也。世風澆薄。視同路人。三復在原。深可惋惻。夫孝子所以事其親。不敢自謂盡也。庶能勉于兄弟。或無忝于父母。我二三人。期共勗之。乃一世未終。千秋永絕。昔時憂喜。自分同懷。今日存亡。忽焉異路。嗚呼痛哉。辛未之春。余就試失志。慙慙胸臆。報願見人。獨坐帳中。私爲淚落。爾適見之。慷慨歔歔。掩而相泣。此時余忽忘我之慘。而重感爾之情。益相對泣下。旁觀諸弟。亦復泫然。因念落寞之中。同氣逾重。窮愁想依。貧賤想卹。惟有兄弟。莫能易已。何生聚之不長。乃死別之

太速。既長者之若此。寧速者之忽言。四鳥乍分。空怨恆山之翼。三荆忽萎。徒傷田氏之枝。未聽白曲。衫袖幾乾。有但羊碑。淚痕空墮。嗚呼痛哉。壬申秋杪。余偕爾及威。期同試。我二人倖售。獨遺失爾。先擠郡理。爾遂鬱鬱。以斯成疾。良工懷寶。蚤掩泣于荆山。逐客幽愁。終愴神于湘水。膏肓之入。已深。鍼石之攻。弗效。一領青衫。不能消受。終焉飲恨。竟于歿身。天乎。人邪。命也。何如。昔我阮途之慟。爾共傷心。今爾楚些之招。我空回首。廢其泣矣。嗟何及矣。我祖我父。世以宦貧。家無幾室。屋止數椽。諸人相聚。共一斗室。黃昏夜雨。夏簾冬缸。商摧古今。諠浪笑傲。情誼何如。樂可知也。故凡語言議論。必以相質。爾爲子期。知我尤甚。及爾病時。心常憂鬱。終朝抱悶。余曰。憂悶所以致疾也。澹然寧心。自當枚生之發耳。父母爲爾病。日夕焦勞。爾豈不知。且吾輩所以處兄弟者何如。抑反以疾貽父母憂乎。爾喟然曰。我固知之。但情況實不堪。雖力遣其奈。終作惡何。余固知爾愁懷縈結。不能矯強忘情也。孰意遽有斯慘乎。一枝先折。年年雪涕于棠花。人字不成。夜夜迴腸于雁影。憂愁非一半相妨。風雨共百端交集。剩殘編于北榻。棄斷簡于西窗。空遺子敬之琴。獨有士衡之論。寓目觸懷。人亡物在。昔年秋風木落。幾度歲華。今宵暮雨花梢。永悲長夜。嗚呼痛哉。客歲冬間。余外父首宿春穀。余往就彼。爾恨夫途之修也。語三弟曰。吾輩久聚。未經離別。乃一室分袂。自今日始。病裏愁懷。情復淒然。嗚呼斯言也。其有聞之不墮淚者。

乎。故余羈身在外。念家中父母康寧。諸弟安好。不更繫懷。獨爾抱病在身。未能全瘳。每一念及。未嘗不快怏然。與故鄉之思俱黯也。乃余以孟春二十四日抵家。與爾相聚僅一月耳。遽生此變。何其不測。一至此哉。昔日之別。聚晤可期。今日之別。永世不再。痛心辭標。奚復加矣。爾自去年秋冬以來。因耳後之毒。受諸楚苦。故焦心日甚。及余從陵陽歸。爾因別久見余歸。有喜色。語諸弟曰。昔與大兄別。今復握手矣。日月固甚速耳。嗚呼。言猶在耳。已作隔世之人。肉尙未寒。遽失生前之面。半世恩情。高山俱邈。一堂歡笑。流水無期。嗚呼痛哉。爾之死日。實無生理。治瘡靡效。返魂無術。已知人事之必不可爲。庶幾天心之或猶可控。余泣謂諸弟曰。兄弟八人。忽遭斯戚。死生榮辱。相期永終。今何如也。與其有一人死。我無以生爲。若獲俱生。長貧賤以終身。幸也。我家敬禮壽亭關侯。精虔供養。非伊一日。叩之必俾報焉。誓當移七人之物。益此殘生。于是諸弟皆泣。咸以爲然。敬書一疏。焚告帝靈。同心灑血。碎首赫濯之前。叩罪焚香。替魂塔壘之下。豈意德威高遠。不矜隕孽之悲。神化幽玄。莫鑒如刻之慘。悲夫。至于人力竭矣。天不佑矣。當此之時。見爾奄然在床。一命垂絕。救爾不能。代爾不得。撫手足以叮嚀。忍柔腸而泣別。謂冥數之難逃。遂聽爾之永訣。嗚呼痛哉。已矣不復言矣。對森庭之玉樹。睹當戶之崇蘭。悲絕塞之離鴻。愴高天之孤鶩。悽風篔之夏夏。搖露柳之飄飄。傷彼岡之不瞻。歎池塘之徒夢。怨樓前之花萼。恥

家食之茹蔬。念與爾之相失。知再會之何時。嗚呼痛哉。感當死後。憶在生前。雖幽明之已隔。豈情念之有殊。離別之悲。爾豈不然。生既鬱鬱而死。死後萬勿泣望故園。復作黃泉斷腸魂也。嗚呼痛哉。

祭亡兄聲期文

葉世倅

二兄聲期卒。余兄弟形神荒昧。魂魄靡歸。又遭祖母之變。遷延多日。始得草文陳情。灑淚以告於二兄之靈曰。嗚呼。日月倏逝。川流莫停。一爾過隙。永歸長夜。天分比翼之鳥。地折連理之枝。芝枯玉隕。傷如之何。憶余兄弟同居同處。十有餘年。附同枕之風。篤共衣之義。聚首日久。恩愛最深。一朝隔斷。萬古慘愁。日悽悽而光寒。天黯黯而色苦。風蕭蕭而悲號。雲漫漫而惜楚。嗚呼痛哉。自兄亡後。生前手澤。觸目增哀。舊時風景。嬰心致痛。悼飛雁之中斷。不復成行。羨八龍之並躍。忽蹶其一。音容未杳。離骨精于天涯。笑貌猶存。隔悲歡于泉路。水閣山高。愁其何極。天長地久。恨與俱深。嗚呼痛哉。憶自初生。扶床學語。時大兄稍已成立。則飲食嬉笑。朝夕相與。者惟兄。佩飾蘭麝。騎跨竹馬。分花弄草。靡不相隨。暨及稍長。無不同几披誦。一席吁吟。迄今十有七年。竊幸瓊芳惠茂。蘭發玉輝。鸞龍多序。幸同鄂鞶。壺籠共鳴。上僭伯仲。心愉貌和。氣宇神洽。雖或僭色一時。曾何介意。發言三倒。靡不怡顏。友于何如。忍至此哉。彩雲飛散。玉樹摧萎。蕭

齋費鎖空悲子敬人琴。泉扃夜遙。不復西陵亭館。裂肝腸而寸斷。誰爲百贖其身。瀉血淚以長枯。奚是再逢之地。是以並巢之鳥。悲其離翼。同樹之葉。怨其分枝。物猶如此。人豈無情。矧在恩爲手足。義著友恭。幼則垂髫。老同白首。此于世間。亦爲恆事。何獨于今。罹茲劇慘。姊喪兄亡。不一而再。昔年夜被。猶存共臥之痕。今日晨蔬。已絕並加之箸。果使蓬萊有藥。何返魂之術。弗傳。卽令華表可歸。恐化鶴之年難必。嗚呼痛哉。去年冬初。大兄往赴南陵。余兄弟依依言別。執手難留。乘芳草而繾綣。折楊柳以低徊。雖歸期伊爾。會晤有期。然六百里之遙。二三月之隔。自生及長。無此遠別。興言及此。離別之情。未嘗不與雲山之邈俱修也。嗚呼生離若此。死別何如。卽此一言。寧忍復憶。雖父母恩深。弟兄情重。塵緣旣斷。頃刻難留。華亭杳杳。永無黃犬之書。易水蕭蕭。奚啻白衣之送。烟雨淒愁。氛埃黯結。嗚呼痛哉。晝荒荒而難暮。夜杳杳而彌長。氣鬱鬱而奚伸。恨茫茫而時極。一時懷想。卽欲呼兄。幾度相忘。恍如喚弟。聽孤雁之哀鳴。斷腸奚挽。愴幽鶻之獨叫。滴淚空絲。嗚呼痛哉。嘗憶花時酒候。月下風前。凡諸兄弟。咸共追隨。笑語紛然。曾無異議。或談往古。評品當今。詎期一旦。忽焉至此。卽是魂魄來歸。猶然笑傲。終于幽明旣隔。奚聆言辭。空餘蠟燭。長想火攻之時。豈爲豆根。有似釜煎之泣。嗚呼痛哉。倘當陰風夜雨。淡月斜昏。余兄弟促膝共坐。則詠歌可以怡顏。高談可以快志。雖雨閣風愁。一時俱盡。倘有一人他出。則

半室蕭然。遂覺無聊。雖大丈夫志在四方。必不以數日之別。結愴關河。然同氣愛深。于斯可見。矧以死生之別。無涯之痛。兄獨不念數年相與。一旦長捐。昊天罔極。何繇圖報。生日劬勞。死時悲勸。兄若有情。寧忍忘之。半生之聚首長辭。數載之深情竟遠。重泉漠漠。徒看繡帷長夜悠悠。空歌薤露。嗚呼痛哉。方兄寢疾在床。父母百計營求。奏和不效。趙鵲無靈。固知膏肓之疾。藥石難攻。猶冀天道常存。神明必佑。故惟向伏魔大帝懇哀祈祝。上自父母。下及幼弟。叩首泣血。額膝盡裂。帝閭可叩。敢愛此身。詎意靈神不援。終于銷骨。一日分離。千秋永訣。豈前生罪大惡極。雖神施莫可挽回。抑心力微賤。舉念不誠。不足以感蒼顛歟。何求之甚懇。而聽之漠然也。自今以後。空房無響。穰桶生塵。玉笈牙籤。惟餘圖史。舊几石硯。空伴詩書。月明猶照欄前。幽魂何處。鳥啼日來。花下握手。誰看窗花寂寂。王孝伯黍離之哀。庭樹蒼蒼。曹子建山丘之痛。我兄弟輩朝焉此室。則朝焉嗚咽。夕焉此室。則夕焉懨懨。歲月有時易也。感悼何時歇也。嗚呼痛哉。且祖母拊膺大慟。一疾遽亡。八弟忽患痢風。又傷徂謝。我之遭逢。亦云苛矣。兄則庶依祖母之傍。或免孤棲之苦。誰其伴侶。卽八弟否。大姊三姊。曾相見否。龍華會上。證入有期。幸惟自愛。勿以爲念。嗚呼。居兀兀而不安。行忽忽以何之。心茫茫而無主。神黯黯以目疑。寫心中之鬱結。陳數載之微情。寄悲貨于一日。托怨恨于生平。庶望異世可逢。尙識鮑觀之井。來生不昧。卽同羊祐之

環。嗚呼痛哉。

### 祭亡兄聲期文

葉世侗

崇禎八年二月二十四日二兄聲期卒。余兄弟肝腸寸斷。痛恨填盈。殊不欲生。弟世侗流涕銜哀。聊寫平日之情。以敬告于兄靈曰。嗚呼。人生自古。誰無死喪。兄弟分離。手足拆散。則古記載間亦往往有之。然白髮黃耆。期頽衰老。而死分也。生多疾病。槁形枯骨。哭亡之慘。時時慮之。俄而死焉。亦夫人所常也。卽少年壯志。猝然殤斲。或兄弟間友愛微有疏闊。則亦未至于慘極也。未有如今日者矣。嗚呼二兄。昔我昆弟。如鸞如龍。既幸多序。且欣敦睦。胡然朝露。忽焉往逝。雁行中斷。棠蔭摧折。日月銷光。山川崩裂。數年相與。一旦長離。半生手足。千秋永訣。楊津之參問已矣。伯康之事保難再。痛何所極。恨何所止。悲夫。容顏猶昨。笑語如存。而已杳不可得。而一見矣。嗚呼痛哉。想夫弟自有生以來。何曾與兄一日相離也。分梨競粟。喧花弄竹。與夫事師從學。披几誦讀。劇談謔論。扼腕抵掌。追遡古昔。慷慨今時。何有別室。靡不同席。或有一人。往彼異處。偶然目中。此時不見。無不馳神。卽爲尋想。義存友于。形亡爾我。庶期李充之居實。同姜肱之被。乃相悅。幾時而永別。所促生惜一時之異處。死容千載之隔世乎。悠悠蒼天。曷其有極。嗚呼痛哉。平日父母。常有分與。或祖傳書典。或隨常器什。諸如紙筆刀礪之屬。各人分有。吾二三

人必更共之。至若所分諸物。或始屬一人。後又屬一人。如此者甚多。父母見之。則曰汝輩不常情。何數數換易乃爾邪。我諸人則私相語曰。雖父母之訓。不敢不遵。然此正吾兄弟所謂形亡爾我者也。陰慶雅居。何待封侯。薛包讓業。素同敦行。追往年之同志。自可娛情。念今日之離懷。何堪銷骨。哭斷寒猿之腸。淚灑昏鴉之血。嗚呼痛哉。想我兄自壬申之試。別足而歸。大兄三兄。既採泮苑。遂時或同出。而起居朝夕。依依相對者。惟弟與兄而已矣。兄自擬垂天。暫悲搶地。眉案橫愁。心懷鬱結。雖弟介諸旁觀。每亦爲之歛歔動容。此固飲恨不能已者也。然亦謂日月易逝。少俟異日。爰賦子矜。抑鬱之懷。遂茲消矣。執意卽以此而殞其生乎。長揚未賦。可憐九地黃泉。靈光不存。孰問千秋白日。嗚呼痛哉。自兄亡後。靡不傷心。物是人非。觸目慘象。階前細草。空自菲芳。檻外名花。徒然絢爛。庭室如故。相聚依然。痛一雁之孤飛。傷二鳥之異域。遺簡有荒烟聚散。舊床惟嗥鼠去來。卽此室中。幾年攜手。促席同聽。而今已矣。一至此矣。憶余兄弟。閒談暇論。各言胸志。兄必高談闊論之議。雄吐得意之懷。倘或後日。吾諸兄弟。倖微風雲。叨獲尺寸。念荼萸之淚。想原陽之哀。是使我一生無解顏之時。而百年皆隕涕之場矣。嗚呼痛哉。吾兄弟又每觀山水賦記。靡不神游。慷慨則言曰。爲人一世。不遍游名山。曠覽大水。非夫也。因寓辭兄。隱羅浮。三兄隱崑崙。弟居岱輿。今乎我兄。忽焉焉往。豈子晉乘鶴。遂登緱氏之嶺。初平牧羊。先



入金華之室。兄其往羅浮也邪。縱雲霞可以徜徉。何恩情遽能斷割。爾之身與吾之淚俱如絲。然飄搖在天地間而已。然吾兄棄世以後。舊時書室。忽聞啓牕之聲。急往視之。寂然無人。又夜扉掩閉。明早視之。答櫓落地。門闌洞開。遍訪諸人。各不知識。則兄又依然在聚乎。數年連袂。俟杳隔于夢境。幾載面對。徒恍惚以神交。嗚呼痛哉。念吾兄生前。姿度俊爽。長身挺立。力能舉重。而以弱疾死。是可信邪。不可信邪。或者我兄弟輩文章議論。過自高矜。元非星聚。每云荀氏之龍。何常齊聖。必謂高陽之橙。天道忌滿。鬼神害盈。故兄亡之後。又殤八弟。荼毒之酷。乃自招歟。每一念至。肝腸俱碎。斷玠之百端。茫然交集。子猶之一慟。恆爾欲絕。庶將閻羅老子。斬其頭而焚其居。玄穹上帝。披其庭而數其罪。然後可以消此恨乎。嗚呼痛哉。

### 週年祭文

葉天寥

崇禎丙子二月二十四日。父告於僞曰。嗚呼痛哉。風帆細雨。孤舟亂烟。天涯腸斷。游子魂牽。我從吳山。載言遊旋。歸來庭戶。花飛草芊。寥寥總帷。汝又暮年。傷心慘目。淚盈流泉。嗚呼痛兒。汝生十八。豈云易焉。悠悠日月。恩情萬千。一朝歇絕。滔隨逝川。餘衣棄履。剩墨殘篇。但留愴惻。空委悽憐。幾回摧裂。無繇問天。嗚呼痛哉。有汝母在。悲哀共恤。母今又亡。我如旅客。母也殞命。實傷愛感。念言春期。鞠凶紛螫。自謂人生。必無再厄。忽焉隔嬰。莫延昕夕。歎爾徂淪。天崩地

坼。嗚呼痛哉。蕭然一身。徘徊故棲。哭汝哀汝。鵲紅獨啼。汝辭母去。半載方奇。泐師告我。山中見之。子母相見。云胡不夷。汝則有母。生者何依。母見汝面。是否漣滴。嗚呼痛哉。汝之貞配。矢死靡他。精嚴梵行。習修三摩。虔誦法典。保汝冥祠。汝於九原。猶沐慈波。嗚呼痛哉。汝學古文。亦有韻語。手跡猶新。人今何許。我簡遺篇。泣涕如雨。寸管斑痕。含哀草序。汝母奄謝。悲慘無緒。今因母集。汝偕並舉。寸紙精靈。誰歎鼎呂。庶完汝念。沈浮聽與。嗚呼痛哉。去年亡日。寒日逾三。今年週日。榆火未鑽。碧桃旖旎。燕子喃呢。荆花偏茂。砌草尤藍。室無母矣。空庭畫簾。兒無汝矣。兄弟巾帶。景光宛昨。憂思焚煖。愴再見以無日。恨長鎖而奚堪。望幽魂之不返。哀瘦信於江南。情況恆乎永晝。淚浸淫其滿衫。嗚呼痛哉。

兩邑申文

一

蘇州府吳江縣儒學廩增附生員等呈爲儒童因試殞生。笄女聞訃矢節。懇乞申請學院。俯賜附學虛名。以鼓士風。以慰幽貞事。竊惟志士才人。功名最急。貞妻烈女。今古並稱。故閨門爲風化之原。而學宮爲激揚之地。立名立節。威競出於青衫。或升或沉。忽齋志於黃土。如今春宗師較士之日。有儒童葉世僑之就試以死。而笄女顧氏之聞訃欲殉者。世僑係葉工部紹袁

次子秉心既慧。誦習尤勤。雖當舞象之年。已奮攀龍之志。遂扶病以強入院試。詎嘔心而卽殞。其生臨終永訣之言。猶恥齊民爲伍。貞女奔喪之泣。亦憐泮水無名。今顧氏幾次投繯。已甘毀面。永矢靡慝。足媿貞風。是以司空悼亡。欲題片石爲諸生之墓。況且弱年勵節。願附銘旌爲文學之妻。謹按顧氏係文康公之福孫。忠孝宗風。女子亦鍾其異。表閭他日。朝廷必錄其真。哀此穉嫠。堪扶頹俗。計日卹葉生之死。無如薦以芹藻。慰顧女之生。可令夢斷鱣堂。伏乞備具情節。上申學院。懇將葉世儒批附空名。於入學案驗之末。不惟葉生修文地下。亦知死後名列膠庠。且俾顧女守志空幃。可爲異日表揚增重。輿情甚慰。風教尤彰。隨蒙吳江縣知縣章參。看得葉世儒藝林夙慧之英。松陵後來之俊。弱不好弄。經史之腹便便。業蚤成家。雲霞之管鑿。兼之孝義性生。風雅閑集。讀祖父書。亦世其德。勵賈終止。思用其才。所以勺舞乍離。咸推祭酒。玉摧既泣。尤惜遺珠。顧氏盟柏舟而靡他。女貞難於婦節。痛子矜之未售。死被庶卹。卽生榮。夫章甫縫掖之服。何死何生。總取其表俗。且志士烈女之心。一生一死。均足以動天。則夫迫腳鬢序之員。寵以茂才之號。使未能進之一步。聊以解憂。既可借輝芸案。庶不誠面之兩壘。突而欣慶。亦可永砥柏舟。此追亡念存之苦心。亦旌良慰烈之創局。比木天贈孝廉之例。與緣義起。乞芹香積。賸志之膏。情至理彰者也。申蒙學院倪批。閱詳令人心惻。傷哉。一領青衫。遂足爲續。

命之膏乎。黃爲名死。氏甘節殉。名節二字。雙嫩競美。故錫以茂才之號。該縣所謂典緣義起。情至理彰。確乎其言之矣。更見衣冠名器。生憤而沒寧。若此仰縣遵行具錄。繳

二

蘇州府崑山縣儒學廩附生員等。呈爲奇貞永矢。齋志未酬。懇恩申請優異。以候題旌。以勵風教事。竊惟學宮廣厲。義與節並崇。閨門化基。貞與烈兼重。矧以從父之年。而誓守殉夫之志。以慷慨之操。而勉就從容之圖。夫也。嘔心於子矜。女也。扼腕於婦道。非隆異數。曷闡幽光。伏見本邑顧氏。係庠生顧咸建室女。許字吳江葉工部紹袁。次于世。稱幼廩端凝。長閑訓迪。甫當二八之齒。未結九十之儀。屬夫世。以癸酉府試見遺成疾。乙亥力疾就試致殞。氏聞訃。遽已投纆。遂爾絕粒。家人環救。曉譬百方。泣不發一言。噤不受勺水。諭以在室者。應體孝慈。則謂古貞烈。誰無父母。凡歷五日。殆餘一息矣。咸建痛其之生。致死許以之死。靡他。始勉沾唇。默若領首。乃扶掖起立。躑躅于歸。衰絰而拜尊章。髮髻如見君子。天未悔禍。踵避閔凶。儼然膚立而笄。殷殷牆壞而俯踊。病克成禮。毀幾傷生。凡在見聞。無不嗟悼。於是殘喘雖已。僅屬而食息不復。猶人首如飛蓬。欲追秀面之勇。日一溢米。僅免滅性之傷。惟屏居而臥病。或吞聲而禱誦。夏日冬夜。時作同穴之觀。一息百年。祇聽在天之數。斯誠國家瑞氣所壘。而亦文康世德所貽。永

勳貞貞。可風末俗者也。方今聖化清明，首崇風教。若顧氏貞節，迥越應蒙踰格題旌。卽商例未符，尤冀立時獎異。除葉世儒現蒙吳江縣另文申請附學外，伏乞下採輿情，曲成苦節。申請學堂准批行縣，將顧氏俯賜優獎，候題特旌。近伸摩厲，足增東序之光。遠備褒揚，益增南國之化。世道幸甚，士心幸甚。隨蒙崑山縣知縣葉參，看得兒女初沒名聞，未免更絃死當，還陰少婦或能著操，乃顧氏甫笄而字，遂堅以貞一死殉夫者，其氣憤餘生，猶視聽人間，終身酬志者，其節艱至性已倡，隨泉下他年合卷，惟望夜臺。此日飲冰，空悲蘭室。善先應卜善後，成始預識。成終儻徽憲策之標，留待彤管之拾。緣係貞節事，理擬合請詳爲此。今將前縣合行具申，伏乞照詳。示下遵奉施行。申蒙學院倪批：顧氏貞節可風，准入憲網獎勸。繳崑山縣爲仰體宸衷等事。蒙本府推官劉信稟內據崑山縣申送生員某等公舉節婦顧氏行實前來。內稱：先經吳江縣已申學院批示訖，繼而各生呈舉到縣，亦經申蒙批開云云。據此，查得既經兩縣申明，何不於前送節孝冊內遣入，其原行詳卷，合行弔查。爲此，票仰該縣卽將原呈顧氏緣絲，並取該學結狀，刻期申送覆確，以憑入冊。類報施行。等因。遵依行准儒學牒開帖仰廖增附生員等查勘得顧氏係本學生員顧咸建之室女，崇禎二年許字吳江縣葉工部之次子世儒。崇禎八年二月世儒因試病故，氏已投繯自盡。家人驚救獲甦，五日不飲不言，九死應他靡慰。父難

慈視許守志以全生女乃勉從愛忍死而甘節遂於是年三月力疾衰經隻影于歸踵權北堂之喪垂絕壞牆者再日臥痾於一室足無踰閭之蹤僅延息以薄糜時切同穴之想蓋殉夫者其本願烈以克貞而從父者其苦思孝以成節斯誠天挺之正氣仰繇風教之嘉徵允宜褒揚以彰異數等情結呈到學該本學署教諭舉人霍同訓導（報周）參看得顧氏闡閭弱姿柏舟壯志扼吭絕粒已慷慨而殉夫扶掖于歸乃踴勉而從父孝慈之誼勉著節烈之操克兼死而僅生膚立自將猶成笄髮之禮生而如死糜汁度日求遂旦暮之思視昔截髮斷臂之勇罕在三星未爨之初年卽彼懷清石節之褒惟此兩髮方髡之稚質稽諸往牒實罕前聞本朝惟文懿章公之母未嫁守志卒無姪以成大儒勝國僅平江趙子之妻許婚聞訃誓養親以矢永節而蕞爾峴邑兩見其奇顧絳之母王已繳旌典世儔之妻顧允偃輿情敢曰庠序之作人實惟朝廷之廣厲宜隆異數以闡奇貞等因備牒到縣覆勘無異該本縣知縣葉參看得

云云（同前詳院參詳）

## 秦齋怨小引

蓋嘗肝覽今古。緬思往昔。若將想見其人者。宋蘇忠文公。擬名書室曰蘇齋。已竊念青  
青一子。於未知稅駕何日。輒欲追步子瞻。不幾捨榆枋者。希垂天之飛乎。低徊焉弗敢者久之。  
去年天台。泐師降蹕。余家。余叩問。往世因緣。師云。在宋爲太虛秦觀。余心獨私自喜也。生平讀  
東坡書。如歐陽率更。坐臥索靖碑下。不能去。夢寐中。幾欲一恍惚之不可得。而前生。適獲與魯  
直。晁張。追隨於琴樽杖履之間。且甚久。人至。侈稱之爲蘇門四學士之一也。豈不幸哉。遂名室  
曰秦齋。於時秋也。貧之苦。秋爲甚。悲秋之辯。亦曰。貧士失職而志不平。婦又臥痾。藥餌所需。簪  
裾之屬。靡子遺矣。愁眉相對。聊以韻語自遣耳。故作贈婦貧病詩。亡何。遭苟奉倩之傷。又作悼  
亡詩十韻。不止。而又百首。悲秋未已。而又哀春。孔子曰。貧而無怨難。貧而無怨。猶且難之。又況  
於死喪之戚。其能無撫膺而太息歟。故貧病怨之始也。悼亡怨之終也。總名怨云。

崇禎丙子仲春三日天窻葉紹袁題





# 秦齋怨

吳江 天寥道人葉紹袁 撰

## 乙亥秋日贈婦貧病詩十首

獸歲夾鐘應律。亡我次兒。兒配未婚。矢誓靡慝。天桃將華。標梅未暨。遠歌汎柏之舟。言駕秣薪之馬。人孰無心。不傷斯感。北堂一慟。南暉掩芒。啜其泣矣。何嗟及矣。旋又孩抱。幼子。催芽。阻苗。迭遭異變。境會慘毒。內人因嬰。嘔血之疾。防於徂暑。爰發仲秋。子焉在床。蕭然斗室。寂寥屏視。感百其憂。而適藥餌所需。非參罔效。貧士辦此。苦逾餐藥。德耀之釵。柴荆。少君之裳。短布業已費去。未遂霍然。詠閉門高枕之詩。但嗟肺病。誦萬族孤雲之句。祇切憂貧。况夫秋風最悲。愁人善鬱。霜花照雨。白酒澆燈。露葉啼風。紅蕪入幙。無聊之中。漫廣前韻。(癸酉有貧病詩)彥先贈婦。無假平原之篇。徐俳與內。匪待青陽之想。稍以消遣。病懷。排釋貧况也。

柴門似似北門貧。碧簫寒香銷病身。却怪病如秋塞雁。直教貧泣織綸人。龍丘煙壑貧園

士鹿洞書床病女臣。回首昔年貧病日。蓼風葭月一籠新。

燕子憐人病也飛。紫花貧發舊荆扉。貧無仙藥成黃白。病有禪那證是非。好待病康須戒  
臘。漫隨貧活莫生違。西風一夜貧窗雨。疏箔先應掩病幃。

阮郎貧夢碧山重。病裏靈丸恨未逢。團扇篋塵封病月。流黃機澁鬧貧蛩。辭貧桐葉飄乾  
井。惜病菱花想舊容。正是病貧心似結。藕塘初落白芙蓉。

巧將婦病更貧予。風雨瀟瀟一敝居。寶錦夜涼貧未織。秦釵人在病無書。神丹病寶三年  
艾。爾曲貧厓九月樗。貧促羅衾今夜薄。莫教病狎素屏虛。

林下清貧道蘊家。因風飛絮病交加。病縫芟服同中隱。貧搗莫稜攝有涯。絡緯梭貧霜漸  
滑。芭蕉心病月方賒。紫蕭病後無消息。且耐餘貧看菊花。

感病眠愁故不消。窮秋貧語怨聊聊。瓶花供笑貧相慰。本草尋方病益饒。病緘衣箱拋銷  
繡。(亡兒)貧留裙纒賣香燒。(亡女)卿卿莫更傷情事。貧病誰憐此一宵。

箔房凍紙弄貧涼。布幙猶嫌病怯當。竟爽煮湯聊病暇。茶壺添火卽貧忙。消貧幸有兒詩  
句。診病須推脈躡陽。總爲病貧縈悶緒。碧煙白霧兩蒼茫。

病崇緣多日日生。粧臺貧似一錢輕。樟梳膩襖貧奩淨。松枕脂香病影清。病向傷心存瘦

骨貧因知命破愁城。少君故自甘貧隱。病甚空慚鮑子全。

嘗將涕淚葛衫侵。貧屋淒涼慘病陰。去歲病連今歲發。今秋貧續去秋深。貧追護背巖空恥。病摘蘭芽夢不尋。卿病我貧人莫笑。古來貧病幾堪禁。

貧悶年年悶不休。病來更莫逾今秋。元因病劇憎貧苦。益軫貧窮起病愁。卻病色空俱渺渺。長貧仁義但悠悠。慘悽自昔傷秋月。惆悵孤雲水上浮。

內人病甚未卽起色。藥餌看視之暇。爲兒輩點定房本。都成悶况。鬱鬱掩卷。又復情緒索然。庶幾愁吟可以解之。再作代答十首。亦當枚生之發也。

三十年來總是貧。嫁時衣賣病隨身。嘗嗟病境傷前事。獨閉貧圍對古人。貧裏光陰歸子女。病中圭匕按君臣。無端一病添貧惡。齒莖開殘稻黍新。

病比銀床病葉飛。蓄廬貧掩薜蘿扉。貧誇知己常親慣。病愛依人不解非。悲愴近來因病遣。心情強半爲貧違。如君貧室真堪幾。况復淒然侶病幃。

雙眉綠鎖黛痕重。自怨貧中病忽逢。昨夜病魂憐瘦鶴。今朝貧氣滿秋蛩。十年宦海稱貧士。八月宮湖鑑病容。我病欲慚黃菊影。君貧豈礙集芙蓉。

芙蓉貧情正如子。寥落秋風病獨居。師泐肯垂回病訣。女清可有療貧書。貧慳雨露空甘

齋病飽風霜自由。不忿朝來聞喜鵲。病魔貧鬼幾時虛。

病噓椽壺問鄰家。貧累相牽悶轉加。自有愁腸貧伴侶。至今淚眼病生涯。藥鎗病煮黃金貴。米飯貧炊白玉賒。莫訝貧齋最蕭索。病餘還剩一庭花。

盈盈秋色綴貧消。紙帳流光病不聊。病韻漫拈蒸筱印。貧心遠映石泉饒。安貧苦節從儒受。被病靈符拜佛燒。但願病今旋釋去。與君貧夜卽良宵。

西風人病橘橙涼。蟋蟀哀貧叫莫常。舊感暗遷貧荏苒。新愁無賴病匆忙。病懷驚病悲貞俠。(時亡兒配顧家女病)貧日移貧度夕陽。觀此百端交集在。一床貧病兩茫茫。

頽牆蔓草護貧生。懶拂圓冰試病輕。病骨峻嶒疑木槁。貧齋淡泊覺塵清。耽貧故冷春明夢。病情虔飯毘舍城。爲問梁家婦病否。布荆貧助五噫名。

病枕橫陳曉夕侵。貧簾斜掛掛疏陰。自憐情性貧偏合。故遣膏肓病入深。聲咽病簫腸九斷。(亡女)樹埋貧玉恨千尋。(亡兒)秋來已是經貧苦。欲採茶萸病不禁。

紅葉飄零病未休。一枝貧不奈驚秋。貧當束手誰無怨。病到中年况是愁。細雨殘燈摧病老。晴江落日照貧悠。何時病起供貧話。翦燭同君拍酒浮。

余第五子世儋年十二歲。見余貧病詩。欣然欲效爲之。和前後兩韻。時中秋前三日。

也。母病中亦爲解頤，憐其蚤慧。九月母亡，君晦來哭，痛定之後，余以儻二詩出之。君晦甚爲歎訝，然怪其語語俱似哭母讖也。余適盡然若夢初覺，小兒臆中，鬼神已先告之歟。今附於此（一字不改）。病雨飄來與淚飛，貧時蕭瑟對柴扉。青山碧水原貧是，綠樹紅花豈病非。去歲貧光今復又，朝前病景夕相違。秋風半冷貧家况，孤月疏窗映病輝。

病也何緣戀不休，貧腸半斷又驚秋。貧拭落花花亦淚，病看飛鳥鳥多愁。貧屋獨居常寂寂，病床高臥自悠悠。回首半生無復望，恨將貧病了塵浮。

朝前病景句與回首半生二語，實是哭母先兆。

代答十章，內人並人及見詩成婦死，摧愴如何，再用前韻爲悼亡之哭。

悲秋無奈庾郎貧，况復西風殞病身。白日三麾成往事，青田一去不歸人。橫釵隱失墓中婦，燎管僂增翠翟臣。哭向高旻何處是，愁嵐萬疊裂開新。

江鄉日澹午烟飛，漠漠簾櫳自竹扉。碧嶂莫天人獨去，紅亭楓月夢俱非。數行雁逗珊瑚迥，三峽猿遲珮影遠。最是傷心共誰遣，秋燈清夜一蒿嶂。

鞠凶天降罹重重，哭母悲兒婦又逢。淚眼暗翻春草蝶，斷腸新逐雨牕蛩。蕭條家在徒遺壁，恍惚人存擬畫容。西海無麟堪煮角，蟹膠那得續芙蓉。

三十餘春爾共予，死生一夕兩離居。茂陵異日終無味，上郡何繇再寄書。靈韻忽疑飛入月，天年恨不學爲樗。追思繡帳香篝夜，碎盡肝腸也只虛。

春颺吹散野人家，風雨重陽慘加更。夜夜明星猶自爛，滔滔逝水竟無涯。床空繡被連香捲，裙簇金泥問衛賒。一寸相思一寸淚，斷紅飛上杜鵑花。

菰鏡空圓鬢彩消，粧臺人去若何聊。女郎石冷三生短，妃子琴悲兩淚饒。玉匣埋香留骨鏤，紙錢烘酒對靈燒。敲欄今夜芭蕉雨，銅漏聲聲逾百宵。

風欄雨榭日淒涼，慘境於今我盡當。幾待留衫啼血澣，一回見影眼花忙。珠哀秋鵲猶金谷，鍾怨寒鴉自景陽。誦典參禪俱是誤，九原誰料驟茫茫。

音容宛在已非生，猶掛流蘇素雪輕。祇有斷鴻知我苦，暫將明月衍君清。羅衣袖裏思荀辨，纖手指香憶管城。翻到銀光箋上句，彩雲飛散僅傳名。

辛楣晝永暗塵侵，風弄臆紗送夕陰。簫管有情垂脈脈，香籠無伴鬱深深。嘗思語笑期相聞，忽憶芳華更莫尋。回首可憐殘歲月，無家無室淚誰禁。

絲鬢情多悼未休，曲終湘瑟九嶷秋。綠慳獨漬鴛衾淚，命薄真成鳳穴愁。楚國無香魂不返，漢宮有草夢還悠。黃童昨夜新啼哭，可盡枯心噴血浮。

楚中周元孚悼董安人少玉詩云。愛子可知還繼母。思妻况復是貧家。妻亡而貧哀莫甚焉。感念斯言。愴懷不盡。仍用前韻。再廢十章。

君去惟留我獨貧。平津雄劍歎孤身。玉簫何日重借爾。紙帳今朝一旅人。共識蓬山鶴有主。欲通弱水雁無臣。低徊漫落襟前淚。灑向青燈夜夜新。

明光一棹雉朝飛。九月梨花雪映扉。檢點塵奩梳櫛是。徘徊荒榻枕衾非。青閨梵葉香初歇。白日淮仙願已違。未訪營陵海上客。但嗟潘岳位空韓。

羽車一去隔千重。哭斷黃昏再不逢。身以捲殘春盡絮。心同叫碎夜深蛩。畫羅階下誰看月。湘竹簾中好掛容。寶曆暗消芳鏡掩。薰籠欲冷碧芙蓉。

堪傷甯有過於子。半世拚將付曠居。貧賤更誰同意氣。憂愁獨自臥詩書。雄心灰盡吹難焰。世法緣辭任作樗。回憶相期幾許話。忍令綠髮頓成虛。

傳聞蓬海是君家。偶到塵凡謫暫加。女作修文歸帝所。室無主饋似天涯。佩環聲去淡波香。膏沐容銷樹草賒。惆悵臨風一慟哭。江干無數落蘋花。

誰物藍田玉種消。畫眉臺上月悽聊。花憐故影時時度。塵愛空廊處處繞。有淚不知頻自滴。無言祇是烈如燒。燈前兒女樽前酒。難叩仙局共此宵。

鷓鴣啼老蓼阿涼。萬拍胡笳也未當。但憫新愁人共感。那知舊事自思量。寒衣無復憐夫婿。荒草從今不載陽。流水高山成絕調。白楊青塚最荒茫。

破鏡鸞孤萬感生。開箱空驗羽裙輕。典衣券難遺詩積。寶珥匳餘蠶粉清。淑令青春留素幙。高情白雪映寒城。浮生五十猶慳四。那論他年道蘊名。

初驚三伏病相侵。忽墜殘秋蜀魄陰。半夜夢摧孤枕溼。終宵愁送一燈深。爐香猶是雙鬢燕。繡帶誰教小婢尋。偏有黃花殊不解。低枝婀娜似難禁。

蝸場我亦自甘休。祇奈般貧對獨秋。欲覓琴書先引淚。忽看花鳥又供愁。青天不惜瓊瑤折。白髮誰捱日月悠。想到來生重見處。或堪舒悶兩眉浮。

再續七言絕句一百首

竭來無處不淒涼。風景依稀盡可傷。秋色那知人正苦。故飛紅葉入愁腸。夢半驚回漏點遲。燈花落盡淚痕滋。青羊城上三更月。高掛秋宵照別離。（滄師云亡婦即夢）

太虛夫人同居青羊城也

博山銷縷畫屏虛。雲笈香留艾席書。檢盡殘箋數行淚。遺文應奏女相如。藥珠宮召謫仙才。最是傷神奉倩哀。螺黛不描真散朗。元非脂粉隊中來。



悼亡無奈更傷貧。四壁蕭然。但鎖塵留得。龍盤虛玉貌。從教哭殺畫眉人。  
眉前夫婦膝前兒。一處心情。一處思欲驗。斷腸人不見。試看雙淚落千絲。  
米鹽瑣屑更如何。我待無心聽自過。但恨繡幃花月夜。清燈誰復照雙蛾。  
生來性癖是耽香。襟素先薰。面粧猶剩水沈光。數片燒成心字。訴高蒼。  
恍憶當時。桂葉初。翠鈿春掠黛烟梳。而今三十年間夢。蒜影空餘。霧箔疏。  
粧臺明鏡碧籠紗。徐淑才情亦不誇。一自紫簫聲斷後。半庭荒草伴梨花。  
草色依然送夕陽。芳魂渺漠不還鄉。閒階露白啼蟬冷。風月平分各斷腸。  
曠隴初日映牕明。一檻寒光碧篔簹。情緒憶纖紅何處去。薰籠斜倚綠紗橫。  
尋思黯黯獨潛然。金縷香飄暖玉烟。猶記畫欄微步處。海棠花下是今年。  
處處傷心事事非。遙天風雪欲何依。殢人惟有黃昏在。哭盡殘缸漫掩扉。  
百念俱灰淚未灰。小廊閒立影徘徊。秋雲故作無情色。片片東飛更不迴。  
空床香滅枕虛陳。綉帳花寒繡履塵。滿院落英斜日晚。秋霜零後更無春。  
簾簾蕭蕭似昔時。疏香閣外響參差。三年灑盡千行淚。又灑千行染舊枝。  
楓葉江山楚國天。數聲砧杵送嬋娟。瀟瀟半夜離亭雨。溼盡閒花是惘然。

玉釵燕去杳沈沈。井內銀瓶可更尋。拋得鬢絲潘岳在。翻教我賦白頭吟。  
暫開松幌看青天。徹夜清光舊閣前。君去廣寒應說與。願今明月不須圓。  
寒鴉日落盡思歸。看盡鴉飛祇淚揮。我亦欲歸何處是。半窺暝色一空韓。  
暝色蒼涼正慘淒。空梁又落燕巢泥。無聊再到中庭看。雙雁橫飛並過西。  
聽罷荒雞天未明。幾番揭帳曉光輕。那知今歲秋燈夜。別鑄銅壺了一生。  
夜深忽夢覩清輝。兒女歡傳識母歸。醒後尋思悲欲絕。斷鴻何得更還飛。  
澹姿閒雅曠人清。冶袖撩花蝶也驚。風度卽今還似許。那容白髮鬢邊生。  
梧桐葉落井床寒。日色猶憐似舊看。爲語繡簾人已去。莫移愁影上欄杆。  
自古佳人薄命多。如君命薄更無何。貧中歲月愁中况。又向秋江逐逝波。  
振地西風萬木號。布衾夜冷念兒曹。髻髻短髮雙雙哭。寸寸肝腸落剪刀。  
兒寒無母向誰呼。白布衣衫問老奴。開取遺箱和淚看。線針曾否在還無。  
典盡春衫強自支。窮愁聊寫在新詩。今宵細把從前憶。笑鬢曾開亦幾時。  
文章詩酒對相看。家計蕭條日共攢。從此孤雲無定泊。荆釵匣底劍芒寒。  
瑟瑟悲風捲白沙。總帷宿火半欄遮。無如今夜聽楞紙。括碎愁腸作浪花。

繁雲零雨黯淒陰。小院深。麗渾色侵。瑤管清琴自空屋。可憐昔日萬重心。  
一盤魂燈。一聲侍兒添火。進瓷罍。半杯酒淡。供靈座。遮莫沈沈自五更。  
蠟燭流稀。淚不稀。漫漫長夜。雁雲肥。一聲叫落西樓月。可是魂飛。是雁飛。  
夢裏分明見。欲真爲憐。多病舊時身。暫來簾下。呼湯藥。驚斷黃染拭淚頻。  
緒得長旛寶絡青。未能免俗爲資冥。盡無鵝眼文錢在。賒倩山僧拜佛經。  
拜罷華嚴。施食回。半罇明消紙錢灰。淒淒斜月魂歸否。落盡西隄。磬口梅。  
曾向京華。怨別長。每看征雁憶還鄉。如今已作無家客。卻怪南飛爲若忙。  
銅鑲小鎖鎖房門。金薄誰移夜月痕。更是相思難見處。晚粧攏下舊溫存。  
蕙簾朝掛曉屏開。菱鑿何曾玉作臺。但愛清香消粉黛。又教睡鴨貯寒灰。  
素質天生窈窕心。冰如爲骨玉爲襟。堂前慣識姑嫜性。遙想今宵好共尋。  
茶蘼香冷竹枝愁。薛荔牆西桂樹幽。鵝背已枯連理折。遶階菸邑爲誰秋。  
落盡寒花一片雲。白雲曾似素羅裙。紫微簾下深深月。何日重逢再見君。  
石竹屏邊水半池。牽牛花發晚霞時。自憐不及池中水。猶照欄花並蒂枝。  
寒鷗歷亂小庭西。細雨濛濛入望迷。稅遍尋君慰岑寂。數株衰柳一鴉啼。

蛾眉難贖漢宮春。香跡輕萎冷砌塵。偶到山茶花下立。不知身是哭花人。  
音容雖往事如成。玉珥金釧更不論。祇是梨花舊蝴蝶。也隨飛葉怨黃昏。  
曉夢初回柘雨乾。殘燈無賴半闌珊。僧來鐘磬催人起。又說三年并薦鸞。  
瓊章今日是三週。君向當年哭未休。環珮又歸何處月。漫教我獨淚盈眸。  
中夜椎心待叩蒼。無情衾枕有情狂。三生石上因緣淺。負卻金天一炷香。  
槌珠不惜夜光捐。破瑟分開十二絃。零落舊時紅錦帶。一齊俱欲送殘年。  
鶉血啼斑萱草深。秋山無夢入幽琴。金徽落卻難調響。誰會明光此夜心。  
十間房銷九間空。玉珮珊珊杳碧權。千古至今人不再。茫茫歸鶴幾遼東。  
半黃禾黍半高低。衰草殘花自滿堤。正是九嶷腸斷日。閉門風雨午時雞。  
檀黃枝上薄餘暉。往事臨風淚點紛。無限深情銷不得。欲將何處問湘君。  
三十年來一夕孤。繡茵文簾共模糊。雨中憶得巴山話。欲共君談每錯呼。  
兒亡二月正清明。君是重陽去玉京。何事人間最佳景。碧桃黃菊對傷情。  
飄姚羅袖履聲移。似見如真又欲疑。顧影數番渾不是。傷心尤在夜來時。  
蓬山東望更何如。錦字無憑一紙書。昨夜青鸞飛過去。簪前蛛網不教除。

冷日餘荒接暮煙。白楊漸颯。暮山田。醉來染得啼鵲袖。可付胡姬當酒錢。  
寥廓重霄碧渺茫。一天秋漢。曠流黃。那知共快清光夜。止剩愁人獨斷腸。  
風箏敲響碎玳瑁。牆角縈斜蔓草零。試向屏邊看月色。照人孤影自空庭。  
搖曳青蔥練雪裾。馭風今去共誰居。葉宮若草瓊花賦。莫把啼痕溼錦書。  
櫻桃樹底草成泥。風月誰人再抹批。殘酒未消簾外雪。一天星斗又迴西。  
悲來無緒但哀吟。去國明妃怨未深。楓葉江邊萬重雨。一宵齊作淚潸潸。  
荇落芸黃泣鈿篋。繡床終日斷香篝。何年再綰同心帶。話出而今萬斛愁。  
天涯旅況古來悲。曾向春明也淚垂。猶有故園歸夢隱。却教今日夢伊誰。  
掛出遺容儼靚粧。舊時侍女畫焚香。七齡稚子深深拜。只恐君看日斷腸。  
檀香供佛縷金裙。夜夜空思李少君。昨日泐師門下問。石梁橋畔月氤氳。  
代女摩笄弄玉仙。江郎新賦悼亡篇。他年事事堪留話。此日深愁幾萬千。  
淚滴湘綃玉斷煙。並頭花謝痛無蓮。猿啼不待三聲後。鳳喙難膠第一絃。  
乾毒試掃鹿葱邊。無限傷心盡目前。穉子牽衣問梨栗。遺箱開取歎無錢。  
無錢慣亦共相依。君典釵簪我典衣。育得雛龍纔似許。楚天風雲遽分飛。

落日柴邨水國寒。夢中猶憶問平安。恩情已作浮漚散。淚眼何時得少乾。  
水仙花發繞羅裙。似怨如愁不見君。採供靈几君試看。海棠開後又紛紛。  
三秋人去夜何長。憔悴芙蓉不可當。斷石頽欄何太早。敗蕉荒竹一西廂。  
蒼茫絲雨暗江蕪。夜靜波寒氣一身。綠髮已供天外淚。紅粧誰發鏡中春。  
鏡掩空臺影不留。還留錦句鏡奩頭。王孫芳草年年淚。人畢音書日日秋。  
每見晴光倍愴然。更看雨色淚綿綿。難將晴雨平分取。斷盡人腸總是天。  
自慚窮骨子雲貧。荆布相隨三十春。話到最堪傷切處。至今蕭索尙賒人。  
滴瀝空堦夜雨多。孤眠衾枕淚摩娑。世間原少君知己。詩酒交情是翠蛾。  
松梢月掛老虬枝。照入幽簾夜半時。拾得玉搔頭在手。當年會有碧香知。  
霜罽靜閉悄無人。日燕爐香任自頻。爲是凌波冉冉去。舊痕何處不生塵。  
合歡被冷漫驚猜。冰織衾稜鐵共裁。一夜秋江雲雨斷。從教不上楚王臺。  
屈指殘寒似擲梭。荒涼情景冷時多。堪憐風雪猶如我。若到春光可奈何。  
莫怪君亡日月遷。但聽銀漏杳如年。久無腸在虛成活。癡望重生眼更穿。  
搖搖我亦似遊魂。一度思量一度昏。常是尋君忙入內。忽驚衣上是啼痕。

檢盡遺詩淚越忙。洞庭人遠袖花涼。追思形管題箋處。箋硯瓷爐伴墨香。  
筆墨於今盡可焚。臙脂不染藕絲裙。縱然拾得桃花片。誰向瑤天挽彩雲。  
清將松月共相評。琴石誰憐舊指聲。滿架圖書飛白雪。一庭花草怨黃鶯。  
日日西風透徑蒿。半床芸葉落紅桃。猶餘兒女殘書本。手自親鈔教楚騷。  
短窗人靜蠟痕微。恍似清樽夜景稀。共把汗羅巾上句。燈前同看墨花肥。  
昨夜風飄蕙帳開。紅香荳蔻惜多才。分明夢見金簪溜。紫袖衫前舊月來。  
昔年愛女墜雙筓。今日香纓折錦緹。我抱孤兒君見女。一時回首淚痕齊。  
玉樹催枝愴正新。那知薤露卽相親。見兒各訴離懷後。可念傷妻哭子人。  
昨夜江干冒雨歸。一回無語淚絲垂。生平不識歸家苦。燈火空箱隻影隨。  
難憑搔首問青天。祇是肝腸晝夜煎。不信鴛鴦雙繡枕。化成殘月一啼鴉。  
填胸憤咽幾能堪。快劍橫磨紫玉鐔。斬盡世間生死夢。卻將髮剪結茅菴。  
哭君真是哭無休。不盡東流不盡愁。了卻此番詩句債。江湖滿地一禪鷗。

乙亥除夕和白香山韻六首哭先慈兼悼諸亡

共歎年光盡。高幃獨未眠。千愁消白日。一影對青天。雲去思親舍。霜飛憶墓田。難將蓂莢

痛把酒候新年。

故歲催新歲。魂兮何日歸。空房迷舊跡。遺掛識清輝。白髮羞看鏡。青山願息機。但流雙眼淚。老大不知非。

燎火蓬門寂。悽慘百感生。那知今夜夢。迴隔昔年情。總帳飄新座。椒盤異舊正。可憐殘蠟燭。憔悴庚蘭成。

奉倩神傷甚。西河痛亦然。無人黃葉地。有淚白雲天。落日松窗酒。深燈草榻眠。從來除夕况。恐莫逾今年。

昨日行春令。今宵送歲迴。飛瓊終自去。子晉不歸來。四載衫痕溼。三春淚眼開。漫隨彭澤柳。慵灑葛巾杯。

天地孤身老。空悲淚滿巾。悼亡真是苦。遣悶奈如貧。宦况今年臘。禪心明日春。石梁橋畔月。應念昔時人。

丙子孟春再悼內人

孟陬載始。春光驟盈。婦亡百日餘耳。已稱二年矣。寂寞空庭。徘徊無侶。雲煙爛熳。益助感傷。襟靈曾禮。敢忘嚙指之心。淚漬延封。還拜喪明之責。然惟宛君。仰焉哭母。俯焉哭



子亡身殞命實本於茲。慈孝均關。悲哀尤劇。林鳥雙棲。一朝影隻。三復河陽之辭。莫已朝陵之悼。清晨獨步。昏夜孤眠。再續前詩。乃廣十韻。聊以抒鬱。不問佳惡也。觀者亦可知余之苦懷也。

春來又送一年貧。君去誰憐我子身。舊跡幾曾殊昔日。遺容久不作生人。閑將偈證西天佛。悶借詩賡北面臣。剪綵燃燈時俗事。小庭荒草未知新。

蝴蝶尋春早亂飛。春光何必到蓬扉。花香欲笑人誰在。日色初遲事已非。寂寞倍因新歲月。淒涼元是舊分違。欄杆立盡渾無語。潦倒如僧一衲裋。

畫屏翡翠鬱金重。彷彿餘香恨不逢。塵鎖窗紗自啼鳥。枕銷燈藥憶聽蛩。梅花還發當年詠。茜粉虛描舊日容。遺韻不其相似春酒未蕪空醴醖。閉門端愧醉芙蓉。

滿目葳蕤悄悄子。數間空屋一人居。清歌有淚楊惺忪。社樹無心柳教書。(殺後續娶節親女)摘盡相思俱是夢。落殘夜合不如樗。新來花鳥誰爲主。白日青春處處虛。

淑景初開邊萬家。悶懷鬱鬱轉增加。共憂重檄傳江上。(時有寇警)獨歎孤身自水涯。涕淚三秋隨夢杳。音容半載隔春賒。那堪人事蕭條盡。點綴橫斜白玉花。

盈天春色沍寒消。形影隨人強自聊。粧洗梨花全樹折。鏡分菱葉一邊饒。情憐子女貧尤

苦心到夫妻寸割燒。猶是年年舊燭月。又將淚眼對元宵。（兩亡女纔及三年故曰又也）

貧茅蕭瑟似秋涼。冷落情踪獨當。漫想魂歸穿眼望。（欲求游師招魂歸家處約不果）但披帷  
在刺心忙。烏知相匹還求友。花怨無人。枉向陽。（庭中花素繁茂。今年俱不開）日暮游絲橫路島。乍寒  
乍暖恨茫茫。

斜陽沈後暗煙生。空院黃昏漠漠輕。侍女散歸初夜雨。病僮寥落舊西清。（止有二僮而最善）  
（病）長吁自遣無肴酒。短睡如游不夜城。子擬華元休更娶。哀情豈是爲邀名。

閒庭門掩但愁侵。懶向愁鄉競寸陰。暮雨綠吹松徑老。亂風紅泣杏花深。漫留芳草天涯  
在。一任雕欄夜影尋。祇有棲鴉啼不住。爲誰悽愴故難禁。

纔是青陽正未休。黯然回首怨莫秋。千條垂柳千條淚。一片飛花一片愁。月倍明時心自  
冷。春當深處夢偏悠。挑燈故讀傳燈錄。生死同期了障浮。

附

乙亥春日哭亡僮七言絕句十首

江上春風石上魂。月明依約閉柴門。傷心滴盡燈前血。只恐今宵入夢昏。  
滄海明珠灑淚頻。杏花紅雨溼香塵。生前未作青衿子。地下何曾有故人。

閒行閒坐淚如絲。憶憶形容脈脈思。十八年來成底事。春風吹在斷腸時。  
兄弟相將八士呼。今朝連袂淚痕枯。遺文未檢心先碎。半世還能見汝無。  
生來少小似藍瑛。秀骨雙瞳映水清。想到病中愁悶况。嶺猿啼過幾千聲。  
桃夭驚賦柏舟篇。鬢髻麻裙作佩鈿。自是骨成千古俠。那知父母血流泉。  
靈芽二月蚤悲秋。風剪瓊花故不留。無限雄心隨蔓草。荒荒幽月照空樓。  
病後愁懷日日生。語言堪憶恨難平。新來母爲思兒病。忍病呼兒禮佛名。  
鴛鴦繡錦斷姑蘇。人夢魂飛玳瑁孤。等得秋霜烈女至。蓬閨何日見鸞雛。  
荆花樓上舊時樓。故卷猶存手墨題。獨有英英人不見。斜陽落盡蟪蛄啼。

七傳百日夜大風雨候禪侶不至

兒死已百日。哀愴方猶新。蕭牆閉寥寂。庭階溼青蘋。眼色催螢出。燈昏虛無人。夜深聞鳴泣。如兒病中呻。乍聽疑恍惚。恐漸以真。暗雨天外集。竹亂敲簷頻。雨與竹聲雜。一一淒酸辛。歛然萬木慄。高長裂紫垠。頽鷗驚夢境。魂魄不得親。吹我夢魂散。我淚墮枕茵。吹兒夢魂去。兒孤誰爲憐。雨橫風更惡。無乃悴兒身。我痛與兒苦。何時重訴陳。肝腸碎復碎。生死終參長。緬彼勳師力。爰清六根塵。念言垂慈憫。慨允拯沈淪。耿耿玉壺漏。漫漫星漢津。披衣起仰視。陰雲覆

層輪拊膺叩幽顯。願迴飛廉。不日曠且故。感惻徒傷神。

寒夜旅泊夢亡僮

寒月悽江汀。汀白水聲落。聲細鳴咽流。蘆花搖漠漠。獨酌不成醉。胸懷黯生惡。傍得拊襟歎。殘燭凝昏莫。燭滅一衾孤。楓渚動嚴柝。關闌逾三更。矐矐眼花暎。恍惚覩顏色。宛是亡僮昨。英骨儼猶存。荊枝綴芳華。墳窟共依追。還似舊時學。畫欄苔粉邊。聚袂紛交誼。昔日檀布袍。長袖莽弱約。母亦不見兒。兒亦不思索。但知兄與弟。語笑翁以樂。緬言三秋遠。衰容生喜噱。兒今身安康。俯仰盡歡躍。歡躍方未盈。荒雞四野作。驚我夢魂散。父子仍又各。茫茫更何之。空餘雙淚絡。摧肝復摧腸。歷亂如飄箠。須臾曙光升。哀哉起懽愕。

內人鄭吹集中。獨無哭僮詩。每欲握管。卽哽啼漣塞。肝腸爲斷。不能作也。所以奄奄致殞。實根於此。

春餘續附。

春盡云歸。無聊更甚。案頭數卷。總是悲端。再次前韻爲送春之作。工拙之思。嗒焉喪我矣。

莫信春風不厭貧。繁華誰念寂寥身。軟欄細鎖催花雨。荒徑深遮問竹人。父子千行兩慈母。弟兄雙袖一孤臣。潛然無限傷心事。豈怨芳菲物候新。

薔薇花片半庭飛，芍藥初嬌棹葉扉。雲氣侵衣新序轉，煙光隔坐舊人非。雞香夢曉漁菴穩，龍匣芒寒劍彩遼。遙想館娃宮樹月，可憐流照入空幃。

芳草平原襯帽重，冶遊時候又驚逢。自從孟哭三春筭，未返荀魂九月蛩。愁鳥靜窺幽客况，倦花低接病人容。東風渾似西風瘦，不待秋江泣芙蓉。

正嗟春色最愁予，又送春歸別故居。一枕升沈翻蝶夢，百年生死絕魚書。燒琴自昔曾烹鶴，吹桂于今代斷樗。無計明珠還聚掌，楚天風月漫成虛。

塞鴻歸後久非家，青女霜稠兩鬢加。本自蒿萊甘寂寞，敢于湖海望津涯。真訶有我餘生累，却掛無錢百事賒。一日窮愁消一日，夕陽西去落開花。

流水飛花日日消，豔華不爲一人聊。無端膩雨梅初綻，忽又柔風豈已饒。可有胡香追骨冷，那教寒火緩心燒。階前留得黃昏色，腸斷欄干是此宵。

亭榭微寒薤簟涼，琴樽誰問個人當。鶯啼似怨辭春鬧，蕙蕊何心入夏忙。曾謝參軍希伏水，元非太守異山陽。櫻桃摘盡休回首，嶺月溪雲任渺茫。

貼水芙蓉遠岸生，銷凝人逐浪萍輕。家中作客沾衣慣，鏡裏看愁逼酒清。淮北烽煙迷白社，江南消息隔青城。桃花落處漁郎遠，梅福如今已變名。

琅玕碧粉畫簾侵。檻外梧桐覆地陰。草嫩迎涼遲日永。月孤漾水帶秋深。一春風雨新年過。三世因緣舊石尋。莫訝夜闌渾不寐。子規聲斷更難禁。

傷春情思歎春休。柘隴桑畦盡麥秋。往事驚心空送老。新天改候但遺愁。鴛鴦沙渚無邊闊。薜荔衣裳自古悠。憔悴韶光真石火。可知宇宙此生浮。

芥淚

九月之五日。內人又焉服除矣。子荆文生於情。武子情生於文。千古悽感。豈虛語哉。再磨前韻。聊侑奠觴。

禾黍秋高盡不貧。蕭關貧况獨愁身。依然雁落千汀影。是處花傷半鏡人。歌謝屢屢悲故婦。夢連烽火憶閨臣。庚午之役。內人在家。盡子不置。今又適聞喪警。朝來哭向君週日。冷幕塵几蝶紙新。

紙灰蝴蝶一齊飛。猶憶前時舊白扉。恍惚音容寧問久。低徊涕淚未曾非。三秋漫識西風老。九月重來暮雨遼。欲草祭詞還哽咽。江淹神女賦靈幃。

雨陌悽悽楓野重。傷心人去再難逢。總寒敵柅榮枯蕩。徑隱荒苔鎖亂蛩。幾待金風哀玉貌。從來春色委秋容。黃雲哭斷高天暗。飛散江皋片片容。

湘君北渚可愁予。砧杵風多。屈子居。草露花泥俱隔世。黛脂香澤但留書。葳蕤折盡相思竹。蔽芾徒慙就宿禱。一載年光已如許。悠悠生死兩番虛。

蘇來無婦不成家。况是窮愁累日加。久戍征人迷絕塞。望洋河伯失秋涯。依稀月照新靈哭。彷彿魂游故跡賒。世事茫茫誰可料。斷腸紅葉對黃花。

紫霧霏靈黯未消。畫房長閉不堪聊。心從舊日重陽碎。人伴孤燈夜雨饒。四壁啼聲酷似滴。一簾昏影蠟痕燒。紛紛叢桂飄香淚。又送殘魂是此宵。

獨臥經年帷幙涼。深情閒付架書當。窺床鵲月三更冷。入枕雞霜午夜忙。禮偏唄音初忌日。掃開寒葉舊秋陽。山鐘寂寂香焚在。縱似平生亦渺茫。

賦鵬長沙億賈生。推遷淹速化真輕。芳魂忽悵流光迅。玉骨渾猶觸眼清。自折紫簫辭蕙帳。何年黃鶴下蓉城。臨風欲醉悲歌愴。陶令羅邊浪酒名。

秋澹光搖素箔侵。開幃愁向曲欄陰。仙環共惜年年遠。淚袖誰憐日日深。弱算祇緣悲母促。慈顏隔久痛兒尋。登高會把茱萸看。獨有潸然最不禁。

幾回哭罷乍還休。無限悲思僅一秋。半世已憑隨短夢。百年終是繫長愁。空留香霧飄飄似。難訪靈崖薦石悠。今夜燈前重與別。別離除服。明朝風月更沈浮。

內人再葺仍次前韻

卅載相依賦食貧。三秋寥落歎餘身。星霜忽忽傷心事。歲月悠悠墮淚人。客徑草深慵學圃。宦情冰冷愧稱臣。去年週日今年又。兩度蕭然白髮新。

青鸞無路夜臺飛。光碧西廂鎖玉扉。祇有詩文千載是。豈令魂夢一宵非。雞鳴曙遠愁相問。鴨睡秋寒怨久違。聞道昨朝霜降日。兼葭還想舊羅帷。

插遍茱萸九又重。成都何日雨仙逢。遙天錦字家家雁。衰草荒庭歲歲蛩。逝水難迴空見浪。落花一謝不留容。蕭條無限秋原色。禾黍西風起暮蓉。

銷凝緒無日傷余。寂寞松齋二載居。長臥枕辭同夢影。相思餽盡著愁書。碣孤鶯塚悲韓梓。櫛少鸞臺老惠樗。剩有夕陽林外菊。伴人憔悴夜牕虛。

梧桐秋晚子雲家。瑟瑟金風冷漸加。湘竹無人猶北牖。江楓入望自西涯。堪憐涕淚年來在。其奈音容日去賒。鐘磬聲微更漏轉。夜深殘雨哭燈花。

舊跡雖存強半消。中年情況更難聊。鶉膏淬劍光終隱。燕爪留塵土漫饒。碧落黃泉皆不見。青緡赤仄總空燒。細追前事重回首。人世渾如一短宵。

艾席塵凝自踽涼。沈淪愁海幾堪常。絲殘雙鬢供身懶。步遠虛廊累影忙。仙枕黃梁炊客



命宮釵翠鈿寄昭陽。繇來生死都成幻。華表遼天更溟茫。

家貧蒿隱僅存生。內助無人怨不輕。微缺斷琴餘宛轉。墨乾枯硯獨淒清。悲秋血墜紅子  
葉。落月魂歸黑作城。吳市祇今誰是侶。禪心空慕少文名。

人事消沈日月侵。高天寒望黯秋陰。不知冥漠千重隔。但識悲思一往深。莽是再遇神倍  
愴。心終寸折恨難尋。朝來又覩遺香澤。滿袖斑痕豈自禁。

黃葉疏櫺泣未休。斷腸衾枕一人秋。蕭蕭數點風和雨。黯黯三更痛與愁。身繫故園蓬鬢  
老。心同異國旅情悠。憑將淚洒東流水。共作湘江萬里浮。

戊寅九月三期撤座。哀悼更不能已。再續前韻十章。嗣今閣筆。付枯腸于斷雨飄  
花矣。傷感。

鮑照親朋久厭貧。悔多乞塊黜顏身。窮愁盡化相思草。密恨誰傳別世人。霜葉杯招荒社  
客。露花夢隔聖朝臣。忽聞貝字重宣法。總幕將除愴逾新。

跳丸日月迅如飛。薪柴何人歎鹿扉。零雨三年終不見。秋風四野總俱非。徒教回首成哀  
癩。祇切傷心逐歲違。紅隕翠銷香玉碎。可堪哭送舊靈幃。

閒憫閒悵亦多重。欲話西窗永莫逢。嘗憶文情惟對酒。細追病景僅餘蛩。舊時乘履燈前

淚。近日愁眉雪裏容。兒尙未婚女未嫁。向平雙袖溼衰容。

造化忘慈故忍余。九秋索莫未安居。心搖每轉高旗旆。淚久渾迷疊架書。飛盡寒鴉空怨鶴。摘來繁蕊悉同樗。墓田買得松楸色。待聽敲環想步虛。

風德曾經請喪家。喪兼失婦悼尤加。幽明恍惚分千載。生死迷離逸一涯。不覺瓜期隨戊換。那容冥候歷長賒。空庭剩有簾橫影。金粟猶飄故主花。

自分情深豈易消。悲哉慷慨若堪聊。非關雁表天偏迥。正是鵲啼月更饒。錦帶一從并剪斷。靈芝久已却灰燒。淒涼夜夜鴛鴦渚。叫絕平沙幾百宵。

郊原漠漠水涼涼。秋向無邊草木當。搖落頻驚去故遠。變衰真感就新忙。乾坤荏苒三移隙。今故銷沈九厄陽。試看鄰人吹笛處。數聲嗚咽銷荒茫。

梵唄華幢出死生。撇開几緋利塵輕。蕭條孤櫬伊臧在。慘淡殘更翠粉清。泣灑湘妃盈染竹。怨衝杞婦日崩城。從今麥飯虛晨奠。可馬青衫總漫名。

幻泡元知過眼侵。六根塵結五禪陰。還憐奉倩心猶短。故薄安仁鬢未深。月冷怯遲黃菊暮。春來羞問碧桃尋。憑將落帽龍山會。插遍萸枝幾自禁。

戰身萬事蓋棺休。玉樹長埋此杪秋。熊耳豈齊連理恨。虎頭難畫遶梁愁。村村燈火楓漁

老渺渺湖光荻練悠。獨有余懷憂不寐。一年一度淚痕浮。

閱曹能始詩選。見先生悼亡之作。慨然和韻。

### 次張亭父

蓬盧架愧郡侯家。性癖耽非杜澆花。僅有徐巾虛越布。竟無梁案老柴車。青春淡月消楊粉。白日閒風落舞華。猶是昔時詩酒處。更誰流語共相誇。

### 次徐康懿公原一

湖秋瓊葉泣零霜。春入蘅香倍渺茫。三載光陰時太速。百年情境淚偏長。翻書每見留遺蹟。念女慙教簡舊裳。沒無餘衣。一自卷簾人去後。至今栖燕怯歸梁。

### 次邊庭實

翠幕沈沈杳不聞。並無消息慰離羣。空塔聽雨追寒夜。往事隨春付淚紋。荏苒又驚題綵扇。時近午月。依稀還想試羅裙。廣隆一曲風吹散。何處餘音更過雲。

### 次莫如山爲錢子山

新桐如憶故房人。綆絕銀床兩度春。淚灑未乾衣上點。香銷久化席間塵。西欄欹石猶芳草。南浦輕波自綠蘋。總是韶光堪釋悶。悶多深處意慵親。

戊寅清明感念亡僮并悼內人

芳菲時候半沾襟。此日潯然更不禁。愁裏清明重對酒。雨中寒食細傷心。蒼烟古木迷離鎖。殘髮春風寂歷深。舉目漫嗟人事改。杏花零落又侵尋。

重午後一日悼內

昨日龍舸咽漢流。今朝菰黍任沈浮。堪將恨齋青天老。難遣魂翻碧海秋。漠漠花香空入夢。灘灘雨色最關愁。黃鸝樹上啼飛去。譜寄相思淚不休。

水龍吟（內人有此詞二闋秋懷感舊之作也丙子除夕和韻作之）

斜陽落去西風。歲除光景渾如舊。疏花半吐。迎春未盡。黯然衰柳。屏樹生塵。衫袵漬淚。今宵還又想。當時故跡。餘香猶在。銷凝幾番回首。休問泥金圖燕。柴門燎火。松燼繡紗。牕冷淡。小庭寥寂。鎖殘眉黛。荒草沿堦。暝烟繚樹。斷魂新候。但空存綠卷。清樽桐引。哀絃難奏。

其一（丁丑元旦）

爆竹喧動寒村。曉霞入戶。瞳矓逗。蒿床驚起。芸奩人遠。九嶷湘鮑。時雁南飛。輕帆東漾。（滯滯卽景）壯懷消透。悵粧籠。蟾網。菱花閉影。贏得庾郎清瘦。况是蓼莪句掩。遺栝剩縷。應知否。柔腸攪盡。夢迴天杳。昨宵更漏。銅折釵分。何年重與。屠蘇泛酒。愴追尋。筆寒。椒華那禁。潛潛

沾袖。

又（癸酉雨中感悼亡女續些偶失付梓并附於此）

素屏人正淒涼。那堪日更黃。梅雨。薛文侵壁。曲欄低鎖。烟橫平浦。溟溟濛濛。瀟瀟浙浙。淚絲如許。自飛瓊去後。啼鵲袖上。還過散空千縷。脈脈悲傷縈緒。又驚看艾懸重午。繡幃香冷。碧天雲杳。斷腸誰語。浴罷芳華。繫成綵線。遽分今古。漫凝思。祇見。桐花落盡。隔簾無數。

晝閒芸卷蕭然。閉門寂寞聽風雨。榴脂鈿老。溼鶯啼遍。暗愁難數。夜月梅梢。粉牆竹影。霎時寒暑。欺掌中珠隕。千憐萬惜。博得淚痕一縷。那日彩雲化去。飄殘謝雪空如堵。而今卻又。茶蘼開罷。落英紛許。半載離魂。三更幽夢。欲尋還阻。總傷情。只有香箋錦字。漫留仙譜。（君臨有）

此二附瓊之手錄之書所在實也簡及感賦卽月君臨韻

讀葉仲韶午夢堂集感賦

仲韶嫂氏沈夫人宛君。以才名聞江以南。長女字昭齊。季字瓊章。皆妙敏詞翰。仲子聲期尤慧。聲期早歿。瓊章繼之。昭齊又繼之。夫人最後亦亡。仲韶多遷奇哀。不能自裕。乃日取夫人及諸子女集。點定梓之。并附悼亡諸篇于後。題其編曰午夢堂。首載鸚吹集。即夫人作也。夫人麗匹才子。且早副六珈。推以恆情。宜無所恨。顧鸚吹集中。多作恨語。湯臨

川曰。情不知其所起。一往而深。殆謂是乎。今稱詩之閨秀不一。然博洽羣書者。率乏姿韻。及乎曉風殘月之曲。又鮮大家。娟麗高雅。鶻吹爲僅。卽窈窕之姿。淑令之範。亦于詩詞。彷彿如睹。屈指閨流。殆罕其擬矣。昭齊遺集。自題愁言。若有鬱而難言者。返生香。則仲韶取以名瓊章集。謂其歿有仙兆。冀其再來。聲期入仲韶夢。進一編曰百晏。遂以命之。未載聘女矢貞事。亦奇節也。吳有女仙泐子。以少君術作佛事。頗能言夫人及諸子女前後因。謂瓊章方爲月府侍書。竊聞微仙錄。盡祖其言。夫人在日。曾集諸韻婦詩詞成帙。名伊人思業未就而亡。仲韶欲竟其志。姑取其已成者梓之。自梓悼亡諸作。爲秦齋怨。梓諸子哭母詩文。爲配雁哀。松陵閨閣多才。強半夫人姻戚。夫人亡。競致誅章。仲韶悉梓之。爲形奩續些。凡十種。先是庚申歲。予從家君晤仲韶。松陵仲韶甫及壯。偉麗如神仙中人。今予再過此。扁舟晤我江湄。臞然病。皤然老矣。予驚問之。則神傷而不能答。第出此編示予。予讀未數紙。亦淚盈盈。漬行間。以是知仲韶之不能堪也。因憶予弱冠喪室人尹。遺有斷香刻。仲韶曾讀之。爲予含悽。今乃更讀鸚吹耶。未免有情。誰能遣此。爲歌十五絕。以永哀痛。

旅人愁思正無端。風雨孤舟戍漏殘。午夢堂編傳恨事。燈前顧影泣涓瀾。

伯與慟絕將誰恨。解得情悰鸚吹詩。縷盡傷心非筆楮。杜鵑江夜有餘思。

刻羽抽黃不足論。腕中斂得月花魂。行雲還逐香光散。譜作眞眞帳上痕。  
才麗一身兼福慧。風流千古不能雙。江南從此無芳草。夜合何心發故牌。  
母子閨中互友師。絕憐早慧有文姬。絃摧柱折留餘響。待續宮商倩阿誰。  
左家嬌女盡能吟。隻影還悲子敬琴。那更影隨哀韻散。傷心事托古今人。  
素女爲師式萬方。煙霞廣和滿笥箱。君門盡屬神仙眷。何事教人屢斷腸。  
作記曾聞李長吉。待書今說葉瓊章。九天亦復稱才乏。獨向人間索女郎。  
末遇封胡也不羣。絮風佳句獨傳聞。如今盡入微仙錄。慘殺湘娥未識君。  
兒女盡能工筆墨。鹿柴無恙友文妻。清緣近作傷心事。無葉堂中聽指迷。  
長夜灑灑魂黯然。人天仙佛想奇緣。多情故是多狂憾。且把巫言代問天。  
筆墨精靈還類聚。閨才強半屬松陵。些聲續得鸚吹韻。轉使芳魂慧業增。  
羊曇有恨在西州。景物無情絕詠酬。獨向諸孤收淚楮。一編哀響自成愁。  
更教幽怨徹人間。索得名媛集手刪。宇宙于今添恨史。斷腸有句莫藏山。  
風流才子原多恨。寂寞今傷奉倩神。我亦有懷中坐起。廿年積淚對密巾。

（西蜀友人劉泌晉仲甫題）

晉仲太僕劉勿所先生子也。先生宓琴我邑神明千古。余芟支時蚤受先生元禮之鑿。寤寐勿緩。永懷矢曰。晉仲少年卽才名冠蟻眉劍閣間。駸駸淵雲。長卿四矣。丙子領西川解元。丁丑暫罷南歸。訪我於釣雪之澗。樽酒論文。班荆敘故。已歎獻祀且愍也。爰賦諸詠。繡綿悽惻。何必安仁善誅漱金石哉。宜尊弁首。爛然鼎呂。而雍歐似非玄晏意也。故僅列悼什之前。知己傷神。河梁非遠。關山明月。一笛秋風。積淚壺巾。念言同怨云爾。晉仲夫人尹儷班軼蔡。遺齋斷香。藁宮不可返矣。晉仲妹字文玉。令暉之名。不亞明遠。文玉小姑顧媛宛初。翰采聲光。一時並駕。晉仲許我索二彤管。鵬挽閔亡。九原不朽。感又何可言也。天寥葉紹袁識。



# 岷雁哀引

岷言痛母。雁什悲節。兒童作也。問序於余。余心傷矣。又安序邪。卽以余哭母詩引之。昔吳隱之居母喪。家貧無人助哭。鶴來助之。敢附斯義。名飛鶴引。

江流滄汙兮鴻溶東漈。百卉具腓兮伊蒿孔棘。怨皇天之頑洞兮帝闕九闕。紛下土之罹殃兮曾莫悔而止息。防癘子兮邁厲兆叢。背兮慙憂。惜蕪蕪之遽萎。追駿骨而悽愁。倘隕年於綺帳。悵衰齡於轉轉。白日寥廓兮春風瑟瑟。黃昏索莫兮明月悠悠。感竊窳之奇俠。矢維儀於柏舟。柏舟兮鬢髮。高堂兮指擗。慙烈女之清揚。唱齋志於幽陌。慈恩切兮崩城。劬勞恒兮罔極。痛一去而不還。渣千秋於半夕。暖燈火之煌燐。縣乘化其徂革。刑肌臆兮寸焚。展溯從兮道隔。杳杳兮夜長。蕭蕭兮晝涼。新幃兮飈襲。舊屋兮茨荒。青陽兮銜恤。寶瑟兮沈光。衆媼兮咸集。諸孫兮邊床。墟勞面之美淑。視合魂而悲傷。獨觀顏其不可觀兮。呼重晏而昏茫茫。隕鮫淚兮滔波。斷猿腸兮絕峽。神蕭蕭而徬徨。氣怛怛而填歷。魂在體而如亡。惘終宵以飄香。鵬墮魄於殘更。結啼冥以嚙雞。儼語笑之恍卽。佇問安於故權。望停雲兮飄散。思岱宗兮朦朧。誦循陔兮噓噓。羌廢卷兮怔忡。宛衣裳之在御。已凶苦之倥傯。緬手澤其盡存。獨改母而稱妣。景悅悅以移。

局漏耿耿其憊止耳。凝想於遺容，目彷彿於墓趾。嗟本根之既傾，曷猶值於人只。念余昔之不造，汝孩藐而卒瘞。惟子母之相弔，共形影而嗟痛。霜葉飛兮嚼蘗，散雨零兮甘荼。懷義方兮靡惡，掖小子兮周塗。殫熊丸兮蓼辛，歷冰稜兮蕙苦。幸匪戾於聖善，陪金閨之簪組。辭北闕以陳情，希奉輿於潘圃。賦陶令之歸來，僅四載其將五。承菽水之歡娛，率婦子而綵舞。愴陟岵之蚤哀，慶期頤以將母。胡昊穹之凶毒，奄降割於倚閭。繫余躬之積辜，惘泰慙而歎歎。私自悼兮遑及，鮮民生兮死如。卷旃刺心兮徒披，斑筠染點兮無餘。祖士言之孤貧，更安奉母而爨諸。金翁叔之見畫，祇爾泣涕而拜歎。亂曰：珠爲宮兮玉爲臺，翔霞霓兮遊蓬萊。天垠靈擘兮迷絃絲，子思母兮空血淚之生苔。母思子兮曷不乘彼飛鶴魂歸來。

葉紹袁泣撰

# 杞雁哀

童穉之作非敢輒災木也痛悼之深存以見志

哭母(五言古十六首)

葉世倅

南山烈風飄。蕭瑟吹葦葦。憂心般孔棘。蠱恥何迫逢。穆穆顯仁妣。哀哀慈恩洪。聖澤終無恃。出入靡有窮。痛悼復何極。長涕零飛蓬。

何咎于神明。鞠凶滋慘裂。何罪于皇天。居高不俯卹。仰叩角欲崩。泣血額有赫。瞻視薄煙雲。瞽荒哀魂魄。吁嗟脈脈情。冰霜苦爲厄。何以報膝前。踵頂永難及。何以慰九原。捐軀恐相隔。稽顙惟自黷。隕淚空罔極。

鬱彼喬林鳥。飛鳴復止宿。依依乳哺恩。母子聲斷續。相隨不相離。終朝來山麓。嗟予鳥不。如母去子誰育。慈景痛先遠。哀冲嬰大傷。循陔思探蘭。陟杞遙瞻哭。臨風愴推心。胡能降此毒。娟娟野棠樹。楚楚百草芊。獨有朱萼花。夷落陵阪邊。朝華忽已廢。晨葩止半鮮。空堂披舊幃。涕泗零如雨。落葉堆寒階。淒風生棟宇。徬徨無所之。錯愕不得語。莫享易承歡。浮生如塵土。瞻彼彌天雲。迢遙霄漢高。悠悠裂我心。千淚隨風漂。孰匪昊天恩。罔念報劬勞。噫風永終。

靈。俄然爲冰消。不卹無辜人。日月何昭昭。

嚴霜凋茂林。薄日冽風吹。天地徒荒荒。睹此雙淚垂。瞻望菽與水。泣血杳難追。瑩華頓衰落。慈顏邈長辭。彌遠亦彌懷。思如流波瀾。死不得相從。抱憾何比擬。哀哉無母人。奚足云爲子。悲情欲訴誰。天倫怨沒齒。

徬徨趨高堂。茂草猶芳菲。母兮長棄捐。父兮長歎歎。歎歎莫能解。倉皇魂魄迷。鬢髮短髮。弟。尋母淚沾衣。吁號欲失聲。父母懷永悽。薄祜遭閔凶。形影與誰依。假寐尙永歎。况復日相思。人生罹此殃。天道亦已非。

山有扶疏木。飄風疾摧殞。殞葉不歸枝。淒然燿燿影。維我顧與復。日月未積景。念言非醜。嗚。條忽韓光冷。流涕以宵旦。中心用耿耿。敬養靡有時。不如自身殞。

景物維莫莫。殘寒掃妖肆。殺火新流遷。霜露愴移歲。懷時惻驚心。胡感底茲辰。朔風吹烈烈。高枝乃斯脆。

其。獨仃淚成血。忽已悲川逝。感風痛虞丘。長夜何漫漫。去日如波流。欲死不欲生。俯仰心空結。愁雲益淒

莫。嗟河邊草。冬枯春滿道。莫傷城上日。暝沒朝復燿。維我靡依人。永罷承歡笑。一去歸黃

泉。生死不我詔。飲恨以吞聲。苦多歡樂少。

頽彼庭階花。一朝殞朝霜。人往物空在。悽慘凝景光。日暮千行血。一一沾衣裳。四壁寂蕭索。蛩聲喧空房。鞠養方離體。音容茲渺茫。永思將何及。流水紛湯湯。

四時忽代序。流光石火急。夙夜望母歸。徬徨靈衣側。徒然幕與几。諸兒對相泣。腸如轆轤。纒井深不停汲。

誰無父與母。亦有稱百齡。伊我欲懷報。竭躬佩綬纓。我身匪木石。焉能云罔生。春草色何碧。秋風茲暗驚。別兒母心苦。兒况如飄萍。氣久已滅絕。莫思懷令名。聊偷此殘喘。爲慰嚴親情。白露零如珠。幽愁與相送。曠野起狂飈。集腋吼天凍。一世母子恩。倏焉空如夢。誦彼蓼莪詩。撫膺無所控。讀禮有餘哀。肺肝徒自恫。

極目望平原。重雲悽鸞鷺。遼鶴何時歸。欲養親不在。曾參痛南遊。北向泣何逮。甘旨杳今生。來生願相再。

哭母(擬離騷十二章)

葉世俗

黃埃結兮悽愁。朔雪吹兮凜冽。維昊天兮何不仁。降茲鵠兮何慘烈。穆皇妣兮生劬勞。出入腹兮靡有賴。奄失恃兮心如懸。罹我思兮情百結。向悲風兮殞涕。啼失聲兮自絕。緬高林兮

鬱鬱數綠葉兮萋萋。羨纖柯兮附幹。感素葉兮依枝。聖善失兮哀榮。慈恩杳兮終何依。欲報德兮逸已絕。心崩頹兮淚如絲。居兀兀兮內摧傷。行忽忽兮欲何之。靈蛇啣珠兮酬志。慈烏返哺兮報親。嗟蟲鳥兮猶如此。何我人兮不令。人生存兮弗思以養。死歿兮弗貽以寧。痛遺愆兮心若擣。躬自悼兮憂悄悄。泣血兮問天故。知天意兮不垂憐。

凱風吹兮自南來。澤萬物兮益蕪楚。哀哀兮慈親。鞠我躬兮實勞苦。既生長兮莫慰母身。終天遺恨兮當告誰語。望彼配兮涕漣漣。感橋樑兮淚流雨。荼毒深兮身自戮。怨莫訴兮心無主。靜言兮遐思。奮飛兮靡羽。

捐踵頂兮莫報母身。血流迸枯兮不復能聞。黃泉隔兮音容滅。欲一見兮杳無因。昏定晨省兮不覩洪恩。奉朝侍夕兮獨有嚴君。悠悠生死兮道路殊別。萊子斑斕兮莫娛二親。

天寥地廓兮浩茫茫。欲問平安兮向何方。民莫不有父母兮奉高堂。我獨何辜兮不得長安康。對萱枝兮心如芒。望白雲兮思皇皇。侍不終兮徒憂傷。千悲掩泣兮瞻空房。迴腸萬緒兮夜何長。愁雲黯結兮埏垠荒。日月無光兮枉斷腸。怨纏綿兮叩彼蒼。我罪伊何兮橫遭此殃。

皇天赫赫兮曾莫鑒我苦衷。神明有鑒兮何事權此百凶。我行負天兮死固我分。我罪瀆神兮神厥余躬。何茲觸廷兮及聖妣。怨氣填膺兮漫長空。魂皇皇兮何地可歸。心切切兮何時

自容思無路兮不可通。其如大夢兮莫問蒼穹。春霜秋露兮氣序紛紜。晝夜昏昏兮愁心如焚。鳥啼花落兮萬物咸欣。惟我斯人兮涕淚長零。呼天問兮何杳杳。徒仰望兮裂寒雲。怨我生兮不辰。積惡深兮何云。

泉路沈沈兮魂無止。徬徨乍出兮身誰恃。生不得兮長在側。死不得兮相依倚。隔如商夢兮奚云子。空生人世兮不羞恥。幽明異域兮音塵否。天涯地角兮長離矣。何年再得兮瞻桑梓。悲號欲絕兮摧骨髓。

噫雨淒迷兮天雲裂。西風冷冷兮吹寒月。夜夜啼鶻兮叫白楊。年年衰草兮枯荒碣。古木標兮寒條折。層冰結兮飛霜雪。慈幃冷兮難承悅。觀遺容兮思嗚咽。心如擣兮斷欲缺。淚湧泉兮流欲絕。淚絕兮繼血。無聲兮氣竭。

不謂冲年兮遽喪吾母。備俛庭闈兮惟事我父。伶仃哀率兮痛沾肺腑。徘徊抑鬱兮淚痕空墮。蒼天降禍兮何繇通。感罪咎叢深兮毫不卹撫。鞠我育我兮歲月未久。白駒過隙兮成此難阻。啜菽飲水兮莫逮親存。立身揚名兮亦何所補。天長地久兮終古有窮。吾心憂愁兮何途自處。

維山高兮無陵不平。維水深兮無涸不盈。日月逝其何疾兮。痛慈親之遐征。歲既去而不

歸兮。恨殷殷而填膺。親何繇而再返兮。庶望待乎來生。窮萬古而可盡兮。獨一見之無憑。感仲  
仲于子心兮。奚旦夕其可寧。

哭母（四言體十五章）

葉世侗年十六

交交黃鳥。集于灌木。我生不辰。罹此凶鞠。穆穆顯妣。聖善劬育。我無負天。于何戾瀆。不弔  
昊天。降此大酷。

油油茂草。依于原嶺。我生不辰。惟其所恥。哀哀母氏。拊腹勞恃。我罪伊何。何辜于匪。不惠  
昊天。降戾何已。

菀彼平林。有鳥萃止。吁嗟烏兮。猶知反只。吁嗟人兮。不我報以。德音莫遠。俾也可致。哀哉  
人斯。其毒何侈。

江有決汜。日盈其源。山有嘉卉。載謝輟宣。相彼茹依。靡有推遷。哀我人斯。何卹之先。匪直  
匪報。畜我不全。心之恫之。摧腸以干。

鴻雁于翔。飛鳴颺颺。彼候人兮。顛之羅之。之子無死。尙復能回。我日搆鴈。曷云能夷。有懷  
明發。曷云能比。心之念矣。涕惟零兮。

我行其祀。憂心綿綿。眷我庭闈。莫知我瞻。上慎無棄。已矣終焉。興懷及之。遠于鑄之。



陟彼陔兮言採蘭兮。彼其之子衆競于搏。嗟予有之不盈。雙篋薄言歸養。惟父歎兮于將。慈妣不我餐兮。拊膺泣雨中心鑽兮。

瞻彼中原揚顯鄰鄰。于惟釜祿鮮不逮存。民莫不報我獨何悖。誰非罔極寧我匪人積惡。深谷莫詰母弘北向流涕終焉是承。

濟濟多士桑梓于穀。粲粲磨錯匪于玷辱。民莫不善我獨何戮。均焉毛裏伊我不屬。無令之人莫荷母育鮮民之生。惟憂用服。

莫高匪山亦登其峰。莫深匪泉亦履其澗。洪洪顧畜欲報何從。豈不懷復哀此罹窮。終腳永負。惟自羞恍極矣痛深。剖髓裂聰。

渺渺泉臺哭兮奚益。漠漠幽明怨兮奚及。劬勞恩愛空兮消息。豈不懷答何以比卽。捐身竭踵。未可輕歿。瞻之望之。伫立以泣。

秋日載烈百卉凋芳。鳴鵲嚶嚶厥草央央。都人士女燕燕居遑。或彼菽水則此蒲彰。嗟予罔極。觸目摧腸。何爲我兮。獨遭此殃。

晨露宵零枯葉墮隔。涼章淒淒寒風襲襲。歲聿其莫日月其亟。羨彼歸鴻提提載習我心之愛。曷維其輯泣無聲兮。氣咽以吸。

昔我省兮。父母孔仁。今我來安。惟父斯旻。昔我省兮。承有餘欣。今我來安。堂有哀聲。何依何恃。出入銜悴。憂懷如醉。血流崩潰。

昔我于溪。菀藹綿綿。今我于道。鞠爲茂草。白華頽秀。萱枝零槁。夙興夜寐。憂心用悄。觀維遺物。怒焉空擗。天之夢夢。自古不少。誰將予感。愬彼穹昊。

哭母(四首)

葉世儋年十二

蒼蒼不仁。降此凶暴。罔極之恩。伊誰不報。我獨何人。昊天不弔。相隔九原。黃泉路杳。仰叩皇穹。迴腸百絞。心之愁傷。惟憂用老。陟岵岵兮。惟父我詔。我罪何極。我惡何深。罹此凶毒。寧自槌心。控訴無繇。不如無生。瞻仰恩重。實慚于人。吁嗟天也。獨不我矜。一朝隔絕。千秋如故。想念劬勞。徒懷悲齊。惟我孽身。殘酷是赴。哀哀母氏。慈躬我顧。撫我成人。昊天降怒。未久膝前。已恨終天。淡河終鮮。空痛藹綿。二人事養。人孰不焉。我惟父矣。上帝懸憐。溟漠居高。不我訴矣。徒倚何依。惟自咎已。何慰母心。肝腸斷幾。號爾失聲。人其莫與。夫復何爲。徒懷抱恥。鳥也猶然。母子隨止。嗟乎人生。世所不齒。世異路殊。空想悠悠。死生一隔。欲見難求。恆自碎身。德終何酬。痛何所止。怨何所休。母氏劬勞。育我辛苦。天邪人邪。誰無父母。我亦惟人。受此苦楚。母子相離。報何時節。天亦有滅。地亦有竭。水亦有枯。恨兮何歇。

又(五言絕句十首)

律律南風寒。布衫血幾乾。劬勞何日報。搔首問無緣。  
我誠何負天。昊天不我憐。徬徨空殞涕。有淚自漣漣。  
哀哀思罔極。慘毒向誰云。杳渺莫相顧。呼天天不聞。  
昔我事雙親。今惟在父膝。獨對蒼穹悲。煢煢但血泣。  
我生罪何隆。罹此恨何逢。未報劬勞德。先遭罔極凶。  
欲訴聲先塞。心枯迸淚枯。世事堪如許。浮雲仰自過。  
淒涼木色荒。飛鳥斷人腸。終天恨何歇。冷日正看長。  
事親昔所幸。今日痛魂消。鵠哭心先碎。恨不奮長翮。  
兩淚血難禁。往事杳何尋。彌念彌焦割。深思涕滿襟。  
風飄樹色稀。子無母何依。明月消魂魄。心同斷葉飛。

哭母

葉小紈

日黯黯兮淡無光。雲靈變兮飛嚴霜。一夜斷猿叫空峽。幾回裂盡愁人腸。愁深有天不可問。問天何毒降斯殃。我母繇來性自然。花花月月共相憐。愛月秋宵嘗獨詠。栽花春日對調絃。

調絃獨詠思無已。熟讀楞伽學坐禪。禪心每借芟階草。買得鮮鱗盡池沼。爲忌才華天不矜。連年貧病憂如擣。奔流日月無時歇。電光朝露易消滅。本期百年侍慈顏。誰料一朝成永別。重泉杳杳信難通。繡帷寂寞寒風冽。悽悽老父形影單。皇皇幼弟悲聲酸。忽忽思親向故寢。猶擬昔日承餘歡。乍見遺容漫陳設。淚如湧泉聲嗚咽。庭梧葉墮寒煙。寒煙冥漠環玕折。寂寂幽牕人已非。塵蒙書卷架空衣。蒼苔凝紫徑花老。落盡江楓泣雁飛。獨有凄其夜月空。更深還照舊籬櫺。青紅爛爛留殘焰。碧簾淒淒倚故籠。自訝當時輕說恨。比來此恨恨無窮。

哭亡弟聲期

葉世佺雲期

狂風號野裂天寒。泣對青衫袖幾乾。驟剪金芝鵬血灑。長埋玉樹雁聲單。虛將茂草成灰冷。忍向荒丘積恨殘。零雨朝朝驚淚眼。夢樓惟有斷欄杆。

永別天涯寂畫廊。殘編遺篋對心傷。相思夢絕生春草。遠望身虛怨陟岡。有淚自如離峽雨。餘哀渾似落秋霜。梨花故屋還依否。從此蕭蕭泣白楊。

十八年來夜夜同。一朝零落怨東風。淒涼煙月南歸燕。嘹唳雲天北去鴻。香草不靈招遠夢。荆花無色閉虛櫺。何時再把樽前酒。小院芳菲共晚紅。

依依連袂隔花朝。忽載回風去碧霄。易水不還悲擊筑。洞庭一別怨吹簫。凡今信莫如兄

弟自古何嘗惜玖瑤。壯志未成身已死。黃泉空負泣題橋。

昔我鸞龍同氣餘。今茲凋墜恨難居。士衡莫贈承明詠。杜甫空懷舊日廬。松露獨悲人去冷。竹林長往徑留虛。悲思幾度愁無奈。何處天涯可寄書。

湖光落日正悠悠。可是忘機任白鷗。北望祇看歸路絕。東來空悵逝川流。窮途自昔悲難解。歧路于今哭不休。一夜寒風吹悶雨。蕭條只有別時秋。

聚首韶光亦幾何。半生今是別離多。家遺張湛淇松前。鳥人聽袁山酒後歌。絕國風雲魂黯黯。平原煙草淚滂沱。可堪骨肉渾如許。長向春庭怨綺羅。

游魂千里暗氛氳。祇是難尋枉淚紛。怨氣橫銷瀚海月。愁心遙斷隴山雲。酒慙彭澤空傷弟。誅學河陽忍弔君。回首可憐前夜雨。寒牕猶與共論文。

身逢荼毒恣何滋。叫破蒼天那得知。飛鳥亦憐人去後。落花應念夢歸時。秋風幾陣生離淚。夜雨千聲死別思。但覩茫茫百感集。與君相見再無期。

庭前煙月共徘徊。兄弟相看有淚摧。心事百年常已結。情懷萬古不須開。家園搖落思君去。舊澤湮消但鬼來。徒倚欲將搔首問。吳穹猶是未知哀。

蕭瑟飄風木葉愁。思君獨聽夜猿秋。生前命薄梁家案。死後名垂衛女舟。春鳥自啼楊柳

岸。飛花偏落荻蘆洲。年年有恨關山老。月暗江天一古丘。

自跨青牛紫氣乘。遼陽柱鶴總無憑。崇蘭獨見秋霜落。宿草深滋曉露凝。斷盡九腸終不返。拭穿兩眼只如恆。依稀笑語渾猶在。可是相逢夢裏曾。

哭亡兄聲期

葉世俗咸期

憶昔蘭艸在目前。一朝生死隔重泉。荆花萎謝飄紅雨。棠萼凋零送碧煙。情伴孤飛春盡雁。腸隨叫斷峽中猿。黃昏斜月人何處。獨對殘燭聽杜鵑。

陰雨瀟瀟掩寂扉。幽明異域永相離。論文已隔泉臺路。把酒難尋地下時。何日還將庾袞弼。無年再共李充衣。天邊雁序凄然過。長恨人生不共飛。

鶴唳華亭可復聞。凭欄空溼練花裙。天高地闊悲風懷。水渺山枯落日曛。漠漠青鸞遙絕塞。依依黃鵠恨離羣。征雲一去終無返。何處相逢再見君。

雲海茫茫不可期。長眠無路問誰思。虛房晝掩蒼苔鎖。空簾宵沈碧粉遺。湘竹灑斑愁眼裂。羊碑墮盡淚痕滋。陰風夜雨敲寒夜。卽是尋常共被時。

呼天欲問竟悠悠。總帳相看恨莫酬。歸燕亦驚幽棧閉。哀鴻似助旅魂愁。萸萸香寄登高淚。春草徒懷入夢憂。聚首一生長已矣。遺編剩卷冷誰收。

層冰飛雪殞朝霜。瘁木驚鷗草色荒。二鶴從今長失羽。八龍此後不成行。鴻都已絕招魂術。海畔空傳返魄香。淚滴西風衫袖溼。子規聲遠繞空廊。

紗幮同榻共清宵。自愛瓊筵伯仲交。騏驎竝馳驚絕轡。鶴鴒連影忽中飄。情昏每念人還在。痛極猶愁夢見遙。冥冥三秋啼血淚。魄歸望帝杳難招。

蒼天降穠肆妖氛。不論人間玉石焚。芳草含煙愁逝水。春醪仁鶴怨停雲。平原東去情猶感。康樂西征袂忍分。况是故園長日斷。可憐流月汎虛墳。

蕭蕭青塚夜啼烏。埋骨窮泉幾痛呼。未聽楚歌愁欲絕。如聞桓曲淚長枯。芝焚玉殞千秋在。蕙茂瓊芳萬古無。神往似同君逝者。暮雲黯黯結蒼梧。

哭向春風淑景辰。清明寒食一時新。胡笳拍盡難傳恨。薤露歌窮但愴神。野水茫茫魂失侶。邛廛擾擾日誰親。蘇仙縱是重能返。騎鶴歸來無故人。

### 哭七兄聲期

葉世侗聞期

天際寥寥黯日暉。暮光捲雨淚沾衣。凌雲未賦生前在。松露空歌死去非。黃葉淒淒愁欲絕。白楊隱隱共誰依。斷腸莫續人何見。寒月霏微映愴歎。

憶昔生時蚤見兄。無端忽去恨覺驚。風流頓盡張融酒。哀慟終慙謝尚情。巫峽啼猿三寸

斷天邊歸雁一聲驚。故園此別千餘載。欲待相逢夢玉京。

人亡惟有景朝昏。塘上新蒲昔斷根。悵望山丘空故跡。蕭條華屋絕生存。未聞白曲衫猶溼。開遍黃花泣盡痕。揮手從茲天海隔。可憐衣被永無昆。

泉燈閃閃照紗幘。竹榻空遺舊日襦。峴嶺猶登羊祜否。羅浮能學魯公無。清歌喚徹終何奈。濁酒澆殘祇自吁。寂寂東風蘿薜掩。凄然搖落倍傷忬。

徑外寒林初蕊幽。遺編塵鎖觸心憂。輒思風月傷玄度。若問人琴慟子猷。題柱長隨西落日。移文徒映北邙丘。悲懷無限借流水。嗚咽波聲夜夜愁。

鸞龍昔志自居奢。哭對今朝慘莫賒。星社盡成離黍景。邨人忽作緩冠家。松風落響愁相問。竹影飄疏恨與斜。啼盡紅鷗終已矣。蕭蕭寒樹又棲鴉。

舉頭仰望訴高天。欲訴無緣淚湧泉。落照荒荒愁碧漢。斷雲漠漠怨蒼煙。六龍異日終成悵。八駿于今不更全。揮涕風前誰可語。梧桐滴雨恨綿綿。

古木淒淒長若陰。幾回向夢亦難尋。風飄箴鐵驚悲志。雨灑階弁擣痛心。法護何嘗推我右。僧彌今最憶兄深。追思往日于焉絕。千斷肝腸黯自愔。

荆樓幾載弟兄安。事故人亡別路漫。秋草獨餘晚照寂。總帷空似曉猿寒。不堪鳥怨三春



友况是花飛一夜殘。蕭索故房烟雨暗。閒來偶向盡心酸。

野花日日助愁盈。泣向東君恨不輕。呼吸何繇通帝座。音書無復寄交盟。紙錢一百燒千淚。玄酒三杯奠兩楹。黃鶴歸來人已故。甚時攜手敘生平。

哭亡兄聲期

葉世儋退期

絕魄離魂杳莫尋。天涯此恨恨何深。孤猿幾嘯雲霄暗。斷雁連鳴關塞陰。檻外悲風空涕淚。野中迷霧黯凄森。從今有話難相問。數陣黃沙捲痛心。

梨花開遍益淒其。絕望還能相傍依。哭處江山皆慘裂。啼時天地盡傷悲。雄心未向人間發。壯志難從泉下揮。一世因緣恍已了。狂風颯颯過重帷。

肝腸百結泣如泉。獨對茫茫無道天。戶外秋蛩聲斷續。山頭晚鳥叫殘連。朝朝慘觀花開後。夜夜空悲月落前。從此一生相隔絕。與君兩路淚潺湲。

昔年歡樂再無因。幾向黃泉哭自頻。生死一朝相與別。幽明兩境已非親。滿溝夜雨空堪上。洌洌秋風殞水濱。惟是杜鵑枝上血。止留書篋淚沾茵。

西風懷洌斷人腸。去後茫茫愁正長。幾度寒烟迷冷月。數回細雨溼清霜。當年喜共連枝樂。今日悲分同氣傷。何時再起黃梁夢。仰視欷歔散雁行。

撫景愁心奈若將。飄風陰雨滴空房。茫茫捲盡烟霞塞。冷冷吹來冰雪香。書卷讀殘空有  
餘。遺文詠剩莫成章。可憐壯志歸何處。一枕南柯永夜長。

同室同居十二年。生離死別一朝前。心傷春草無因夢。腸斷秋楓不復連。地暗天昏容哭  
鬼。山青水綠聽愁鵑。何時並枕宵眠覺。血淚重重鐵硯邊。

悠悠一去復何之。故室蕭條感黍離。草色叢叢今已落。花萼密密盡成稀。月明應見傷心  
痛。秋水空澄照淚絲。最恨皇天偏毒我。半生祇有斷腸詩。

回首從前總是空。呼天拭淚對東風。半生卻向愁中過。一世堪從夢裏逢。數載恩情徒付  
想。幾年篤誼忽成窮。傷心無限觀交集。殞涕徬徨有恨終。

雨淚雙垂腸斷千。雁行飛散竟難全。汪汪殞涕辭殘歲。忽忽傷心送舊年。一去天涯長渺  
渺。比來人恨永連連。哭兄未訖還悲弟。半盞孤燈隔九泉。(時歲已暮并悼八弟)

(年止十二同諸兄哭母哭兄作如許多語實不增減一字也)

### 哭聲期弟

葉小紈蕙綰

慷慨襟期志未調。一朝回首臥蓬丘。壯心難與隨流水。夜夜寒光射斗牛。  
莫向泉臺怨不平。樓成白玉赴雲程。詩詞總是雕蟲技。不屑將來與世爭。

數載相攜姊弟情。一朝霜露別離輕。寂寥書館無人到。零落殘篇伴月明。  
當時不解別離情。雁羽傷殘黯黯驚。幾度問天天不答。幾回呼地地無聲。  
春花秋月木無情。對月看花淚暗傾。聽外芭蕉清露滴。猶疑夜半讀書聲。  
少小英姿志不羣。前身應是漢終軍。眉峯奪得青山秀。數歲能書草似雲。  
憶昔同遊一室中。每談立世有英風。歎嗟泉路悲相促。壯志難消化彩虹。  
文采風流意氣奇。紅絲空訂百年期。可憐少婦未相識。低首無言淚滿頤。

挽從弟聲期

葉世任 聖旂

才華標格信翩翩。霄路方期問祖鞭。忽訝相如終病渴。最憐叔寶竟無年。  
綵毫點盡銷虹氣。神劍光埋暗斗躔。雁影茫茫何處覓。啼痕空灑向高天。

誦詩愁誦鶴鴿原。五內悽傷不可言。光景依依宛如昨。音微漠漠杳難援。  
東遊蓬島多仙苑。西去蓮臺是佛門。石上三生應有託。無須招卻楚些魂。

挽從弟聲期

葉世位 一旂

曠輪瞻西徂。河流遶東注。滔滔勢不返。觀化等飛鷺。人生百年期。俟焉花上露。  
但傷常韶齡。窈窕向長暮。英英我聲期。千里端驪子。生來十八年。胸懷盈墳史。  
下筆累千言。氣吐虹爲紫。

諸父每掄才。嘖嘖僂前指。方期翺層霄。弓裘濟世美。片玖訝蚤折。聞寂遺研几。春耶散陽和。弟何遽不起。修短良前繇。造物亦忍矣。摧肝掩涕泗。痛彼原上鶴。雁序萬一堂。弟獨如晨星。修文地下乎。玉樓題青冥。果爾得九還。應譜列仙經。願乘嶺山鶴。歲一來除庭。

挽從弟聲期

葉世儉慈仲

幾經握管共商量。一夜淒風斷雁行。春草自生還自萎。更無夢魂到池塘。  
修文元屬謫仙才。得道應從慧業來。五濁已知難久住。偶因遺墨動悲哀。  
粟珠兜率度朝昏。骨肉相看數沒存。最是西河重情累。好教青鳥一傳言。  
高天欲問總模糊。腸斷山頭石望夫。見說時時虔禮懺。可曾將寄到君無。

# 彤奩雙葉題辭

吳汾諸葉。葉葉交光。中秀雙姝。尤餘清麗。驚才凌乎謝雪。逸藻遠於班風。湘濤晨捲。新文  
與旭彩齊暉。金穗宵垂。細慧同夜鐘較靜。裁繁花子皓腕。剪秋月爲冰心。蓮鳥能飛。翠嫵皆語。  
一則天末鳳棲。爰隨簫史。一則春塘鴛睡。未許山陰。真連璧之傾城。洵多珠之聚掌。影闕金闈。  
或惟母認。名鑣紫琬。不許人知。豈期賦樓雖有碧兒。侍案復須玉史。妹初奔月。姊亦凌波。嗟乎  
傷哉。天邪人也。覲遺掛之在壁。疑魂影之猶來。痛猿淚之下三。哀雁字之失二。左思賦嬌。不堪  
更讀。中郎絕調。今復誰傳。於是檢厥遺文。花花卸淚。吟其手澤。燕燕窺牕。或崔徽真在卷中。卽  
夫人儼臨殿外。授之梨氏。用告邦人。觀其瑤情蕙質。洵天遣以暫來。知夫霧骨煙姿。定人留而  
不住。東家有女。請莫效顰。南史若來。幸爲編傳。遂于懺除綺語之餘。有此不揣揄揚之贅。弁諸  
冊首。留作新譚。

天台無葉涵子智朗槃談識

# 彤奩續些小引

蓋昔返生缶響。愁言擊餘。雍葉蕉文。聊舒條獸云爾。爰有名閨麗人。咸垂咨悼。扶風輔內。舊是班家。陽夏郡中。夙稱謝閨。聰開翡翠。方覓新粧。粉印芙蓉。隨搗佳句。梳蟬雲之薄鬢。彩奪江郎。寫麝月之雙蛾。九分越女。才超左嬪。遠追公主之辭。質比令嫺。均擬婕妤之怨。金屏題罷。銀匣裝來。靡不遙惜。清揚。還忤婉孌。軫憂鄰笛。結愴樓簫。鏡泣鸞飛。遂勒青松之榻。琴悽鶴別。何殊黃絹之碑。未訪潛英。紅箋代石。無勞蘅枕。碧篆留仙。煒矣瑤函。猗歟瓊管。至於世交東武。有似楊侯。館築西秦。卽同甄后。芳飄柳絮。羊曇申舅之庭。美映椒花。徐邈邢姨之戚。彭城姊妹。漢宮吹曲之年。康樂池塘。荀娘解圍之歲。情關倫屬。悲感懿親。俱霑湘水之襟。竄慨楚妃之歎。雖縷綿惋惻。鴛鴦之製非多。而惆悵低徊。嬋媛之傷已盡。洵明珠之六寸。固靈草之一枝矣。并暨詩賦文誄。共爲續些二卷。上昭拜賜之章。下列志哀之什也。又友人遊仙曲同附上卷。

崇禎丙子釋迦佛浴日天寥葉紹袁題

彤奩續此二卷上

名媛挽什

沈紉蘭（字開觀秀水大參黃履素夫人）

悼葉瓊章

讀瓊章詩草。追憶亡女。慈緣雙蕙。痛不自禁。擬次其姊昭齊蕙綢二十韻。同深惜玉。竟以淚逼情癡。愁催肺裂。獨寐寤歎。咽不能成。聊繼伯姬之哭。敢摹西子之顰。（夫人女雙蕙。字柔嘉。年十六歲。天啓丙寅年卒。才色俱絕。有詩行世。）

卽今風雅若知音。和女倉庚嘯碧陰。留得返生香不盡。一時詩草淚俱深。殘篇讀罷想生前。露晞朝葵十七年。北望未歸亡女魄。得君情事越淒然。（余二女俱以入都。病殞中途。年與瓊章正相若也。）

姊妹才高各不羣。餘香猶惜小鸞裙。一償詩債遊仙去。可到三山伴紫雲。幽魂清韻亦生寒。幻想手神夢裏看。庭際月明人寂寂。宛然吟咏在欄干。

可憐同有惜花心。玉冷珠寒萬古沈。詩骨尙香應不死。卻疑仙鳥未曾尋。  
有時風雨讀遺章。恍接芳容共夜長。豈獨寫懷能引淚。畫屏十隊亦堪傷。  
識破癡明總電光。幾宵清夢紫檀床。思君好作忘年友。鶴去天邊又渺茫。  
每借閒吟留寫情。慧根可解死生輕。朱唇玉色還瑤閣。那得金桃再一評。  
懷人無計問泉臺。去後青閨定長苔。天亦忌才驚短夢。西方應遣白蓮開。  
欲寫遺篇壁上粘。霜綃常恐淚痕霑。而今唱和誰同調。賦擬招魂不忍拈。

再和葉夫人芳雪軒元韻二首

寶樹摧殘况幾條。招魂我亦問天遼。同憐女也棲青塚。可有仙乎引碧霄。  
癡絕尙猜人未死。情深越苦夢多遙。卽今淚滿汾湖水。那得重來恨始消。

浮生莫認妄爲真。此去仙仙定遠塵。况有詩名堪壽世。不妨文鬼再驚人。  
十年好夢初方寤。一日迴腸盡作辛。依舊夜臺呼姊妹。及今休斷未來因。

黃媛貞（嘉興人）

挽昭齊



七載人間語不輕。誰知未得遂生平。高情獨有親相惜。恨字難教月對明。空裏蓮花青苑轉。門前忍草綠縱橫。一從石屋題詩去。只有庭前鳥數行。

遺來佳句盡心酸。我復多情忍不看。只說青山長涕淚。忽當寶筏上輕安。才名了得千秋恨。玉骨平分片月寒。更值愁人無限淚。不勝行坐怨闌干。

### 絕句十首

屋走梁塵壓繡紋。不堪重向月中分。人間未遂山棲話。獨自吹簫載白雲。  
冷日無光錦席虛。舊時蝴蝶識空除。閨中不道知音少。卻悔當年錯讀書。  
幽竹孤涼入楚辭。一簾風景怨當時。春來依舊鶯啼月。滿樹梨花白爲誰。  
風塵滿目歎浮生。冷落雲粧鏡尙明。此日碧峰應得住。春來春去石題名。  
芳心碎向夕陽中。好句傷神夜夢同。一片斷香吹不住。卽今誰見落花風。  
一身無復怨何如。洞哭青山未結廬。子夜經聲新覺悟。滿簾秋雨亂棕櫚。  
慈母含悲爲說經。汗香身佩卽惺惺。西來若踏金沙地。始悔愁時夢未醒。  
綠水青山空斷腸。強骸生化總茫茫。卽今寂寞梧桐裏。愁雨因誰滴夜長。  
錦欄銀管舊啼痕。姊妹悲深恨尙存。若與會愁人共見。管教長日變黃昏。

月涼珠氣夜深深。七載愁來直至今。舊日青山無路入。一軒芳雪見禪心。

挽瓊章

誰道人間十七年。不親圖史卽談玄。驚來剩草言言快。想出文心處處憐。蔬闌香初寒歲。月。玉樓魂不奈風煙。畫眉未得新粧失。一自屏開飛上天。

自笑能分五日綠。翠旄湘卷尙依然。香泥玉骨千年煖。神住靈峯滿路仙。新詞填成無夢。寄。舊雲吹去有愁牽。腕間丹字頻頻看。待欲言歸阿母前。

絕句十首

花影依然曉露清。啼來烏盡說難平。芳心不肯隨春活。獨向瑤臺坐月明。  
茫茫何處上仙舟。汾水無情尙敢流。一自彩雲吹樹散。琴書寂寞鎖空樓。  
空雲斷草下汾沙。阿母無心再種花。只恐好春行閣上。任他塵土漲屏紗。  
翠掛金鈿照肌膚。重泉應道月輪孤。歸來只恐驚親夢。夜半乘雲出井梧。  
斜闌草樹月分明。來去空中影自輕。花管雲箋言不盡。碧山深處學無生。  
一身金粉亂香煙。侍女頻催看曉天。忽道閣中無洞壑。笑將歸路問神仙。  
花尙含情蕊未齊。香風無力出深閨。傷心又惜芳菲在。依舊梁間燕吐泥。

天地茫茫類露清。欄干影盡鶴無聲。多情庭樹春還綠。不復蓮花上草行。  
明月青山怨此身。多情何處不愁人。疏香閣上無來日。玉影眠枯地下春。  
碧落空飛半夜霜。綰金鳳子下秋粧。笑同神女傳丹法。忘卻汾湖水一方。

黃媛介（字皆令貞妹）

### 傷心賦哀昭齊

夫何宛麗之佳人。綽柔儀於四教。和春風而時惠。輝秋月而朝耀。映玉樹於一庭。接明珠於四照。身幽修而善豔。魂終絕而誰弔。况迺王家好婦。謝氏名閨。抱天壤之奇恨。抑人間之酸。悽媚比月娥之色。文奪天孫之機。性宛約以多麗。眉嬋娟而恨齊。思青山以自逸。怨路草之萋。萋欲談玄之無日。嘆魄絕而魂迷。又豈仙遊有路。物化多方。竟停停而不返。冀島島而復陽。罄慈親之涕淚。斷兄弟之愁腸。何昔日之奇妙兮。志幽沈而不彰。我素所未接兮。亦哀思而感傷。恨大化之無情兮。指天意之茫茫。人既有所缺陷兮。何必生此靈淑。具揆天之妙才兮。生照世之華族。稱獨立於此方兮。映輝容於金屋。感至精之真氣兮。嗟無美而不畜。圓滿固造物之深。伎兮。來意中之隱毒。無人生之歡笑兮。尋松柏之幽鬱。愁無來而無去兮。恨倏浮而倏沈。看幽

花而掩涕兮。訴芳草而傷心。精神日以自鑠兮。竟銜悲而至今。適示疾而奄藏兮。絕鳴絃於素琴。乃惜篇章餘澤。翰墨遺芳。無安仁之哀悼。徒捐淚於卜商。留踪跡以感人。惟阿母之恨長。不分明而自析。隨白雲以飄颻。雖游仙之可樂。何遽絕此商量。嗚呼哀哉。清新無豔。婉順多情。誦君詩之絕筆。若有覲於生平。尋釋宿粧之下。悲吟風雨之上。識此意之重艱。黯幽心而自憫。多姊妹之難思。數春秋之長往。又若詞歌累闋。清心如死。盡人憔悴。窮天披靡。柳黃綠而懷摧。花紅白而怨起。何斯人而負才。竟所罹之如是。嗚呼哀哉。亂曰。高天厚地生此人。宇宙鍾靈懷柔真。秀闈玉樹曾娛親。思安詠紀窈窕身。才謙詠絮誠佳人。胡然不祿哀青春。紅顏蕙質等飛塵。今欲一見渺無因。

挽詩十絕

未能圓滿世間情。何必爲愁了此生。今日試將遺稿誦。斷魂真處不分明。  
傳聞名媛出名家。何事年年獨怨嗟。傷透好心人不識。錯將詞賦喚雲霞。  
夜色青青變柳條。芳魂絕去不能招。當年若見黃皆令。深怨深愁應自消。  
瓊蕊明珠過眼情。百年亦只是浮生。我知世事尋常甚。阿母堂前恨可平。  
念到心傷夢亦憐。此中何處問因緣。人生誰不期多福。至此何能莫愴然。

人事曾曾未肯忘。青天杳杳月荒荒。碧山不是無情處。我恐仙遊更渺茫。  
無數新詞屬恨多。半生文管憶煙波。一燈自照維摩室。腸斷因緣竟若何。  
春牕數日日陰陰。初柳飄絲帶語禽。汾水芳魂何處落。梅花香絕暮煙深。  
漢皋雙影已同歸。金屋空存在日衣。心折慈親思婉孌。回文何日了殘機。  
一牕紙色白泠泠。慷慨憐人酒自醒。字字傷心俱莫問。品題風景最伶仃。

讀葉瓊章遺集

甲戌春。家仲手彤奩合刻相示。曰：此馮茂遠先生欲汝爲瑤期挽歌詩也。遂尋釋數四。盡其諸體。詩則與古人相上下。間有差勝者。詞則情深藻豔。宛約凝修。字字敍其真愁。章章浹其天趣。成風散雨。出口入心。雖唐宋名人。亦當避席。但訝彼正桃李之年。何爲言言俱逼霜露。惜花太甚。遂成刻露飄零。詠鵲未期。竟兆慘離情事。况迺貌出天妃。厭彼北方之詠。情空漢女。惡聞南國之稱。莊姝明慧。窈窕柔綽。玉骨冰肌。秀眉明目。其性情之端。顏色之好。才思之穎。世之所期者。罔不克盡。逆數古名媛。誰得如君。第恨天桃及詠。已折連環。鵲駕報成。竟沈寶婺。苟奉情之深情。未視傾城之色。徒爾神傷。潘安仁之哀逝。永存摧翼之悲。於焉心死。謝砌蘭焚。山鍾玉碎。風凋茂綠。正屬芳時。雨謝豔紅。卻當盛日。催粧未咏。薤露先歌。香禮未成。奠漿早薦。嗚呼。

昔日幽思嘗游神粧鏡。今朝異慘。竟泣血總帷。聳天悲歎。不復見還華山之魂。絕世哀號。何能共詠。秦臺之月。尚冀珠去可還。絃斷能續。竟惜瓊花無種。電碎絕香。芝草無根。霜嚴斷綠。有父有母。何以爲情。仙蹤遠駕。已失結綯之祥。鶴帳晨驂。罔協鵲巢之什。綺羅無色。收拾香奩。鼓吹無聲。沈埋簫管。堂次丹旆。魂來失舊時之音。鏡舞青鸞。情至悲今朝之影。又若房櫳靜悄。翰墨飄零。遺衫剩履。徒傷父母之心。秀句名篇。空發弟兄之淚。一朝長夜。兩度芳春。麗影沾塵。鶯花莫覩。貞魂埋玉。雲風絕吹。一家骨肉。文好情多。連帖宮商。思窮痛複。嗚呼。泉臺難寄。仙路曠征。奚爲辭曰。高樓景麗。朝日明。紅粧閉兮塵盈盈。玉樹折兮連枝傾。心氣失兮掌珠沈。玳梁摧兮彩雲散。日月晦兮何時旦。寶鏡碎兮簪玉斷。衣繡消兮帷朱暗。湘絃絕兮芳香換。玉簪跌兮紅絲亂。絕地窮天不可見。

挽詩十絕

一番參究失三生。明白因緣怕有情。待到錦帷春色動。笑隨天鶴理瑤笙。  
一時摧換許家名。歸去誰憐弟與兄。白石青松常有夢。寂寥不是舊精誠。  
香吹未已此中煙。記得詞中第幾篇。韻語冷隨珠散彩。閒心遠似月行天。  
魂斷江南不可招。秦家樓子絕鳴簫。堂前切莫多啼恨。歡樂無非似寂寥。

春色依然到小門。舊時簾畔語猶溫。慈親遍欲尋方術。燒盡名香不返魂。  
一時驚見畫圖新。在日蛾眉寫未真。淚水雙珠何處落。不知誰見兩仙人。  
碧水無聲影不留。疎香寂寂閉春秋。可憐圓滿人無得。淚變紅巾哭未休。  
人人身事屬哀吟。歡喜惟君得好心。多少風光消不得。白楊青草更愁深。  
一春愁雨落名花。古樹淒涼叫暮鴉。昔日青衫香未散。沈沈樓閣閉嬌紗。  
不向簾中數夜星。一庭芳草泣寒青。人間好事名初備。未熟黃粱夢已醒。

吳山（字文如金陵人）

挽葉瓊章

吳江葉瓊章十二歲有奇才。十七歲有奇慘。予讀遺集。始極悲。將五日而負結襦。既極羨。羨先五日而脫縲網。瓊章本仙也。其見諸吟咏。與自命黃夢子。無非仙也。然則天之折瓊章。亦折今日之瓊章耳。實全瓊章也。瓊章今辭葉氏之瓊章耳。瓊章尚在也。予久欲作挽。焚呈瑤几。但愧瓦礫。羞見珠玉。幾回漸進。然亦不肯掩予慕弔之意。聊就短句。君其聆之。

人生長夢耳。寓者造庸奇。有慾須終夢。無情夢不癡。君遊無夢夢。不俟黃梁炊。假君生百年。僅我殊毛皮。假君亡十八。君必悲玄絲。十七非大慘。良繇鵲駕時。銀河如可就。弱水慮無涯。自此珠辭掌。瓊花別玉枝。百詩收色相。一偈待禪慈。荏折吳江冷。蕭吹碧海劇。留名香父母。遺句服巖眉。魄助秋蟾潔。魂歸箕作詩。瓊漿天上吸。酬補合歎卮。未了悉先了。稍遲覺也遲。信君糞夢子。火候有玄窺。

王徽(字 蘇州人方伯王二溪女)

挽葉瓊章

生長金閨十七春。帶來丰骨不凡人。志辦雲表書千卷。筆灑秋空月一輪。  
煙霞爲質玉爲顯。恍是飛瓊月下來。一曲瑤琴一樽酒。挑燈重上讀書臺。  
正好秦樓翫月華。忽焉吹折鏡中花。傷神開殺張郎筆。不得新眉效柳斜。  
雙掌珠離寶可憐。斷腸聊賦悼亡篇。綠廳彷彿親遺掛。何似蒼顏在膝前。  
仙才玉貌古難稱。愧我緣慳見不能。欲附青鸞候消息。知向瑤臺第幾層。



沈媛（吳江人即周蕩英母夫人）

挽葉昭齊甥女

柳絮因風澹遠空。海棠照月霧香濛。莫愁強字盧家婦。閉影梨花芳雪中。  
烏藻頻溫語砌蛩。不教詩卷冝蛛封。夜臺屬和瓊章句。花落庭幽鎖徑重。  
紅香昔已澹粧樓。宿莽蕭蕭冷一丘。爲痛鶴原歸夢促。鏡留潮汐淚光浮。

挽葉瓊章甥女

彷彿瓊姿照筆床。寒歸空閣燕歸梁。最憐琴絕流波引。句裏梅花度暗香。  
冷然疏韻與雲期。自勝風前玉映時。衮夢未成秋夢短。蕉牕佳話美人貽。  
十七齡來聚沫餘。芙蓉城冷待爰居。臂文朱纒他年識。祇恐天都署掌書。

周蘭秀（字蕩英吳江人）

春初雲霧偶讀葉昭齊瑤期兩表妹遺草紅芳雙殞燕羽差池聊  
拈短咏臨筆愴然

挽昭齊

閒懸鎖月照幽姿。芳雪飄零有所思。莫謂愁春春不覺。語愁今可共瑤期。  
遺詩猶貯舊書幃。林壑緣深夢後非。簪烏倦啼花不掃。古丘殘月倩魂歸。  
三生石上指空彈。讀罷楞嚴靜裏觀。塵土何堪埋玉樹。梨花小閣又春寒。  
展咏殘篇想婦人。宛然圖畫喚真真。絳言雁羽分飛後。不向塵中誤夙因。

挽瑤期

性帶煙霞秀可餐。蕉牕菖夢靜無喧。只今韻魄隨然去。何必雙飛文采鶯。  
楚些招罷恨盈盈。可似奇香能返生。一帙離騷餘粉跡。遙知名女不虛名。  
十詠探梅護徑苔。柔情端不爲春來。琴亡誰譜江南弄。空使疎香度夜臺。  
名閨洵有女如雲。君獨珠沈與玉焚。豈是忌才秋夢短。白頭應不怨文君。

沈智瑤(字少君即宛君妹)

憶昭齊瓊章兩甥女

獨立閒庭憶玉人。露桃花下月如銀。人間縱有傷心恨。不及泉臺半夜春。

沈憲英(字惠思一字蘭支君晦長女時年十四)

哭昭齊姊

雲散遙天瑣碧岑，人間無路月沈沈。  
可憐寒食梨花夜，依舊春風小院深。  
花下憶瓊章姊

弱水蓬萊夢不分，紅箋無處寄行雲。  
海棠睡醒清宵月，影入紗牕疑是君。  
憶瓊章姊（點絳脣）

簾外輕寒，謝娘風絮無人見。  
桃花如面，腸斷春歸燕。  
人去瑤臺，祇覺東風賤。  
花成散，夕陽千絲，煙鎖深深院。

沈華鬢（字瑞容一字蘭餘君晦次女時年十三）

春夜憶昭齊姊

春寒香靜月朧臙，閒捲湘簾罷繡工。  
蘭燼含花人不寐，獨吟殘句聽歸鴻。

春日憶瓊章姊

粉蝶夢蘭叢，桃花似面紅。  
東風吹不定，飛向玉階空。

沈蕙端（字幽馨吳江人詞隱先生從孫女故精曲律時年二十）

挽昭齊瓊章

醉扶歸（仙呂入雙調）

日華星彩佳風厚，霞明水色氣還優。毓秀生芳出名流，英英偏向閨中有，方見多誇獨勝  
邊雙修，忽又妨奇造物來相寇。

皂羅袍

忒暴終風欺茂，使聯莖謝梗，同氣辭秋。松毀傍林柏應憂，芝焚別苑蘭因瘦。雪軒芳變，煙  
淒蔓丘，疏齋香散，光寒小樓。恨蕪疏契遠生無舊。

江兒水

雍露悲難詠，清風感自兜。歎仙娥怎做人間友，他本赤松玄鶴神遐透。（我卻）高山流水  
絃虛扣，已矣知音莫偶。只落得展轉形骸，可惜這雲心月手。

玉交枝

莫道多才薄壽，是乾坤無緣假留。縱使春榮銅雀情閒逗，也休將怨比湘州。卻是備聽寶

簫聲竝酬。羞看玉鏡鸞雙鬪。因此掩胡麻攀蓮化遊。豈待倚蒹葭標梅有求。

### 川撥棹

若不往巫山右。料同歸銀漢口。想圭芒偶謫虛牛。想圭芒偶謫虛牛。特一時把芳靈鍾收。  
自去補天珍。那管覆掌愁。一任泣星霜。還祈返魄謀。

### 僥僥令

悽雲伶倚袖。惜玉慢枯眸。仙逝悠悠。蹤難究。這俗恨徒傷歲月週。

### 尾

杏花嗟落春還又。止空驗棠梨影稠。縱夜雨飛魂。更夢草幽。

昭齊瓊章。與余有表誼。其閑賦萬言。自有非非想。豈尋常閨秀邪。定霄塗之靈侶也。余所恨者。未經攜手相談。亦云不見若人。只得玩若辭而已。至辭都韻而人已非。月消波逝。能不傷哉。因聊吟曲以挽之。然而辭情之遷美遠矣。兩姊如下凡界。鐵笛嗚嗚。吟風橫弄。宮商雖叶。不當笑我鄙乎。我又安敢文其鄙也。時吟就此。頗恨辭短情長。乃復作悵悵詞一首。亦常曲之餘文爾。詞曰。悵悵歌短不歌長。筆底仙風拂錦囊。堪笑東君桃院浪。夢依王母藥欄傍。唱和閨中聯月袂。步隨天籟共霞裳。階前宿草傷青落。水面浮漚送挽章。

姊妹採芝攜手去。雲懸瑤集與相商。薰端再識。

沈倩君（吳江人即詞隱先生季女）

悼甥女葉昭齊

雲靜煙飛降藥淵。幽蘭比格錦爲篇。傷心賺夢梨花月。閒鎖春風聽杜鵑。  
畫欄依舊景融融。豔質空悲逐曉風。南陌碧煙籠弱柳。西江孤月弔寒楓。  
無賴唧哀戀上天。願兒世世絕情緣。香魂莫作催花使。恐見牽愁竈帶蓮。

悼甥女葉瓊章

羨君才貌爲君哀。金母機關未易猜。設使佳人樂隨唱。仙姬焉肯住蓬萊。  
不見粧臺仁玉姿。春風何必到花枝。繡籠鸚鵡啾啾語。猶是君家舊教詩。  
駕返翔鸞日影寒。難尋墨子未央丸。疎香無主蕉牕冷。欲讀遺篇不忍看。

張藥仙（崑山人）

讀返生香誌悼

縹緲青霄漢間。樓香薰徹六銖閒。只愁藥闕虛彤管。不惜璇閣冷珮環。賦雪雅誇聯玉樹。畫眉未許傍芝顏。名山珍重藏佳句。聚窟難求爭淚潛。

鴻都莫解叩仙源。誰賦珊瑚喚返魂。新句想當呈阿母。舊篇無復續庭萱。去來疑挈天花散。幻泡還如水月觀。剩有珠璣豔香閣。幾回展卷翠眉攢。

嚴瓊瓊（字小瓊）

春日過午夢堂覽瓊章表姊故居愴然追感

不見仙人萼綠華。香奩無復伴塗鴉。空驚舊事隨流葉。剩有閒愁訴落花。生草池塘憐憐夢短。隔川風雨歎人遐。琴樽未共環聲杳。春色年年濕絳紗。

歎惜芳容行想睎。深閨幽夢哭天涯。館虛垂繡桐花落。閣冷疎香月影斜。緜嶺歸來元有淚。廣寒飛去豈無家。涓陽原上重回首。腸斷西風叫暮鴉。

文靖公佐政兩朝。公忠爲揆輔第一。此其曾孫女也。祖孝康中祕。端品。選學人。稱洞庭先生。父孝廉子開。奕奕。不華早亡矣。二子風毛軒翥。余殊深范甯之愧。小瓊今年十六耳。文采若是。班蔡豈無家風。清門華冑。故宜鍾此令姿美才。然見甥女如許。益令我愴念覆瓿不置也。天寧識。

黃德貞（字月輝嘉興人即皆令妹）

輓葉昭齊

幾樹梨花帶雨寒。因風吹落忽驚殘。也知素質非凡相。一似飛仙駕綵鸞。  
玉碎珠沈不復圓。豈期一旦隔天淵。泉臺有路何人返。花徑飄零倍慘然。  
月上珠簾暎碧苔。夜深聞笛不勝哀。綵雲出岫無歸日。異草亭亭獨自開。  
繡幃寂寞影沈沈。寶鏡無光滿架塵。風景蕭條愁落葉。回峯雁杳皺眉顰。  
梧桐雨淚滴空階。海棠腸斷怨無涯。祇爲主人逢鶴化。誰人復起挂銀牌。

輓葉瓊章

閨中博奧有奇才。養卻迴文錦字裁。花月有期人已遠。空留枕簟淚盈腮。  
朦朧殘月照疎香。誰道浮雲不久長。庭前花草依然在。不見芳容自黯傷。  
春來天氣半晴明。蛺蝶啼鶯徹夜鳴。筆硯生塵徒有恨。琴書寂靜杳無聲。  
綺閣無人畫掩關。閨中人去幾時還。最憐玉質埋香土。不復粧臺整翠鬟。  
一樹名花正欲芳。驟驚風雨作淒涼。紅英縹緲知何處。從此幽魂不返香。



# 遊仙曲

友人毛允遂清暉規月麗藻彫雲遲美人于沅波佇靈修于湘草哀左思之嬌女怡矣摧珠擬郭璞之遊仙慨馮靈玉壺天有淚空怨綵鸞蓬海無梁如傳青鳥洵藥宮之可據知銀管之非誣也

## 遊仙曲十二章爲葉女瓊章賦

玉妃班裏舊嬋娟。謫下朱門十七年。生小靈心元絕世。塵緣爭得帶花鈿。姑射仙人冰雪肌。生肌澹冶厭華滋。非關命比琉璃薄。未許穠纖澆素姿。綠牕長日簡編陳。瑤笈琅函取次論。怪道吐辭渾玉屑。繇來繡脰不沾塵。才色真消父母憐。劉家三女令嬈偏。張郎應羨徐郎福。蝶黛將勻已絕絃。深閨愛詠白雲謠。風氣蕭聊故自超。恰是銖銷宜弱骨。冷然聽馭豕相邀。篆爐茗椀伴書檠。琢句爭奇姊妹磨。此日大羅天上會。雙拈筠管對調笙。返魂難覓振靈丸。豔質空銷白玉棺。一笑滄桑成底事。漫勞人世有悲酸。蓬萊新賀玉樓成。賦筆須翻舊李生。不分麻姑推故侶。傳書敦召女僊行。

西池阿母綺筵張。一曲山花舞荔裳。莫訝弱齡辭世早。前身元是杜蘭香。  
掌書玉殿舊班尊。誦滿重升署宛存。昨夜青綃人寄語。易遷宮裏補仙媛。  
仙凡路隔官無因。夢入親闈句轉新。莫道霎然全是想。此中消息遞來真。  
秦館無煩築鳳臺。童真示幻自仙胎。應知暫占清虛籍。慧業終須待道來。

附

贈瓊章

此己巳春。瓊章年十四。隨母歸涇陽沈君晦書扇頭贈也。用唐女子光威裏及魚玄機韻。  
贈什非挽什。然生時或愧過衰。死後卽爲寶錄。故并傳之。

雙眉織影月初三。碧黛描成石竹衫。紫釧金星翡翠重。紅綃貯月鳳凰銜。桃花白雪嬌隨  
母。柳絮因風肯讓男。南國無雙應自貴。北方獨立詎爲暫。歡容未笑芳生鬢。細語如聞口半諳。  
梅額侵霞嫌傅粉。鴉鬢浮鏡不留髻。曲屏曉煖芙蓉睡。小院香多豈蕊含。賦學迴文新識恨。繡  
殘連理未知諧。樓前無與春相問。花下惟餘影對參。飛去廣寒身似許。比來玉帙選如甘。東風  
吹盡吳宮怨。浣石佳人今又南。

彤奩續此二卷下

詩

葉紹袁

余性耽懶，不甚作詩。故兩女初亡，哀愴特至，而無一輓什，偶有所感，則聊一寫之。

壬申除夕

陋室風爭入，蕭村落日荒。衆欣謝寒序，暮景迎新芳。哀哉獨拊膺，四顧悲蒼茫。天高黃漢溟，凍地堅冰霜。永念骨肉斷，佇立沾衣裳。

物情喧守歲，獨余早閉門。庭虛不設燎，孤炬青黃昏。丈夫關意氣，貧賤安足論。哀哀悲永訣，俯仰空乾坤。一雙珊瑚枝，深紅凝淚痕。

四序盡有日，一死長不回。昔日紅顏女，羅綺成德纒。音容逸誰卽，簪履生苔莓。辛盤奠柏酒，靈座哭新杯。相看共今夕，一佰紙錢灰。

清明再哭

濃濃寒日雨，杏花墜葉小。悽迷荒郊煙，旋濕庭前草。草色自嬌春，芳魂去長杳。一哭又再哭，重泉彌窈窕。榆樹落榆錢，錢猶與樹繞。如何夜臺人，一去不復曉。骨肉如飛灰，又如波漾淼。

夢中雖云見生死各異兆。念言昔日情。今茲俱棄掃。斷腸誰爲憐。千古摧至寶。

夢亡瓊

憶昔玄冥初。生死斷腸日。方茲裝賓時。晨向夢中暈。枯桐猶寒風。景光追蕭瑟。女從香幃來。飄姚鳴珮璫。秀采舒詳妍。修容溶柔謔。素姿婉昔嬈。清粧非舊匹。鬢髮仍垂鴉。蓉衫易菱密。足下蓮花鈎。化作飛鳥出。余問胡爲爾。云久棄筓櫛。聞麗失楚臣。美士洵端逸。歡笑曷未移。忽念幽明沕。相對共淒哀。悲酸絕縷絃。一枕塔雞聲。殘月孤曉深。披衣起徬徨。淚血空泉溢。

昭齊二週夜泊崑山作

今日是何日。執亡週二期。我茲胡爲者。停帆岷之涯。孤燈照獨酒。寂寂生傷悲。一淚泣昭齊。一淚瓊章垂。雙淚相斷續。焚腸如危炊。長河深可竭。帝閣竊難窺。此恨渺無極。哀心當告誰。

癸酉除夕紀夢

除日江汀萬戶煙。寒風蕭瑟凍雲天。一聲爆竹催春色。盡對流光逐送年。年去年來長歎息。去年腸斷今沾臆。疎香閣外舊枝斜。曲欄朱箔渾相識。相識相悲畫閣人。繡簾無復步生塵。瀟瀟午晝蕉心雨。寂寂殘宵桂影春。春晝秋宵何太促。幾回淚點苔痕綠。忽從昨夜夢歸魂。開幃驚見花顏玉。細雨低呼眺曠曠。柔肌倦怯袖雙扶。重來翠簾芙蓉幃。亟索紅香菖蒲燭。爐燒

沈水輕煙舉。火齊遺漿小婢煮。雲鬢粉鬢玉萎紅。櫻唇歷歷分明語。初向粧臺憶薰綢。斷霞遙泣雁行秋。可憐未識昭齊去。猶問梨花夜月愁。夜月梨花人已矣。瑤池咫尺三千里。對言明歲碧桃開。玄都人又歸來爾。姊妹心傷兩地飛。青春弱女竟誰依。鵲魂欲冷荒山月。蝶夢空留金縷衣。幸有恩深給母在。含情含思嬌憐愛。光碧庭前竝看花。蕊珠宮內雙描黛。蓋珠金闕又分離。始託心詞寄母知。還待北堂粧罷後。共挑西燭夜深時。夜夜朝朝休再別。清樽聚話重娘悅。黃梁一枕夢魂驚。紗牕猶剩燈明滅。明滅殘燈夜未央。羅衾空怨五更霜。起來哭向靈几處。淚染黃雲送夕陽。

甲戌元日大雨思亡女

金壺曙色正元開。萬野初迴淑景來。漫有椒花傳竹管。但知柏葉自蒿萊。徘徊起把屠蘇挹。茫茫雨霧覆天漑。蒼霄祇爲哭嬋娟。至今三載猶垂泣。泣盡春風黯自悲。羅衣何日再蛾眉。花顏玉質今何處。祇向年年怨子規。

癸酉初夏感悼二女

銀床初葉覆。萬野麥天秋。花鳥隨時夢。琴書盡日愁。晝閒紅藥影。春老碧江流。畫閣人誰在。風前淚不休。

七夕悼二女和內人韻作

忽視填河夕，空憐綵縷常。瓊環人去杳，花月夜初涼。曝日書懸腹，銜杯酒怯腸。莫嗟經歲別，何似死生長。

素節驚殘鬢，浮生事半休。那堪雙袖淚，遙對一槎流。玉骨悠悠夢，清光漠漠愁。嫦娥同有恨，桂黛鎖橫鈎。

兒女尋常鬧，臨風漫舉杯。共看紅葉小，猶自白花开。瓜菓陳靈座，衣裳冷夜臺。游魂徒冥漠，目斷不歸來。

靈鵲支機石，長生漢殿辭。雙星千古話，孤月兩人悲。淚血難堪染，傷心祇自知。况逢清露夜，更漏滴疏緯。

春日思二女

乘芳欣淑景，雪涕獨沈澗。畫閣人譙玉，迴廊珮不珊。朝雲迷瘴岫，新夢泣流丸。舞蝶羅裙影，飄紅繡履丹。尙欷修藥杵，蚤冷薦些餐。燕子飛飛又，鴟枝寂寂殘。短牆空薜荔，石徑老琅玕。恨共湘江遠，情隨峽雨懸。遺香猶鈿枕，墜粉自欄干。細草臨階住，虛簾護壁單。掛琴銷歲月，封鏡網沈檀。瓶井無消息，笙吹益渺漫。欲傾天上國，生拆世間歡。錦字仙航阻，清燈鬼夜闌。長留

詩卷在，幾得淚痕乾。醉哭非希阮，毛班早勝潘。灰心爭半死，索笑總徒譚。癡想花前見，渾思鏡裏看。玉簫聲一斷，金縷術千難。日暮悲何極，春風起厲寒。

### 夜坐同內人憶二七女

春暹庭欄翠色浮，半荒門徑黯然秋。猶飛燕子尋香閣，獨剩梨花鎖畫樓。酒後巾衫新涕淚，夜深風雨舊窮愁。挑燈共對西牕話，寒食年年恨幾休。

### 初秋情懷作惡聞田間歌聲甚淒楚可哀愴然漫賦（癸酉）

松庭寂寂草煙深，幾處農歌起暮陰。往事忽驚間墮淚，新愁獨坐總傷心。蓴花先帶秋風冷，竹葉空餘夜雨侵。自是斷腸堪寸碎，雍門原不爲聞琴。

### 秋日風雨悽然志悼

黯淡濃陰入望侵，况兼孤寂悶相尋。江村一夜吹涼笛，畫閣三秋鎖斷簷。舊怨豈隨黃葉落，新愁欲似黑雲深。迴廊立盡瀟瀟雨，滿袖西風淚不禁。

### 九月十五日過崑山風雨淒然有感作（癸酉）

無限傷心總不磨，偶於今日乍經過。若憐望帝魂猶在，其奈湘靈曲罷何。亂雨近浮秋色老，高城遙送淚痕多。蘋花欲晚渾難採，歸閉寒扉問薜蘿。

寂寞山嵐濕翠微。煙波人獨淚沾衣。疏楊似閔欬風瘦。叢菊無情傲雨肥。祇怨彩雲隨雁影。幾堪荒月隱鷗磯。停帆莫更重回首。人事風光已盡非。

野蓼迴塘古堞差。繞城黃葉對相思。蕉殘忽憶三春淚。萸冷長悲九日期。細雨鶴歸人不見。秋風鸞去夢誰知。澹然試數凭欄處。一夜楓江老鬢絲。

孤舟客夢最淒涼。蠟燭心焦影自傷。昨夜雨添今夜冷。今年愁爲去年長。青山若可宜西子。白雪誰猶憶謝娘。祇有啼鴉城外水。斷腸千古一茫茫。

甲戌元日次內人韻

端月初開四始天。柴門宿火曉無煙。貧隨草色侵衣冷。悶怯春光共臘纏。哭女憐兒催短鬢。亂風斜雨過新年。牙餽荔粉渾閒卻。拚醉杯前一惘然。

三月清明前二日初八瓊章悅日也

玉樹風前哭未休。斷腸春色又盈眸。棠花開鬢空成血。萱葉抽眉盡盛愁。火夜共傳新蠟燭。帆朝還響舊簾鉤。回思十七年前事。白髮青衫一淚流。

看牡丹花有感

年年春事關芳菲。晴日欄低燕子飛。豔質漫供人寂寞。香魂久與夢睽違。忽零雙淚愁傾



國獨向空庭送落暉。此恨幾時堪解。對花惟有日沾衣。

甲戌午日次內人韻適崑山張倩使至

一庭萱草午時天。野楚蒼茫麥野煙。雲外忽傳仙女夢。雨中空識錦封纏。蒲根艾葉添新  
淚。翠綉紅絲怨昔年。獨有斜陽今日影。桐花零落對凄然。

甲戌冬日崑山舟中夜作

日落煙銷又一年。重來山色倍悽然。傷心有我常餘淚。絕世何人更謫仙。虎筆恨慳娥月  
影。鴻文誰賦洛神篇。可憐今夜悲涼處。短燭依微漫泊船。

黃昏漁角動嚴城。最是孤舟此夕情。冷織亂雲偏伴我。夢隨凍雪爲無瓊。嬋娟玉骨應千  
古。愁悶迴腸自一生。祇有臨風堪慟哭。夜深還恐睡龍驚。

夏至對雨爲痛二七女

伯勞鳴罷日初長。無數欄花笑辟牆。風雨東來新夏至。一樽清酒奠靈床。  
竹葉娟娟洗黛螺。新蒲池上綠翻荷。閉門聽盡簾前雨。染向羅衫亦未多。  
雨重隨風濕畫簾。啼鴉楊柳斷腸時。靈筵小弟深深拜。哭對嬋娟知不知。  
曉起憶亡女

霽靄細雨濕春衣。煙渚迷離樹影稀。一望不知愁處盡。半天寒色雁孤飛。

對雨憶亡女

細雨濛空簾影寒。春來聊落舊闌干。杏花一夜風吹老。誰更吹簫對月看。

內人沈宛君除前刻外。有悼女五言古三首。五言律十三首。七言律十九首。五言絕十首。七言絕十五首。詩餘八首。擬招一首。傷心賦一首。已刻入勸吹集中。此不更贅。

賦

婚逝賦哀瓊章也

葉紹袁

載玄黓之潛灘兮。柄招搖之孟陽。肇顛頊之御筭兮。躋房廟之嚴霜。歌漢祠之筑曲兮。滌  
幽穰之枵腸。駭靄霧于遙岑兮。儼霏煙于虛廊。物著藏中。津醜析木。蜃海暈浮。峻枝鱗速。象燧  
燁松。兕觥菘菹。漠莽蒼之濟浦。紆搖落之江潭。月絨光于雙杵。露閃響于孤砧。覽群楊以起興。  
瞻潤鬢而思歎。菴參差之荇菜。睇純束之樸林。咸鳴雞于緝瑟。撫求風于靜琴。馳蹇修兮衛皋。  
穆辰良兮旭日。託候燕以通辭。陳夙盟之宜室。捲繁纓之初歡。筵支機以從吉。申御輪之多儀。  
道標篋之堅寶。爾迤漚冰開曙。萃喜充闕。婚符京兆。女似相如。韶齡借茂。霽景方初。天孫停織。

神女期梳。備三醮之陶匏。豫四爵之合巹。傲蒲葦以交溫。辨昏昕而必準。義纏婉之匪遐。展爛盈之已近。紫鸞欲棲而未雙。青鳥先飛以來引。飛青鳥兮薦明璫。贈霓玖兮貽瓊璫。鳳凰衫兮珠珥。雲冠纓兮霞裳。騎耕輶之僮僮。輒親迎于河梁。竦朝階而西雨。參在隅以東煌。佇嫋嫋之淑女。結袞纓而啓行。啓行兮告期。淑女兮妙匹。性俊惠而愷明。姿妍和而挺逸。擷琬琰之芝繚。攬琅玕之蕙帙。琴揚礪于縹齋。峽倒源于形櫛。誤點屏于吳宮。婉芳樹于衛筆。洞馬融之賦基。究廣陵之精律。蔚綺談以蒞流。瑛巧笑而媚溢。逸慧哲之冠朋。紛奇姿之曠出。弛鉛黛以無加。儼纓織而俱失。竄姝麗以姣好。洵飄姚而靜莊。髮鬢鑿而匪繞。額晰潤以嫺詳。眉餐秀以曼嫵。目澄漪千秋潢。顏隱紅以輝玉。鼻端宅于中黃。舒梨鬢之嬌倩。呈櫻唇之粲芳。手萸苗而柔削。領蜻潔而皎章。體輕雲以迴雪。肌凝脂而澤肪。態狷冶而綺靡。質亭立以修長。旣綽約以婀娜。更澗肅以軫方。爰有鸞釵初成。龍簪待插。寶鈿催銜。翠翹將押。榴環膩瑩。蓮裙翻洽。莞席敷茵。壇滋封匣。碧羽扇兮蔽蕤。紅綃纒兮躡躑。披華鞋兮翔蛻。拖英槍兮簇蝶。珊瑚之劍徒懸。玳瑁之批難協。迺貧士之羞囊。聊具陳之燎燁。何藍田之玉乍誇。而星河之顰忽給。昉杪商之規望。迄應鐘之泱旬。始常病之眇末。漸彌留以奄臻。稀巫咸之鴻術。絕饒庭之駭神。鮮火齊之蠲疾。恨芍藥之混珍。搗桂液而殄腴。摘靈叢以乏艾。擊橘井而涸泉。罕臚谷之墜帶。文君窺琴之年。

明妃入畫之歲。歎精盡兮形徂。愴行車兮管噀。於時蜚廉騷屑。陰伏漚漫。蛟涎起凍。鯨齧收瀾。圓瑤嘆莽。蕙荜迷攢。椒床侈煖。桃篔悽寒。氣憤追以填膈。慙皇穹而悲叩。天聽高而罔聞。終沈淪以珠覆。距五日之豈遙。羌一朝以莫祐。神懷憊以生離。視惜捐而無救。斜冷魄之慘明。漸瀟颯而縞驟。日下砌以愁氛。風度幌以吹袖。凋葦苞于海棠。翦蒼葦于荳蔻。焚蘆蕪之舊襦。罷鴛鴦之新繡。腸百斷于黃昏。淚千流于清晝。魂竟夕而旌搖。血數升而湍逗。秦樓震裂其雷聲。楚天湧崩夫崑岫。哀莫哀兮人琴俱亡。悲莫悲兮吉凶迭邁。輻執篲之嘉贊。郵溘死之訃音。息駸馬之仰秣。止乘龍之委禽。捲淒涼之錦帳。冷嬾密之瓊襟。拆同心之翡翠。虛合歡之香衾。挑缸焰而澆永。漸檐鈴以鳴暗。父母摧肝。兄弟沾臆。婢僕相漢。族閉胥側。荷慶門之光施。倦暗存而殫息。賻變藎之瓊材。洵堅厚而繩直。陵虬蟠之松文。逾虎王之梓色。如鳧令之降棺。來天帝之增城。雖歸休于岱嶧。知鏤恩而鑄德。於是瑰舍以桐。綵襲于床。幕布羽設。篋熬蜉香。肴糗蜜之粒餌。列芻靈之冥假。旃飄詣于綿叢。銘建旆于頰。綳辭織臂之皮削。就祝檀之紗縷。棄傾國其如土。恫精靈之渺茫。曠映暝以眩視。暈渥渥而丹常。禮號復以稱字。招升危于重堂。拒清巾之拭髮。掘冰衽之襲裳。聚室縹葛而去綉。侍女髻笄以用柔。夜復夜兮燈焚。朝復朝兮俎案。亂蟲喧兮殘更。塤吟嗷兮空旦。雁哀哀而南征。鵲搖搖于宵半。晝躑躅以疑昏。曠徬徨而徹旦。鎖寂

寂于銅鏡。麗沈沈于銀蒜。間朱欄之無人。颺絳幃之垂幔。佩懸帨而猶結。枕餘馥以未消。烏臨  
牕而啼怨。壁墮墜于衰蕉。入故寢而傾注兮。荒杳杳以長遙。辭脚踟以延佇兮。適遺韻于仙標。  
積粧鏡之霧埃兮。思暮華之麗影。惆菱花其晦埋兮。閉燦霞于修景。掩筠籠之夕薰兮。壺丁丁  
而促警。瑤金現之燼灰兮。覆霜凋以終冷。揄粉排之銖較兮。稱玉體以爲衣。脫羅衫之繞架兮。  
恍氤氳于蘭肌。見芙蓉之絲履兮。憶纖步于花時。悲緗絢之棄地兮。沒苔階之印碁。髣髴鴉以  
施簪兮。承搔頭之蕤鈿。謝頰屑之娥粧兮。長寂寥于蛛篋。帶影纓而珩垂兮。東賸金之繡摺。泣  
流蘇以結哀兮。共拋零于落葉。夕颯晚以燭舉兮。明令姿之茗榮。嘆蛻膏以倘惚兮。如照彩于  
影盪。姊妹坐而衍衍兮。想醅顏于微醒。酬瓷疊以姑酌兮。儼歎語于平生。左右顧而隨置兮。恍  
失聲以崩城。夜繇廊以超忽兮。涕濺浪而縱橫。掛壁上之枯桐兮。怨瑤徽于淥水。宛橫膝其指  
織兮。已繁絃之塵委。粉脫畫于標鈴兮。花飛英于碎綺。人不見而峯青兮。淚含臍以滴泚。疊  
稜之牙讓兮。函祕帳之芸題。縈絮罨于罽網兮。澆棲梁之絮泥。覩綠沈之剩管兮。彷彿手之揮  
攜。惜一離于慘握兮。訖永置于溝溪。境何觸而不思兮。淚何痕而可數。景遷迥以改觀兮。物續  
紛而恆故。禪日月之依然兮。孰風煙之非素。獨伊人之安歸兮。晡兼葭之危露。舍名閨之佳偶  
兮。永潛軀于邛路。時遞往而痛新兮。夢雖覩而驚寤。吁寂寞之深閨兮。又梅梢之倚暮。梅花笑

兮立亭亭之韻媚。梅花香兮。製馥馥之肌穠。梅花豔兮。耀曉粧之皓質。梅花瘦兮。步夜月之幽容。梅花落兮。莫不泣湘裙于蔓草。濕袂袂于春風。亂曰。有美一人兮。婉清揚。窈窕無雙兮。嬌洞房。顯蒼肆。虛兮。權閔傷。嫦娥墮藥兮。黎星沈光。河水浩浩兮。淚流湯湯。欲往從兮。夜未央。月還兮。歸故鄉。煩冤鬱鬱兮。心茫茫。四時平分兮。空斷腸。

## 祭文

### 瓊章週年祭文

葉紹袁

維崇禎六年癸酉十月十一日。第三女小憺週年也。人亡序改。境往痛新。陳觴瀟淚。告於我女曰。嗚呼痛哉。去年今日。我哭汝死。胡然迭微。又茲盈紀。霜飛露零。六驥奔駛。悠悠經年。寸腸如臬。悵悵心目。常若見爾。驚花墮葉。恍惚往矣。情繭抽而彌長。思膠纏而曷止。於時野開旭。鷺水泛清波。淒鷗脫木。蒼樹方醅。繁雲橫岫。淡月懸蘿。荇牽蛤艇。蘊限蚕莎。泣新愁于綵瑟。潛往夢于玄蛾。椒風之匪辭。喚恒生之奈何。組幃畫青。芸缸夜碧。竹檻花吁。桐幃卷惜。曲疊藍湘。蒜鉤翠帶。落盡燕支。搗殘杵石。對螢砧與粉蝶。涕淋漓而絡繹。染鵲紡以留紅。濕龍綃之晶白。燈花怯睡。簷雨敲床。金泥春去。銀葉秋長。霜寒槜子。葦委蓮顛。寶釵生折。瑤鏡誰芳。薰籠釵

枕物在人亡。盡日傷心。不見畫簾之女。終朝淚眼。漫焚繡佛之香。瓊藥無微。瑩冰遂冷。人事蹉跎。音書咽哽。小憩風雨。初送梨花。半壁蘚苔。又橫梅影。寂寥蕉綠。舊日朱欄。零落梧黃。昔時銀井。忽靈座之告期。已遙遙其去永。風含悴而被悼。日無情而故景。血濺痕以猶新。何流光之斯騁。嗚呼痛哉。令儀婉孌。馮汭河洲。挾華蔚藻。掩謝排劉。殊姿異態。匪可狀求。風流雲散。滄海浮漚。如何莫御。又焉云週。三百日之已餘。忽如回首。十七年之一去。空自凝眸。歌著青裙。樓傳黃鶴。重來芳草。何年珠箔。非瑤姬入楚。無待雨雲。倘羽客歸遼。猶然城郭。夢回細雨。俱銷夜月之魂。影落花陰。宛出疎香之閣。精靈安往。天地孤蹤。豈知父母。別後愁衷。星霜鬢換。涕泗衣濃。似楚葉無歸之雁。洵吳江最冷之楓。漫老一身。對開南菊。但將雙淚。與共東風。人亦有言。寐寢相見。漢渚初秋。夢遊廣殿。鏗闐璇宮。西廂深院。羣仙女真。霓翔霞綺。一女素裳。雪膚豐情。鬢鬢麗垂。流漪映眇。舉目則汝。失哀迅歎。我爰躡屐。崇軒敞壇。汝卽振履。琳遠環珞。瑤姿儻豫。雋采詳閑。盈盈無語。脈脈交看。悵仙凡之隔路。徒雪涕以洩瀾。嗚呼痛哉。錦水波漫。洞天日晚。礪響鳴璫。巖垂黛琬。追夢境而非疑。湖蓬山而益遠。九華紫雲之房。五色麻姑之苑。彤香玉女。絳帳孀娟。身前身後。何因何緣。因何從始。種玉藍田。緣何早斷。明珠沈淵。侶竝雲璈。故謝吹簫之匹。名歸琅簡。卽彫瑞葉之年。嗚呼痛哉。斜陽又西。哀鴻淚啼。寒埃蕭蕭。淒其以慄。今夕何夕。恍焉昨

日遺琴空張。穗幃飄室。陰房燐火。蟪蛄絮。魂兮何依。常否來斯。父女對哭。鬼必見之。銜酸鎖  
側。孰告汝知。嗚呼痛哉。期年之間。風花幾度。海棠嬌睡。芙蓉豔吐。水玉罷題。縷金非故。芳奩寂  
寞。而凝塵。流黃荒涼。而網霧。仙車莫返。芝砌封苔。桃源一閉。千春不開。最是悲傷。欲見無繇之  
處。更無消息。相思積寸之灰。玉埋麝骨。几薦螺杯。燼松燧改。銅箭壺催。父母停喪。兄弟除服。非  
情忍忘。越禮懼瀆。侍女紅子。敢愆昔夙。整筭三年。遐慰幽淑。庶幾山陽未遠。猶留聞笛之人。靈  
光僅存。還想亡簪之哭。嗚呼痛哉。

昭齊週年祭文

崇禎六年歲在癸酉十二月二十二日。歲聿云暮。風雨淒然。長女昭齊週期也。惻愴驚心。  
燒文奠告曰。嗚呼哀哉。繁雲迷垠。玄陰凝雪。冷蕤愁枝。野草荒蕪。鬱華不開。晦霾慘結。芳鏡掩  
塵。畫奩碎玦。日月云遁。露霜更迭。靈幃告週。悲哀愴咽。庭前凍色。檻外寒光。人何寂寞。樹何蒼  
茫。宛如昨昔。汝病在床。我則於外。商岐問黃。母則於內。調藥視湯。今焉期矣。景在。人亡。春秋代  
序。冬夏非長。空餘涕淚。祇有淒涼。昔胡凶毒。父母斷腸。今胡遽促。兄弟除喪。嗚呼哀哉。瓊章未  
歸。故死我室。汝來哭妹。遂終斯疾。妹殯東廂。汝陳西宅。嗥風嘯雨。鬼影孤寂。魂兮歸來。曾否聚  
覲。麥飯齋肴。清醑一滴。倘非同此。精靈安適。秋夜春朝。蝶飛灰佰。欲見無繇。血心寸割。期年之



間。衰鬢頓白。九原有知。亦應隕魄。嗚呼哀哉。汝生存日。深懷衛思。魚波雁羽。寒暑靡差。自汝徂謝。東望漣漪。誰歎問我。寂寂歲時。尊絲莫採。柳絮空悲。經年消息。無去無歸。嗚呼哀哉。汝故房櫳。綰綰綉。窮姑盡啼。銅鏡日鎖。深院無人。梁塵虛墜。朱欄絳花。霏微盈朵。魂兮往否。碧牕小坐。香留遺匣。粉蠹殘芸。瑤徵泣月。銀篆啼薰。紅粧一閉。金縷無裙。賣釵禮佛。鏤聚傳文。愁言紙貴。嗟悼咸云。汝身雖死。名則已聞。聞則汝名。痛居我體。飄雨驚颺。濟然洩涕。哀我二人。哭汝姊姊。魂兮奚之。永無見理。人生至此。眉蹙難伸。一哭汝妹。再哭汝身。妹方浹歲。汝又週辰。西風雙淚。我獨何人。北闕上書。甘老沈淪。青衫白髮。終焉賤貧。未知抔土。歸在何年。長憐玉骨。莫慰金鈿。一行秋雁。兩處春鵲。誰將幽恨。告我嬋娟。書詞未已。雨微瀟天。天悲地側。草木銜酸。嗚呼哀哉。

### 瓊章二週祭文

嗚呼瓊章。已週二年。肝摧腸裂。淚恆沸泉。我不見汝久矣。時恍惚乎汝之在前。其飄姚綽約。柔曼靡麗。美修嫺以連娟者。猶餘香之縹緲。而羅衣之褊褊不然。對跨容于芳鏡。拊纖指于清絃。奈何文茵久棄。畫閣長捐。四時代序。流光忽焉。但見憶幃塵鎖。鮑榮而苦閉。與夫紙錢灰寂。悽冷月而散荒煙。汝瑤姿與玉質兮。則安知不吹紫笙而遊紫淵。問之幽冥之胥。亦云然兮。

汝洵翱翔乎青壇霞洞。友西華而侶緜仙。嗚呼瓊章。塘城琅簡。玉皇芸篆。我固知汝謫限盡而還上玄。但父女情深。悲涼愴咽。不勝噓哀而隕涕者。我則空拊膺而奚繇問天。嗚呼哀哉。（幽冥之宵亦云然兮詳載別冊）

昭齊二週祭文

嗚呼哀哉。我翁與汝母言。人固有可死不可死者。有不可死而死者。可死不可死者。禽息鳥視。在彼何盡。不可死而死者。反往往爲造物所忌。拊心飲恨。千秋萬古。寧有極邪。汝端嫻有則。明惠無倫。左芬謝才。令暉遜藻。可死邪不可死邪。適生無三十之齡。境無一日之樂。爲貧士之女者。十有七年。抱道蘊之恨者。傷懷六載。瓊凋玉碎。遽至于斯。一疾長逝。二期已週。青海終不歸之水。瀟湘無再返之雲。嗚呼哀哉。我與汝翁。珮車竹馬之日。卽稱兄弟之好。以迨文期酒社。夏簟寒簟。當年夙昔。歷猶可指。意氣推今。才華匹古。可死邪不可死邪。而天涯萬里。淪殞遐荒。隔幽明者八稔于茲。昨二十一日。二仲卜築新阡。辛舉襄事。我往送葬。哭汝翁于頽煙衰草。霜葦冰渚之墟。歸而又以汝之二週。哭汝于塵几舊德。斷鏡殘香之側。嗚呼哀哉。家中無一佳境。可與汝言者。我則貧益甚。母則常病。惟大弟已完家室。新婦未歸。汝母常念。汝與三妹不及相見。作一日姑嫂。言之斷腸。滑澹澹濕衫袖間。惟此而已。嗚呼哀哉。

### 瓊章三週祭文

嗚呼瓊章。汝今三年。我哭汝於鸞飛之日。淚滔滔以流泉。旋哭汝姊。雙淚橫漣。自謂人生慘斯最焉。今三載其更序矣。或庶幾哀情之少遷。詎知昊天不備。降多凶而曾莫之憐。兩哭汝弟。芝萼墜燵。再哭祖母。頽波逝川。因烈女之奇俠。致讓聞之驟然。叩高蒼而彌杳。贈百身以奚全。行道者其靡不愴惻。汝九原知不知兮。悽酸乃春蕤兮。鸚鵡。又秋風兮。杜鵑。遭陽九于霜月。斷連理于雁天。寶奩銷鏡。翠匣沈鈿。撫玉琴之促柱。哭汝母于靈筵。痛莫痛兮。今日。哀復哀兮。離絃。空綵筆之賦怨。河陽之篇。塵舊房而長閉。濕新淚以無眠。維天台之哲聖。謂汝與母其俱仙。吹笙嶺山之嶺。跨鶴蓬海之巔。悟神仙之遊戲。故借返旆乎蕊淵。寒簧汝字。前身夙緣。瑤臺侍史。月府嬋娟。因法華而證性。趨無葉以歸禪。汝隨姊以飯受。母今駕而休軀。修正觀之密義。快母與女其鼎宜。此大師之弘譜。洵慧炬之燈傳。宜余衷其無憾矣。淚終不能止而涓涓。歎人間之無路。月茫茫而高懸。祝玉顏以何日。或龍劍之有年。茲三週之俗禮。奠黍飯而化灰錢。嗚呼哀哉。

### 昭齊三週祭文

嗚呼昭齊。汝今亡三年矣。汝夫婦緣慳。不但生前可怨。而身後更可傷矣。自壬申臘盡。汝

辭人世。越歲寒食中元。不見汝婿來。麥飯村醅一奠汝也。一期再遇。不見汝婿來。紙錢梵唄一薦汝也。蕭然一榻。塵凝總冷于父母之家。不見汝婿來。一迎汝歸。或新阡或舊壙。謀入土也。一年如是。三年亦如是也。嗚呼哀哉。家門不幸。迭遭大禍。今年二弟八弟亡矣。祖母亡矣。母又亡矣。迴腸日斷。淚眼無乾。我之一身。如春風落絮。秋波拍浪。飄搖焉無所棲依。而諸喪未葬。皆築心曲。今卜一畝之宮于□□□□。將爲汝父母并封馬鬣。而汝與瓊妹武擔石鏡之表亦卽在焉。汝婿固不來問汝。我亦不復去問汝婿也。嗚呼哀哉。天台鴻大師云。汝與妹俱在無葉堂中。習修止觀。師云。指一下。再下。卽稱雙葉堂。名無葉。其識不然。師蓋深喜之也。汝旣從大師之教。又得妹爲伴侶。何幸如之。師又云。汝見母對哭。一日夜。定力俱消。茲後慎勿復然。努力佛事。西方不遠。勉旃。勉旃。今三週屆期。宿禮設奠。蔬飯一盂。汝來享之。青鳥旣定。卽營葬事。汝父母三妹二弟八弟。并顧家烈女。相依聚首。永期千年。卽我今亦遂爲神往。而汝又能無于定中一眉舞邪。并以致之瓊妹也。

誄

亡姊昭齊誄

葉世倌

崇禎五年壬申十月，大姊昭齊扶病歸，哭瓊章妹。越七十日，又卒。年二十有三也。嗚呼哀哉！流雲罷彩，麗日沈光。雁愁芳殞，鵲弔花凋。念菱鏡之永別，痛柱鶴之不歸。家去郊門，國蘊死月之威。人聞噓管，天墮裂雲之泣。秦吳絕域，尙爾銷魂。蓬溟異途，詎堪回首。昔時歡聚，月露留連。今日追維，風煙嗚咽。葉蕭蕭以辭條，感時傷矣。露漫漫以盈榭，懷人悼焉。若使佹魂不泯，應痛列傳之未編。況乎家乘非難，尤憐婦德之不顯。是以山陽舊笛，感同向秀之音。蓋丘復登，慨滋潘岳之賦。爰託鄙詞，用述厥志。遂作誄曰：

鴻暉流英，彩霞鬱樹。露華舒春，麗葉飄馥。六幕降精，扶靈誕淑。離床啓秀，繡牕膏育。質茂溫惠，姿挺修穆。性揚蘭芳，儀箴薰熟。金暉翺翔，樓葩瀟郁。神含落霞，韻飛暎玉。團扇秋悲，擣砧夜哭。芳算遽除，彤管傷感。嗚呼哀哉！博士夙嫻，整絲幼莢。義柔組紉，墨照箱篋。如山與河，委佗軒舉。賦誦靈光，詩歌吉甫。池草夢吟，梨花粉侶。畫棟題雲，珠簾賦雨。思捲長濤，文裁秋浦。發言吐華，鬱鬱湘楚。齊劉學謝，挺萼敷葩。微標射月，麗彩流霞。度洪體亮，瀟灑曠遐。瓊珥有輝，璫璣無瑕。廓如千波，識載五車。既賦泉水，乃麻鶴巢。蕭將蘋藻，敬勤脂膏。扮榆滑日，櫛縱興宵。儉師繡綉，雅服瓊瑤。吁嗟薄命，眉案空低。鳳毛虛附，熊夢徒悽。峽猿夜叫，林鶯曉啼。芙蓉露冷，楊柳煙迷。禪清繡佛，梵證菩提。長明燈皎，貝葉函題。三乘慧朗，四攝神棲。航依鷺夜，座遶幃寬。一葉

驚秋半床落月，鬱裏誰何。永懷如結，蕙帳飄兮魂銷。菱帶垂兮魄滅，辭蓉壘兮歎歎。沈蒼黛兮離別，嗚呼哀哉。北風以陰，東婦如昔。翠草霜殘，丹青雪劇。穗幃空悲，隨身願百。泣涕漣漣，音容杳隔。簾櫳夜荒，庭軒晶白。寒威淒神，遺燈在壁。素箋兮空啼紅，青缸兮徒凝碧。杜鵑血兮染秋，鷓鴣聲兮怨春陌。馳郊垆兮魂漫漫，叩高穹兮天漠漠。嗚呼哀哉，彩雲愁飛，回風悲颺。悠悠重泉，寂寂故房。王郎何憾，謝女何傷。悼妹致隕，雙瑤斷腸。惟才與德，比美士行。荒涼芝玉，哽咽笳篋。翠湮羅衣，香消素裳。哀我人斯，撫膺徬徨。睹蘆花之瑟瑟，感流水之湯湯。悲長夜于不旦，疑吳蒼其掩光。嗚呼哀哉，青松欲泣，白楊半欹。零落山丘，低徊棠梨。一朝去矣，有淚如絲。竹花蕭蕭兮人不見，蝴蝶夢夢兮春自飛。鳥嬌啼兮白日靜，心惆悵兮獨含悲。嗚呼哀哉，朝華墜露，夕秀落英。秦樓月缺，楚岫雲橫。願魂影之已失，迫肺肝其愴驚。既嘉名之紛美，何年歲之不恆。恨纏綿于千古，撫胸臆以無聲。物芸芸其茂盛，黯脈脈而無盈。摧心裂骨兮獨絕，天垠地維兮同傾。嗚呼哀哉。

七姊瓊章詠

葉世俗

瓊章余第三姊也。性植端凝，夙成明慧。珠簾飛絮，才驚謝雪之吟。玉軫調桐，穎識蔡琴之辨。朝霞映日，有如入畫之容。翠羽嬌春，無異神人之美。加以天情開藻，百藝能通。逸思彫華，諸

家咸習。誠飛仙之偶降。非才士之所及。詎期昊天。殄我靈淑。享年不永。卒于崇禎五年十月十一日。春秋十有七也。嗚呼哀哉。瑤玖雖美。不長寶于敝匣。芷蓀信芳。豈終育于常囿。玉摧貽怨。珠碎唧悲。恨與雁而長飛。腸隨猿而共斷。昔年月下花前。常尋梨棗。今日淒風苦雨。空痛山丘。撫素手之纖痕。宛追淑韻。觀殘香之膩紙。還憶芳詞。爰作斯誄。用以彰之。誄曰。

大造毓靈。爰聚瑤池。寶婺降芳。乃誕玉妃。琪葩敷彩。閭蕙舒枝。幼而異哲。高挺慧姿。馥郁蘭襟。綽約芝儀。琅情閒逸。玉光朗輝。明采秀軼。清韻娛暉。鏘才錦字。藏影金圍。榮若雪積。爛如雲披。少嫺女史。長習名詩。動容成法。發語能辭。更薪言秣。桃夭子歸。碧天忽悴。紫簫永離。銀河傾槎。鈿鏡孤飛。嗚呼哀哉。媵容間出。修態天然。姮娥遜麗。織女讓妍。肪體玉頰。素鬢朱顏。瓌容豔冶。瑋質幽閒。鉛華非飾。黛粉無權。美藻嬌日。梨花睡煙。游龍方婉。驚鴻乍翩。細語生芳。美睇流精。鬢髮垂墜。蛾眉含英。絳霞天末。明月中庭。胡然柔綽。宛其莊凝。羅衣香嫋。弱步芳盈。欲顯憐影。未笑傾城。人或西子。仙則飛瓊。惠茂班蔡。德比婁媿。溫和明晰。靜穆端方。嫺詳愷悌。弘容慈良。兄弟姊妹。胥成樂康。潔炯琬琰。馨著芬芳。獨抱澄韻。寂鎖清光。寒日方煦。春雲初翔。曠懷迥絕。霏屑偏香。幽襟允繹。麗模未彰。句驚瑞葉。頰叶椒花。挾菁摘藻。芸思無涯。揮珠灑玉。美翰能嘉。漪迴暗澗。杼布絢霞。何體不嫺。何辭不葩。冊函緗綺。軼著縹華。觸懷何興。寓目鏤思。琳琅

擲發。綉組色塵。織鸞翠管。敷瑤墨泚。靈心虛運。慧巧無師。局窺弈旨。雨集巢。征鴻赴沼。羣鶴  
依枝。廣陵究律。敬協桐絲。明光曲奏。楚妃淚滋。書裙染練。雲行露垂。畫蟬揚蝶。斐疊英蕤。丰神  
瀟灑。吮愛生情。性厭繁俗。思習澹清。煙轡逸致。霞縈高盟。游仙寄詠。步虛飛聲。裳規芟製。餐懷  
落英。希挹石髓。期探菡萏。蓉城偶譎。蘭香再生。方來碧洞。忽返紫瀛。雲耕鼓瑟。鶴踏吹笙。去此  
塵宇。還彼瑤京。嗚呼哀哉。瓊姿帝子。異世長隔。玉貌仙人。徒爲過客。神襟猶在。奇方可述。往觀  
弗續。音容永失。嗟兮賢媛。何年太迫。雪散華顏。露銷貞魄。乍背華門。獨守荒陌。幽域千年。紙錢  
一佰。嗚呼哀哉。匣無餘澤。衣有遺香。爐灰空冷。瑤琴靜張。鏡沈石黛。燈孤畫房。珀枕虛懸。羅帳  
徒懸。璧月暗彩。緊雲結觴。蕙折纖枝。蓮凋豔芳。泣血滂沱。愁肝裂傷。山色淒碧。帝閣阻蒼。嗚呼  
哀哉。泉燈閃閃。繡幕飄飄。香容永絕。絮酒空澆。靈幃何寂。芳魄何遙。北風斯凜。陰雨恆漂。白楊  
嗚咽。青草蕭條。杜鵑叫壠。鷓鴣悲宵。吁嗟嬋娟。遽焉悼凋。嗚呼哀哉。亂曰。玉樹兮摧折。彩雲兮  
飛散。花辭條兮長落。雁分飛兮永斷。嗟佳人兮一去。殫終世兮不見。瞻平原兮窈深。無涯。觀流  
波兮蒼茫。失岸。望彼天兮虛寥。怨九原兮情漫漫。白日兮無光。拊悲膺兮長歎。嗚呼哀哉。



## 靈護集序

慨自陋巷請車，西河喪明，在昔聖門諸賢，已不免有所闕天殤之歎。顧顏氏之子，至今不朽，而卜氏之子，於時無聞。此殆有才與不才之辨也。近世則吾父執臨川先生嘗有詩云：宋時已死王元澤，直到明亡湯士選。是則愛子之情，與憐才之心，交迫于中，故略雱狂妄之行，而特取其少俊，并忘荆舒執拗之性，而與均其至痛耳。吾黨天壤居士葉仲韶，多子多才，其生也固數同荀氏之八龍，其存者亦尚並寶家之五桂，顧獨于感期之歿，涕淚併枯，肝腸盡裂，則亦以是子之才，較之先殞者爲尤勝。海中有寶，猶當與世共珍惜之，而況其爲掌上之珠乎。衛玠風流名士，哀感路人，羊乘令問，夙彰無有繼嗣，此其可憫宜何如者。往見方正學答許廷慎書有云：斯文世以爲細事，然最似爲天所靳惜，其賦於人也，銖施兩較，不肯多與，得之稍多者，使若爲所記憶，時時迫蹙督責，不使有斯須佚樂，此理絕不可曉，豈其可重者果在此耶。不然，何獨忌此而悅彼耶。是雖先生有激之言，然事固嘗有其實，卽如短折爲六極之一，豈宜反用以降威于文士，而子安長吉之徒，概多遭此，雖其引被掩面，而成腹藎，嘔出心肝，以滿錦囊，不免自促其生，然亦頗似爲造物所索之急逋，而不容其需遲歲月者。仲韶多子多才，男也太沖，女也

左芬男也。鮑昭女也。令暉內集而講論文義。真有謝太傅之笑樂。乃疎香芳雪兩種遺集。方斷香閣之魂。而今此靈護一編。復動藝林之魄。則爲名父者。又將以何方便法而遣情也乎。威期日夜工揣摩之業。一不得志于棘闈。而遂以長往。故其所殫精者。率在制舉家言。乃其於古文詞。聊一染指。便足擅場。非其才甚異不能爾。雖止吉光片羽。然可望而辨識其爲鳳毛矣。

崇禎庚辰歲中元日。吾家山人周永年撰。

# 靈護集

吳江 葉世俗威期 著

## 賦(二首)

### 夢遊崑崙山賦(戊寅作)

嘗讀山海經十洲拾遺諸記云崑崙山王母之所治也神物之所生聖人神僊之所集也余欣然庶幾日暮至之遂感夢焉乃爲之賦

夫何天柱之峻極兮標增城而建閭風奠地首之緹絡兮左玄圃而右瑤宮既仰偃而俯蓋兮復下狹而上際高三萬而挺嶸兮馭日月于九重規百丈而圓削兮覆沈瀛以彌中其爲狀也崑崙兮崑崙嶸嶸兮嶸嶸冠衆靈以苞峙體岑峭而頽嶺竄崔嵬以竊窺渺匪沓而享霧氣氤縕以繁合勢崩輒以紆迴初曠莽而浩衍乍邃幽以夷延嵒嶮不斷之岫巒崩無階之巖迴屋率聳而亘整銅柱嶙峋以入天選絕磴以飛軒竦危峰而振旆療風穴之蕭颯盤雲根之靈竇玉女似睡而披衣金鑰欲駕而乳萃華池高嵩室之船醴泉漱神明之瑞鬘集集于斯聲

瀑瓊流以響珮。碧嶂磊砢而多姿。丹崖灼爍而精縝。暹晃朗以爭奇。遐罕寥而角隊。儼肅列以疑賓。歛詭立其如魅。而透鴻濛軒蓋。溟滓忽荒。晴霓絕燁。層嵐曄煌。澄蟾停影于八樹。炬龍息御于九光。霞六甲而吸噏。霧三日而旁唐。露皆甘而輕瑪瑙。雪恆綠而錯琳琅。暮煙霏而扶輿。混冥朝雲布而宇宙蒼茫。爾其石也。穆天子之所未升。女媧氏之所莫鍊。圓嶠駁錦之文。昆吾水晶之劍。南潭蠭化之腸。西沼龜浮之面。或蛻白而流黃。亦霏霧而雨濺。髓盈洞其瓊飴。脂日滴而成饌。織女遜其支機。貞婦虛夫嬋媛。神人鞭之而脚行。仙真坐焉而腹辨。超五獄而最靈。總八滄之巨甸。木則奇柯瓌幹。森梢繁直。翹芳競穎。靡可殫析。琅玕在其東西。瑋瑤挺乎南北。葉自然而千華。萼無名以百色。玄流之桂堪舟。寒英之桃表赤。龍月之花開三影。水仙之漿飲七日。不死之林宜床。止怒之枝恆黑。類齋菊而分香。異檳榔以儲德。青羊千歲之精。白鵲四衢之跡。又有芝田蕙圃。沃衍從衡。層則爲九。羣仙是耕。青絲天棘。紫脫華萃。嘉榮夾穗。葳蕤敷英。帝女化而善媚。瑤姬夢焉感情。蒿補聰以益壽。菊輔性而延齡。苦夜明而照室。芸辟蠹以披庭。玉紅黃巢之本。金藍翠菖之朋。冰谷崆峒之葛。石膽琥珀之苓。薛荔掛侵雲之帶。女蘿結如屋之藤。優曇奚貴于佛域。鬘華徒載于方經。矧唐昌之玉蕊。詎凡卉之取京。若其遶翔茂林。栖依豐草。同心著名。希有共表。焦明南飛。幽昌北矯。鷓鴣鳴和。鸚鵡容皎。鶴迴風以銜丹。鶴淚霜而

冲。島海應潮于蒼籬。僊傳書于青鳥。聽鳳凰于清籟。舞雙鸞于春曉。陋睨睨之倉庚。薄泥香之燕爪。豈若紅閨伶泣于鵲魂。紫塞空悲乎雁杳。爰及澆火之鼠。吹寶之麟。噴光比月。縮髮猶人。環獻瑞而鹿久。慮沈水以駝神。君子之化猿善嘯。仙翁之登巖能馴。騶虞好生而西伏。開明虞威以東躡。紛下窟而上巢。頰曹分干彼此。餐墮月之琪葩。飲流花之澗水。水潺湲以練澄。澗逶迤以脩止。寒漪凝碧于幽潭。碎石滾珠而漸瀉。細草織織以入鏡。飛雲飄飄而過底。非桃花源而路迷。似羽觴隨而曲只。于是瑤臺五城。廣千步焉。玉樓九柱。敞萬戶焉。金殿長春。銀宮不暮。臨光碧子丹邱。厲翠華于霄路。蕊珠之闕流精。紫瓊之房霞布。夜光錯落于螭榻。翡翠飛梁而虹度。珠簾以玳瑁鉤風。瓊屣以珊瑚承露。拂瑤欄而奏笙竽。啓晶廳而舒雲霧。一萬里之圓海。無波。三千年之碧桃如故。悵姬駿之不重來。何雕龍之所能賦。是乃玄都祕府。洞靈神京。西華王母。控治斯憑。方孫躡屐。冠戴晨嬰。光儀淑穆。晦靄姿明。秦皇求之不見。漢武降焉來庭。夫人則上元居首。侍女則次第飛瓊。拊五靈于阮華。彈八瓊于子登。成君拍湘陰之聲。雙成吹雲和之笙。或有黃石初爛。燒丹遂成。駕鶴太清。瞻鸞太清。金壇授籙。琅笈題名。靡不于此望而羽升。僊僊以松實方目。叩疏以石髓駐形。青鳥服洵而得道。赤斧煉砂而身輕。洪崖倚床而投博。浮邱挹袖以餌精。羨門佩節于靈嶺。安期遺鳥于阜亭。斯皆真圓之位列。允矣寶章之美英。忽緬

思而感夢。豈遽覽其無情。披蕙蒂之陸離。衣芰裳之昭朗。駕八景之鸞輪。乘瀨氣之清爽。嗽雲  
瓶之甘津。掇奈花于仙掌。受霄函于婉妘。嚼玉粢于鴻沆。友瓊鸞而爲侶。神標綸而泱泱。居兮  
白雲之卷舒。行兮青霞之相賞。實乃至人兮所歸。吾將舍此兮焉往。

是其覃精刻意之作。故闕蒐博。語多華腴。

遠遊賦甲戌

洋夜子遊于曠垠之野。徘徊沈滄之鄉。縱覽太極。流行溟滄。濯髮湯谷。兀首九陽。思緜邈  
而非窈。神飄灑其靡常。策煙衢以抗迹。逐霞道而擷芳。寄遐想于寥廓。聳飛情之淋浪。駕高颺  
以容與。橫四海而遨翔。于焉瓊天矯路。瑤水浮航。羽人汎楫。曼鼓騰驤。吸風餐兮露飲。曳雲裙  
兮霓裳。既疾徐之有節。復旋往之無方。朝馳驚于西瀛。夕歸次乎扶桑。覽余佩之陸離。聊逍遙  
以徜徉。雖寤歌于一室。已周覽乎八荒。

洋夜二字。殊甚無謂。問之世侗云。取其汪洋于夜也。存之不忘其志。并識余痛爲觀  
者一笑。

詩

閉居卽事（俱小時作丙子以後卽不作詩）

室內琴書靜，庭前花草鮮。清文堪自賞，容與一留連。

草橋

草橋橫野渡，雲樹出江亭。欲羨漁舟笛，飛聲遶洞庭。

臨江有感

秋光慷慨氣初寒，把酒臨風獨自看。千古英雄零落盡，長江日夜一漫漫。

登樓看雨（和四弟韻）

風吹木葉正蕭蕭，細雨無情濕畫綃。莫向樓頭望南陌，半天秋色五湖遙。

夜景

碧寥無際影清清，漸續霜汀幾雁聲。自有梅花知我意，移開瘦影月斜明。

和白樂天

小庭草色正芊芊，如屣捲春風入夢餘。寂寂紗窗人不到，一床兄弟與琴書。

哭兄七言律十首（刻此雁哀）

擬父貧病作

荒徑清貧悴葉飛，病餘獨坐掩柴扉。貧憐病況時時在，病結貧愁日日非。休問藥鎗留病用，幾看炊飯與貧違。庭前景色徒然好，貧病何心對寂幃。

天漢歌

何橫波之浩衍兮，共長天以一色。通晝夜而不盈兮，歷箕斗而難測。乘浮槎以問津兮，視牛渚之流雲。卜支機于星石兮，挹秋水之清沄。

深山

山崔嵬兮巖崿，徑窈窕兮體繩。碧苔兮透潤，翠微兮分叢。春煙兮朝樵，秋雨兮晚菘。古樹生兮橫嶽，女蘿帶兮長松。茅屋兮臨溪，石磴兮依峯。攬飛霞兮可喻，友閒雲兮相從。吸清風而舒暢，侶明月之遐蹤。聽猿聲于絕峽，聞啼鳥于新茸。歎青山兮不改，羨流水兮無窮。哀塵世之多艱，一回首兮成空。

哭母擬離騷體十二章（刻此雁哀）

序（一首）



壽友人序（戊寅代叔作）

太昂分光降祥煙而縹緲。紫微流瑞集芬譎而氤氳。風來瓊島百草爭菲。日暖芝田千花競笑。水晶簾捲人迎僊院之輝。玳瑁筵開庭啓瑤池之宴。萊彩歡騰于膝下。梧枝慶溢于堂前。春濃麗色共羅綺而俱陳。鳥弄歌聲雜箏簧而迭奏。青鸞巢樹白鹿啣枝。進佳節於千年。祝芳樽之萬壽。友人口口文星降世。嶽秀挺生。熊羆叶夢。早稱男子之祥。日月臨懷。預卜賢人之瑞。衣荷製芟性慕幽貞。吸露餐英心存高尚。東阪荷鍾。棲遲衡泌之鄉。南畝勤耕。偃息蓬池之戶。蒼林鬱翠。照明月于柴扉。古木垂陰。來清風于澗壑。勁表丹霄。高貞白石。鶴衣百結。猶憐范叔之寒。塵甑徒懸。恆餉王孫之飯。化高許子。名擬陳君。人修守劍之操。里伏瞻廬之愧。鴻聲遠著。敷惠教于當時。餘慶遐垂。貽清節于後裔。已而穎粒衍芳。孫枝吐茂。燕山之桂。秀發三柯。晉國之槐。榮成連幹。既龍鸞之並躍。復蘭王之交輝。雄彩鸞飛。識珪璋之令器。異材霞映。知英偉之靈姿。禪厥父儀。成茲令嗣。望天衢而神奮。瞻雲路而思馳。人傳鄧藪。實嚴訓之居多。家集劉經。由義方之克式。久哉懿德之休。爰躋斯年之美。國招賢士。公孫應聘之年。運啟升平。叔子成功之歲。乃值青陽之節。適逢降誕之辰。筠庭擢秀。錦色絢而初開。蘭畹滋芳。異香繞而不散。炬列龍街。齊看舞袖。杯浮蝦蟇。共奏繁絃。欄彩借簾光相暎。簫聲與笛響俱清。閨壘驚華。瑤枝簇彩。

羣仙雜至，爭持方朔之桃，王母飛來，咸上安期之棗，借玉體于樂巴，遠期瀛海，採金芝于商老，遙祝南山，龜啣玉柄，尤爲獻壽之丹，鶴進瓊卮，卽是駐齡之藥，握紫陽之真訣，持關尹之靈方，日與彭錢而俱遙，年並王喬而偕永。

記(二首)

遊黃山記(癸酉)

維時二月，余在澄江，春風和暢，萬卉挺茂，與大兄雲期遊于黃山。山在城東門外六七里，其下皆長松大柏，榮蔚森秀，過此則皆蘄巖荒徑，路不盈尺，倚崔嵬之絕壁，俯眇無際，其上則有石磴石梁，可坐數十人，皆天生洞穴，而廣如室者，恍乎別有天地，非人間也。其間巖壑不齊，凌空絕險，臨乎大江，浩浩洋洋，渺無涯岸，此黃山之大觀矣。峯回路轉，山之境益奇，而遊人之輿有倦而不能至者，乃大兄必欲窮其勝，振屐而上，披蒙茸，緣荆棘，而余遂弗能從也。一步一折，委曲而上，其上始平坦，拂衣可坐，雲色曠靄，蒼茫混冥，惟見江水濛濛，入目而已。須臾日暮，尋徑而還，忽見僧七人于溪橋間吸水談飲，余問之不答而去，明日復訪之，已不知其所之矣。

臥室記

洋夜子隱于一室之內，了不關世事，曰：此余寓意之所也，或曰：我與子隱于深山之內，流

泉左右，碧巖參差，同棲煙月，共挹雲霞，或醉花以石，或吟風嘯雨，四時之光景不同，而我與子之樂亦無窮矣。何所不寓意而獨於是乎？洋夜子曰：非也。山中之樂，猶是人間之樂也。若此室之中，恍乎其別有境矣。入而臥焉，則羲皇百代之聖人，可以寤寐而遊，闕風瑤池之上，不待穆王八駿而往也。覺而于焉，徐徐焉，圖書分列，琴几宛然，迥清夢于布衾，睹晨熹于紙帳，天色又將曉矣。嗚呼！庶幾惟此，真可以忘世乎。

論（一首）

紀信論

論者以漢之王，皆出于紀信之詐降。我以為此一時之僥倖，而非萬全之謀也。夫項王之強甚矣，紀信不詐，則圍不解，圍不解，而漢王終死矣。安能受此四百年之天命哉？則紀信之功，亦莫有大焉者耶？雖然，此僅可以誑項羽，而不可以誑他人也。城中食盡，漢王出降，此則當素車白馬而出耳。何以乘王屋而從者二千餘人也？使項羽稍有疑焉，軍士不許東觀，且因而擊之，則榮陽必不保，而漢王終為虜矣。尚安得以誑楚為忠哉？且亦幾于賣漢，而非誑楚也。惟天心與漢，故生項羽之莽，而成紀信之功。吾故曰：此固一時之僥倖，而非萬全之謀也。

表(一首)

擬上因皇太子加冠講學敦念皇太后增崇尊諡覃恩中外廷

臣謝表(崇禎十二年)

伏以桂宮初服。霞鶯玉藻之聲。椒掖遺思。日耀金泥之彩。誕溫文而表裕。清漢霄澄。迺容則以揚休。祥光氣藹。敢效微忱于五福。聖德同天。宏昭錫類于千官。臣心隕地。臣等誠惶誠恐。稽首頓首。上言。竊惟周稱上嗣。魚開黃鉞之符。漢首昭靈。雞表赤珠之兆。濯龍門內。能彰教授之風。駐鶴堂中。卽挺岐嶷之質。醴凝神液。嶺山毓美于塗山。芝苗靈根。伊水發祥于瀉水道。先止孝。昭馮翼于璇宮。本係宗枋。茂芳英於瑤序。敬成人于禮樂。典重三加。崇造士于詩書。學端四術。春深玄圃。徒誇袖挹浮邱。秋靜紺林。漫和香傳上德。好學名聞東海。藻擅銅扉。加冠賜自西京。制殊金玦。賓升廟視。方知周道之尊。主信臣忠。卽是魏侯之寶。非無觥陳客醴。終虛霖雨之星。亦有席敞節絃。莫念昊天之日。曠昔游衣之所。月冷晴絲。泊更躋拓之餘。春寒畫鏤。薦櫻桃于故寢。第襲先儀。拂脂澤于空床。暫流悲涕。塘上蒲生之後。何年重覆玉衣。篋邊燕墮之時。祇睹還存石字。縑裙留筍。三星掩泣。淒然象簾生塵。六月含飴。逸矣。彼韋布繹思。祖愛猶低徊。

致慟寒芹，矧宮庭孝翼孫謀。寧且夕忘情步屐，茲蓋伏遇皇帝陛下，百靈受秩，萬卉翔春，紫陌晨煙，塗舞勸農之詔，彤墀夜月，夢寒弊吏之箴。歌湛露而嘉惠宗支，潢縈磐石，芝縉雲而聿興小學，經啓鼓吹，瞻言九廟之神靈，承禱爲大，因念三王之啓佑，務學宜先，爰定緝熙訪落之期，並舉備道醮成之典，煌煌衰色，朱綬彩散流霞，藹藹宸光，翠組華垂繁露，曉日難人傳漏，簾外鳴珂，春風燕史添香，案前獸楡，金蟬酌醴，奮呈贊御之筭，玉導簪絃，鹽設賓筵之軌，樂千春而奏響，風送清商，禮三會以昭容，雲飛羽蓋，蟬顏初纒，卽登紅杏之壇，雞戟退臨，遂入青藜之閣，苑通博望，宛來恆嶽之仙，館啟宣猷，似類華英之市，羽陵蠶跡，盡資銀榜菁莪，汲冢蝌文，成化金華汗彩，迺十六字軌中傳禹，惘然還想堯門，方八百國抗法觀成，窺爾興懷文母，悼禕楡之弗御，歷輅聲虛，撫鞶鑑而長號，鳳臺香冷，流凱風于春曉，寂闕音容，散泫露于秋原，森凝隧路，前星曜朗，彌悲夢日之恩，貫月光銷，追表捫天之瑞，誕布誥于皇天，列祖敬增崇于寶號，徽稱聿新鐘鼓之靈，對揚顯命，備潔苾芬之盛，侑安明神，玉版輝煌，鳳吹傳碧霄之響，金瓊璨爛，龍旗漾紅日之光，瓊笈瑤箱，亘虹梁而上映，真妃仙女，紛覽羽以來翔，縹緲香浮，恍惚降河洲之範，氤氳密，依稀閉嵩室之呼，慶大禮之告竣，百靈呵護，預純麻之旁粵，四海昭敷，雨自九天，鳩鵲遙沾于鶴室，雲多五色，蓬萊先被于芸章，臣等恭際熙朝，欣承盛事，狎非江總，敢陪彈瑟。

之遊。文謝王褒。詎博洞簫之喜。晨炊雞饌。或堪致賞于林宗。夜永熊丸。僅足徵稱于僧孺。倘司軍旅。毋忘戒琇之憂。欲濟時艱。每念命珉之訓。劍芟黑水。未清玉壘之塵。箭劈黃雲。遽沐金縷之賜。瓊壺革帶。寵逾楊賜之衣。銀艾犀纒。恩溢馮魴之賞。昔桓榮稽古。祇膺車馬之頒。卽魏絳和戎。亦僅軒懸之賜。豈如今日。褒及家倫。一命徽榮。人捧告身之印。六卿崇秩。門開資蔭之班。競躋飛率。舞于無前。寧洗骨鑄心而敢後。伏願時修八政。壽衍三朋。端冕垂纓。俾共勵請纓之志。豐碑冊諡。期大弘錫諡之公。羣玉藏書。毋寶白珩而寶善。幅巾任將。不遺繡袷而遺威。則楚樹春秋。兩五百而靈圖永固。虞箴日月。三六千而福祉成臻矣。臣等無任云云。

此題孝將示余。以爲閩中祕密。俗與怪俱作。兄弟各自爭奇。意欲奪元而刻程也。腐志而歿。天乎奈何。父天寥識。

此與崑崙賦俱極華映。鑢心而出一欲傳世。一欲名世也。

碑銘(一首)

泗洲寺橋碑銘(丙子代父作)

竊聞秦帝東巡。始留鞭石之跡。周王西幸。爰有造舟之詠。蓋津埃有阻而必通。川澤非梁。

而莫濟。是以惜民乏政。早稱單子有明。居令無才。每勸薛宣之款。晉傳杜預之績。病涉無人。漢  
籍李冰之功。行師有地。故夏陽當險。是鑄鐵牛。河北多艱。用沈石鼈。岸非千里。曾表大夫之名。  
橋異七星。亦是崔公之惠。况復如來說法。懸般若于金橋。菩薩悲心。接恆沙于彼岸。恢弘象教。  
原爲共入之門。開設龍宮。自作經行之地者哉。維茲泗洲古刹。實在汾湖北濟。葭風蓼月。舊號  
江鄉。漁笛征帆。夙稱澤國。鷺山之宮闕。隨接鳧洲。麋苑之幡幢。卽臨鶴渚。惟杠梁之未成。歎往  
來之乏濟。靡不人患囊裳。車勞濡軌。斷岸蒼茫。莫負泳游之懼。修途恂恂。奚辭揭厲之艱。徐道  
人弘宣誓願。大濟沈黎。就蓮宮而啓建。懸石磴之穹窿。長嶺亘而橫渡。落雁下面臨波。影入清  
溟。乍疑龍伏。梁猶濁霧。恆似虹飛。虛駕重流。妙應斜星之制。跨連絕岸。高分半月之輝。春風楊  
柳。濯濯層欄。秋水芙蓉。依依畫柱。朝來入市。無煩鸚鵡之舟。暮欲歸田。奚俟沙棠之楫。文成未  
遇。成逢授處之仙。武騎來過。還表題書之志。兼且閣樓四起。朱拱相臨。重閣三層。雕簾間出。菴  
蘿蓄翠。臨鐵鏤而垂陰。薜蘆花香。拂石梁而結蔭。山僧持鉢。時來王舍之城。士女燒香。常入維  
摩之室。豈特紫宮南渡。徒法牽牛。夏暮東來。空傳飲馬而已。銘曰。

巍巍崇橋。實河之梁。除道編成。在寺之陽。臨江列楹。安厩修塘。橫絕春水。駕凌流湯。川連  
岸近。路接堤長。跨道龜浮。乘空雁行。用濟車徒。以續舟航。風行帆疾。花落水香。欄稱漢帝。柱表

秦皇方彼元凱，河橋舉觴。

誄（一首）

亡姊瓊章誄

瓊章余第三姊也。性植端凝，夙成明慧。珠籬飛絮，才驚謝雪之吟；玉軫調桐，穎識蔡琴之辨。朝霞映日，有如入畫之容；翠羽嬌春，無異神人之美。加以天情開藻，百秋能通；逸思彫華，諸家咸習。誠飛仙之偶降，非才士之所及。詎期昊天殄我靈淑，享年不永，卒于崇禎五年十月十一日。春秋十有七也。嗚呼哀哉！豈敢雖美，不長寶于敝匣；芷萱信芳，豈終育于常囿。玉摧貽怨，珠碎啣悲。恨與雁而長飛，腸隨猿而共斷。昔年月下花前，常尋梨栗；今日淒風苦雨，空痛山邱。撫素手之纖痕，宛追淑韻；覩殘香之膩紙，還憶芳詞。爰作斯誄，用以彰之。誄曰：

大造毓靈，爰聚瑤池。寶婺降芬，乃誕玉妃。琪葩敷彩，閨蕊舒枝。幼而異哲，高挺慧枝。靄郁闌襟，綽約芝儀。琅情閒逸，玉光朗輝。明采秀軼，清韻娛暉。鐫才錦字，藏影金閨。粲若雪積，爛若雲披。少嫻女史，長習名詩。動容成法，發語能辭。東薪言林，桃夭于歸。碧天忽悴，紫簫永離。銀河傾槎，鈿鏡孤飛。嗚呼哀哉！娉容閒出，修態天然。姮娥遁麗，織女讓妍。肪體玉頰，素鬢朱顏。瓊容



豔冶瑤質幽閒。鉛華非飾。黛粉無權。芙蕖嬌白。梨花睡煙。游龍方媿。驚鴻乍翻。細語生芳。美睐  
流精。鬢髮垂鑿。蛾眉含英。絳霞天末。明月中庭。胡然柔綽。宛其莊凝。羅衣香嫋。弱步芳盈。欲顧  
憐影。未笑傾城。人或西子。仙則飛瓊。蕙茂班蔡。德比煥煌。溫和明晰。靜穆端方。嫺詳愷悌。弘容  
慈良。兄弟姊妹。宵咸樂康。潔炯琬琰。馨香芬芳。獨抱澄韻。寂鎖清光。寒日方照。春雲初翔。曠懷  
迥絕。霏雪偏香。幽襟允耀。麗模未彰。句驚瑞葉。頤叶椒花。挾菁摘藻。芸思無涯。揮珠灑玉。黃翰  
能嘉。漪澗晴瀾。杼布絢霞。何體不嫻。何辭不葩。冊函湘綺。帙著縹華。觸懷成興。寓目隸思。琳琅  
響發。綉組色靡。織甗翠管。敷瑤墨泚。靈心虛運。慧巧無師。局窺弈旨。雨集星離。征鴻赴沼。羣鶴  
依枝。廣陵究律。敏協桐絲。明光曲奏。楚妃淚滋。書裙染練。雲行露垂。畫蟬榻蝶。斐聲英蕤。丰神  
瀟灑。曖曖生情。性厭繁俗。思習濟清。煙轡逸致。霞壑高盟。游仙寄詠。步虛飛聲。裳規支製。餐懷  
落英。奇挹石髓。期採蕊鬋。蓉城偶謫。蘭香再生。方來碧澗。忽返紫瀛。雲耕鼓瑟。鶴瑄吹笙。去此  
塵宇。還彼瑤京。嗚呼哀哉。瓊姿帝子。異世長隔。玉貌仙人。徒爲過客。神襟猶在。奇方可述。往駕  
弗續。音容永失。嗟兮賢媛。何年太迫。雪散華顏。露銷貞魄。乍背華門。獨守荒陌。幽域千年。紙錢  
一佰。嗚呼哀哉。匣無餘澤。衣有遺香。爐灰空冷。瑤琴靜張。鏡沈石黛。燈孤畫房。珀枕虛懸。羅帳  
徒懸。璧月暗彩。繁雲結觴。蕙折纖枝。蓮彫豔芳。泣血滂沱。愁肝裂腸。山色淒碧。帝關阻蒼。嗚呼

哀哉。泉燈閃閃。繡幕飄飄。香容永絕。絮酒空澆。靈幃何寂。芳魂何遙。北風斯凜。陰雨恆漂。白楊  
鳴咽。青草蕭條。杜鵑叫壠。鸚鵡悲宵。吁嗟嬋娟。遶焉悴凋。嗚呼哀哉。亂曰。玉樹兮摧折。彩雲兮  
飛散。花辭條兮長落。雁分飛兮永斷。嗟佳人兮一去。殫終世兮不見。瞻平原兮窈深。無涯。觀流  
波兮蒼茫。失岸。望彼天兮虛寥。怨九原兮情漫漫。視白日兮無光。拊悲膺兮長歎。嗚呼哀哉。

# 靈護集附

## 挽什

不肖有小啓。奉求名賢。垂光幽壤。聊伸永痛。惠徵棧筆。尙寥寥也。容俟續刻。今以至親近戚。及自一家哀悼之作。先綴於此。

## 輓葉威期世盟

周永年

曾見臨川哭阿遵。汾湖淚雨更何如。孤貞得伴全生苦。(先有嫂未歸矢節)弱女非男懋意虛。(有女生未滿月)大病豈知加小愈。看棺那使出無車。晉人空自誇能達。宿命都緣結恨除。  
仙壇舊識雁行斜。(湖公向有語云君家應行還有問傷)歲在龍蛇信可嗟。叔寶故應談絕倒。賈生弗及賦懷沙。六龍下食今番減。七業俱興兩度賒。此日通翁猶未老。非熊奇事豈爭差。

## 悼亡甥葉威期

沈自然

欲哭難爲聲。欲言難爲文。豈真有此事。掩耳不忍聞。出入無次第。踴胎停空雲。嗚呼亦何歎。舛錯誰能分。

所悲非一端，萬事常決絕。生死苟不昧，哀哀向誰說。老親堂上號，少婦閨中咽。子亦誠忍人，胡能遽相割。

爾母中歲殂，爾昆卅角亡。兩姊從風凋，幼弟隨歿殤。慘毒併一門，雨淚流穹蒼。豈獨至親人，餘哀泣路傍。

慙慙狂妄流，醉飽安無恙。志士稟幽貞，坎壈遭天喪。不惟不得老，抑且不得壯。悠悠輔嗣魂，何處談玄暢。

爾生孩抱時，娟娟如玉珪。我翁性孤抗，見爾亦解頤。十五游庠序，循飭多令儀。倏忽成陳跡，追憶肝腸摧。

森森寶樹林，圍繞羅庭前。燦燦冰玉姿，彩質耀相宣。一旦逢摧頹，衆美缺不圓。雛嬰未匝月，良春僅逾年。

憶昔聚西齋，新文喜華綉。琅琅水龍吟，篝燈照夜讀。攜酒花下戲，散髮林間沐。當日歡笑聲，誰知變成哭。

昧昧存亡際，惻惻縈我懷。理窮人意促，世變天心乖。陽和二三月，冰雪兼陰霾。東風如箭發，蕊蕊落花不開。

憂愁能傷人，知子有何憊。快樂能戕生，乘躬復端慎。年少卽幽塗，朱棺蓋青鬢。冥冥造化心，茲理何繇問。

雜肴陳兩豆，清酒傾一壺。我死爾莫我，我翻莫爾乎。生死槿花光，閃爍只須臾。魂兮早來歸，鑒此傷心無。

哭亡俗七言絕句四十首

葉紹袁

哭盡殘燈永不逢，片時回首卽千重。空餘白髮蕭蕭影，獨伴靈床怨曉鐘。

茫茫魂去欲何依，夜靜天高月正微。莫道啼猿在三峽，故鄉春色最沾衣。

誰將玉樹遽長埋，繡佛幃前四日齋。（作十日佛事，保方及四日）花散維摩天女現，卻教阮

婦折金釵。

暮雨瀟瀟閉笛門，慘然冷色暗黃昏。挑燈忽憶微之句，又復重添兩淚痕。（元徽之詩消遣又

來錄爾母夜深和淚有經髮）

一病侵尋半載餘，茂陵無路返相如。依然四壁家徒立，賦草何年奏子虛。

舊京兄弟上書歸，江上秋風送落暉。卽使鍛殘雙雁羽，如何行斷一孤飛。

無限雄心控未伸，橫几空有研留塵。青春年少歸何處，老眼模糊哭子人。

滿篋清文自泊如。半間斜屋鎖玄居。尋常兀兀編蒲柳。黃卷猶存薤葉書。  
兄弟相依二十秋。破床敝幕未曾羞。怪來貧骨天生定。貧到今年又不留。  
一回慟哭一魂銷。把酒臨風帶淚澆。醉後不知兒是死。再呼衰藥待明朝。  
閒來愁看薛牆西。曾對荊花掩淚題。又折一枝紅夢去。那教人不萬行啼。  
猶憶辭家別故韓。一帆南浦挂霜威。也憐病起歸應早。年去春歸更不歸。  
元宵風雪沍春寒。冷斷鄉思旅鬢殘。猶幸子規催夢緩。病容愁緒得親看。  
異鄉客久似飄蓬。贏得沾巾淚眼紅。汝去九原兄去越。三人生死各西東。  
扶病歸來強戴巾。偶過方丈暫栖神。怡顏猶自憐諸弟。那道黃泉作故人。  
渭陽原上結瓊蕤。晝嫌曾憐幾日眉。燕子不歸簾月冷。三更翡翠泣孤幃。  
阮郎貧徹漫嗟吁。母去誰人更作孺。留得舊衣燒卻後。故箱還有剩衣無。  
雨橫風淒奈若何。閉門空有淚痕多。不知今夜兒誰宿。可共護闌一處過。  
無情無緒淚常潛。荒草空庭盡日閒。祇有鷓鴣啼不住。一雙啼去復啼還。  
弔客紛紛舊日盟。素車白馬古今情。文章黃土成何事。誰叩皇天叫不平。  
少婦閨中哭未休。翠鬟綠髮化紅愁。雖憐弱女猶堪慰。恨不爲男喚阿侯。

撥亂朱藤似恨長。夢殘蝴蝶也茫茫。閉門猶恐梨花悴。自拭千行與萬行。  
牡丹花對夕陽開。坐地看花把酒盃。一哭直教花盡萎。花盡還得再歸來。  
鷓鴣無端怨太頻。舊闌干外綠爭新。閨中最似薔薇雨。紅淚朝朝泣向人。  
一窗愁雨浣春紗。寂寂窗陰鎖影斜。叫冷杜鵑紅血盡。至今枝上不開花。  
千槌槌碎夜光珠。不管人間愛惜殊。欲問關情何處切。掌中點點血珊瑚。  
海棠開遍曲欄新。似怨如愁不耐春。今日臨風憑弔客。去年同是看花人。  
初時求療到金閨。兄弟相隨十日裝。漫說劉晨能採藥。龍宮無術欲傳方。  
蕭然除夕不歸家。白髮孤燈夢亦遑。憐得長兄留伴汝。今朝同與哭天涯。  
酒淚長驚蕙草摧。晨光倏忽夕陽頽。當年悔不誅徐市。海上何曾覓藥回。  
落盡櫻桃又鳥啼。斷腸門外草萋萋。若將淚點隨流永。碧海遙通雪嶺西。  
夜來曾夢在西廊。新築亭臺畫粉牆。應是修文人住處。故留汝在奏長楊。  
飄搖總幕瑣堂東。曾否魂遊到此中。止有孤身雙淚眼。鶯花鵲月對春風。  
春來無處不芳菲。獨有楊花似淚飛。試向風前相比看。萬千離恨兩依依。  
文壇方擬步時名。月旦曾蒙父友評。誰料玄穹能太忍。半天風雨折青萍。

殘更未盡憶天明。待到天明痛倍盈。何似更殘猶有夢。又看日影望催更。  
傷心無日不霑襟。好友相憐慰好音。那得便教忘卻汝。一當憇處一傷心。  
年少何嘗有業塵。困中深自斲根因。願留病體飯三寶。佛法于今不度人。  
生成貧士福無緣。佰紙安能買百千。全是閨中綦縞婦。嫁時衣作拜經錢。  
古來長恨恨綿綿。今日如余更可憐。汝喪家貧身又老。憑將何術度餘年。

次貧病十韻再哭亡俗

奉倩眉孤強耐貧。西河又作哭兒聲。繁霜黯黯重正月。凍雪悠悠誤老人。蓋橋觀調初有婦。(婦婦亦能文如令調僅婚一年耳)。茫離空佩未稱臣。中郎漫道書傳女。何日松楸付阿新。(白香山)

以姪阿新爲婦

歲暮寒深霰雨飛。片帆南去別荆扉。(歲月十八日往嘉善就醫遂不復歸)夜歸鴨艇生耶死。(二月初一子夜至家歸就水也)人駕蚪車是也非。上帝何嘗公道在。皇天真與好修違。崩城忽似渾闌事。黃鵠歌哀兩鬢輝。(乙亥併兒未婚之婦顧氏十八矢節)

修文璇館碧宵重。無路人間可再逢。一自鶴湖驚斷雁。至今鴻冢訴秋蛩。(去秋先就醫金闕)半年除藥傷心債。(除價至今未清)。故屋招魂旅病容。(死于庵中歸殮于家)。試採前汀蘋葉看。子規



催化血芙蓉。(歸至座二日即死)

屢遭家難幾如子。九載于今週起居。(壬申至今)白髮窮殘幽憤血。青燈炤絕斷腸書。曾誇珠樹攀鄰桂。豈料瓊芝作惠樗。爲訪三生石上話。葛洪川畔越巫虛。(武林有潘吳列人爭傳異之特往叩問俱是風影)

紫霧冥漠若爲家。萬里崑崙遠未加。(借曾傳夢游崑崙山感)藪草堂前先築室。(借母)池塘春近可通涯。(借兄稱)裝軸金臂追心碎。(乙亥訪公有君家應行還有割傷之語命畫筆描佛事之至今像猶在也)縷汲銀漿引恨賒。(病中內熱日思井水)祇有木綿衫上點。天台分得醉桃花。(借劉阮事醫往天台禮佛借亦天台也)

往事閑題正莫消。又驚異慘幾堪聊。非慚先見同彪瘦。自識多情並衍饒。泣簡詩文供世弔。哭籤筆硯對靈燒。安仁賦愴孤孩貌。况是初生二十宵。

貧骨如冰徹影涼。病中焦火熱相當。祇因槐市秋風促。故爾松舟夜月忙。(覆考冒暑感病之麟)敝榻深深拋蠶粉。遺篇寂寂閉殘陽。欲知兄弟悲慘處。滿架琴書一渺茫。

賈田禮佛冀延生。法海幢幡會不輕。敢信文章能積祟。豈緣骨相太傷清。鍼挑左指漸公字。(陶侃左手有文直達中指上橫節相者日若敵于上位極人臣侃以鍼挑作公字借左手中指亦然)婢探奚囊半

壓城（李長吉）回首秦淮舊明月，何年還望遂虛名。

白下歸來一病侵，臘殘春到總淨陰。廿年呼父人何在，兩地隨兄夢亦深。（郡中武水兩處就

醫俱兄同行）罪貫若盈須我受，慶餘無驗向兒尋。天公肆毒真如此，拚學共工那得禁。（共工頭

觸天崩，倅曰天果可觸，不至今日，即至今日，當無餘天矣。余曰：餘亦何益不餘，反無今日事耳）

龍腰騎折謫常休，還少應衰十四秋。地是瓶山無玉酒。（在嘉善居亭瓶山，山以酒瓶壘成，瀛洲有

玉酒飲之令人長生）庵名圓界作離愁，閑庭白日魂縱杳。細雨黃昏暮影悠，三徑盡荒惟五柳。條條泣淚向風浮。

哭威期塔

沈憲英蘭文

奠俎空陳酒一卮，天涯此訣見何期。無端寇碎春紅早，忽遇霜凋夏綠悲。燈焰難嬰啼素幕，風吹遺像響靈幃。不堪癡想人如在，惆悵還疑夢裏時。

綠窗春盡雨闌珊，故篋遺文意倍海。外靈香魂莫返，閨中隻影淚成癢。百年露草孤山寂，一載風花逝水寒。笑語宛然猶在耳，月明何處倚闌干。

絕句十首

寒食煙多日欲西，紙錢風逐落花飛。棠梨題處金鈿碎，門外吟魂歸不歸。

忽遭荼毒訴蒼天。血淚麻裾眼欲穿。痛極哀呼身可贖。不辭九死向重泉。  
梧桐篩影日初長。靜對遺容漫斷腸。問君君在渾無語。凝徹雙眸送夕陽。  
物在人亡事事悽。畫梁空落燕巢泥。晚來更有傷心處。無數棲鴉伴對啼。  
數竿修竹弄珊瑚。挑盡銀燈月滿欄。子規枝上聲聲血。血淚啼殘淚未乾。  
淑景如前獨掩扉。深沈庭院影相依。無情花草誰爲主。歷亂東風空自非。  
獨對几前括碎腸。腸迴百折淚絲長。磁罇香篆沈沈裏。穗帳垂垂塵滿床。  
一去茫茫隔萬重。泉臺渺渺信難通。孤燈長夜空相泣。泣斷東風不再逢。  
叫破蒼天誰見憐。嗟乎薄命是何緣。從前世事茫茫影。稽首金身學坐禪。  
琴瑟相和易促離。祇君才器敢齊眉。自慚蓬性原非匹。天遣孤鸞泣數奇。

哭威期弟

葉小統意詞

洞房琴瑟暖春風。雙鳳簫聲對碧桐。驟雨忽驚連理折。彩雲流影去無蹤。  
秀質翩翩早請纓。文闈初試未成名。多應還恨乾坤小。難轉雄才赴玉京。  
荆樓長共弟兄居。慷慨揮書日自娛。壯志未酬同一夢。誰憐滄海墮明珠。  
晴雨慙慙總可傷。塵垂寂寂舊迴廊。從今花鳥徒增恨。兩度春風斷雁行。

日色荒荒怨鷓鴣。窮泉冥漠痛難呼。離情不學春雲斷。未睹羊碑淚已枯。  
冷雨尖風度朔雲。嶺猿哀嘯不堪聞。臘前送我江頭別。何意春來我哭君。  
寒暑無移守硯臺。情懷端不爲春開。從來肺病原非一。哭母傷兄想過哀。  
悲歌彈缺氣如寬。何事才餘福不齊。誰料蒼天能降毒。鴛帷未冷變霜聞。  
依依斜日上籬鉤。猶是當年把袂遊。煙鎖北邙千古恨。叫殘腸月冷荒邱。  
千遍相思千淚垂。傷心怕作哭君詩。憑誰喚醒紅塵夢。碧海青山話別離。

哭七兄戚期

十五歲葉小繁于環

自從閨閣別離侵。幾度寒宵盼遠音。簾外依稀春意曉。春來徒得淚沾襟。  
兩地思兄恨不隨。自憐今日泣蛾眉。憑將夢逐天涯遠。有夢歸來卻訴誰。  
書齋人去鎖蒼苔。可歎離魂不復來。總有遺容虛舊日。江郎彩筆向誰裁。  
關雎昔日架前詩。曾向紗窗教妹時。猶剩餘文新讀罷。怨留湘篋莫重窺。  
花枝一夜向風凋。此去仙槎弱水遙。幾陣寒鴉歸度後。再無雁字寄春宵。  
煙雨清明送落花。靈凡法轉妙蓮華。紙灰空逐花飛散。奠俎空陳一盞茶。  
午夢梧桐舊日非。前生緣短易凋稀。淒淒斜月黃昏冷。空伴孤孩泣素帷。

碧天雲散竟悠悠。數載風光一日休。笑語宛然難可問。月明何處在書樓。

哭亡弟威期

葉世佳雪期

無邊幽悶對春凋。零落花前淚暗饒。自別芸几追夢杳。惟留紙帳伴魂飄。離羣雁影分雙羽。叫月鵲聲共一宵。堪歎相如終病渴。茂陵秋雨最蕭條。

不賦凌雲賦。玉京空將擲地浪傳名。禰衡有學虛期許。賈誼無緣輔聖明。半世文章荒筆塚。十年才氣負書城。蕭齋遂作招魂處。寒月霏微落絳英。

青田鶴去淚沾巾。棠葉蕭蕭夜雨新。共謂君才宜作棟。豈知爾命故如塵。煎香不渡瀛洲海。遺佩難尋漢水濱。中夜自悲情分薄。三生石上恨前因。

花塔連袂與偏豪。自是文心瑞錦濤。忽奏霄笙辭白日。今來絮酒滴青蒿。追思久恨游仙近。弟有夢游崑崙賦山賦。傳世徒誇空殿高。(王延壽代父作靈殿光賦弟亦代父與泗洲寺碑文賦俱刻第

中) 一自金陵爲逐客。至今風雨泣江皋。(下第南歸卽詞)

憶昔飄蓬作旅游。天涯到處是悲秋。相依多病誰知苦。剩有同心對識愁。越國雲山回首絕。(就醫武水)秦淮風月望中休。可憐聊落生前事。腸斷青松譔古邱。

貧士從來天不憐。題橋簫志向空煙。窮愁燈火三千卷。冷淡風光二十年。幻海枉牽情死

春人間漫說鬼才仙。黃昏哭斷寒窗影。無數傷心待夢邊。

讀書樓上雁驚殘。是處魂飛是處寒。白髮親傷衰影瘦。青春婦咽哭聲酸。遺孤見父含珠後。幼弟思兄故枕單。惆悵人生已如此。一家今有淚相看。

哭母方餘幾度春。悽悽霜露百年身。思親自昔還同爾。陟配于今少一人。垂柳無情猶弄晚。新桐何意復流晨。信知舉目俱成慘。冷落殘編滿屋貧。

庭前繁綠長芳茸。獨訝荆花蕊不穠。（書室前有紫荆一株兩年忽被葉凋）幾日草堂相再賞。今朝楓渚隔千重。鶴原舊恨追前夢。鶴表雙歸怨晚鐘。鄴架依然還未改。可教異世更來逢。

全家骨肉痛存亡。聚散真如墮葉霜。數載熱管永訣慘。半生已是撫棺忙。明知蒼昊開難叩。漫道青年境可傷。欲語不成悲滿塞。傍人忍對此哀腸。

哭亡兄威期

葉世侗開期

幽幽曠野杜鵑啼。啼時白日風淒淒。鵲血爲君徒灑盡。茫茫荒草成紅泥。春寒紫塞龍沙冷。一雁忽爾悲分離。千里萬里難相逐。古戍渺渺無週期。荆花若爲人恨別。畫欄絳雪摧芬菲。含情欲向故人語。故人何處徒沾衣。有兄有兄我威期。志冲牛斗何磅礴。至今英氣猶青霄。倏忽一生朝露薄。憶昔連床二十年。黃昏夜夜同書閣。何期此日隨變遷。彩雲吹散長寥落。寥落

泉臺一去悠飄英無復綴枝頭。憐兄乍別高堂寢。春魄蒼茫入夜修。江南春色生芳草。湘渚秋風送碧流。流澌湘水最無情。桂舟欲渡客心驚。驚斷洞庭湖上色。征鴻嘹唳暮天橫。吾聞自古亦多故。豈無才子歎平生。或有烈士稱暮年。功成豪傑垂英聲。問傳年少氣方盛。荆山玉碎悲珠沈。賈傅懷沙曾賦鵬。終棄棄縮空長纓。然而已有明主知。松楸拱墓還誰名。何獨於今生不天。蚪車一旦催人早。有志未酬身先死。生芻零落同衰草。讀書萬卷空已矣。平津折劍知誰曉。嗟天厚俾斯文章。何爲又使中道夭。雄心壯懷成灰燼。千古遺恨爲兄盡。怨逐長江流不窮。滔滔溝澹哀相引。流哀流怨空自傷。死生永訣終參商。參商今夕呼重長。故園遙別隔年霜。我兄去年與家別。旅居臥病天一方。梨雨寒光淒曙色。梅梢凍影怨斜陽。庭中物候已驚殘。游子長征猶未還。天涯遙數重歸日。爲花蝶草可闌珊。無端帝檄來相迫。英英從此悲聞笛。歸來祇剩舊枝斜。斷欄蔓草西隄壁。尋梁燕子猶飛飛。飛飛若問人幽寂。清晝蕭蕭細雨寒。殘宵黯黯荒明月。明月多情炤影寥。細雨寒扉似鳴咽。鳴咽不聞何所之。櫻桃花落暮鴉歸。歸鴉飛入花陰裏。宛出庭前延佇時。倉皇欲覓又誰匿。沾巾維有淚如絲。絲絲有淚念骨肉。余渺何知慚樸樵。哭母悲兄日垂泣。泣盡西風涕漣洩。吁嗟再把玉樹埋。寸碎肝腸何日續。釋愁無計陳思文。深情奈何桓伊曲。清歌一曲哀雲起。雨霰瀾天聞鬼哭。哭對靈衣終惘然。遼東歸鶴望青田。青田

鶴去遼東遠。華表何年再一傳。祇有啼鵲啼不住。三更叫月淚涓涓。

哭亡兄威期

葉世儋書期

百年倏忽暮雲間。長隔幽明有淚潛。別夢空嗟春夜杳。斷魂難問舊時還。詩傳燕縷悲瑤塚。人似羊碑泣峴山。豈料兄才稱蛋死。漫隨流水去潺湲。

一從殘臘別寒宵。隔歲屠蘇不共朝。空盼異鄉歸計好。誰知禪榻去魂遙。牽幃忍淚相愁勉。執袂無言共寂寥。何日緱山人再返。塵懸紙帳影飄搖。

欲問青天不可緣。何仇何怨毒何綿。哭兄死痛纔經日。旅病生離已隔年。雁影墮雲驚字裂。荆枝泣雨墜花鮮。望涯不見徒延佇。莫道湘江恨獨專。

傷心離別梵燈中。紫管人虛再不逢。瑟瑟寒風啼蜀宇。萋萋芳草怨吳宮。休言夢斷難回首。卽有魂交枉付空。可歎生來通花蕊。他年還似舊年紅。

一霎西風光景非。從前相聚信無幾。依然舊燕葦籬至。何似離人蒿里歸。恨壓秦城悲杞婦。恐遙楚渚泣湘妃。惟遺子敬空琴在。寂寞蟪蛄網玉徽。

書齋寂寂雨蕭蕭。哭斷東風去莫招。魂向天邊應自憤。怨含地下料偏饒。芳音欲問虛青鳥。壯志何年折迅鷗。誰道皇天憐積善。賢豪從古半無聊。



煙樹千重鎖覆埃。無端人去不回來。平生每負稱仙史。致令今朝作鬼才。剩有餘文供蠶簡。獨留新管賦瑤臺。數年聚首長休矣。惟藉澆靈酒一杯。

月明曾照故懸紗。獨歎流光人已賒。冷閉空幃成幻境。讀殘餘響卽天涯。三更叫盡雙鴻淚。（并悼二兄）五夜飄寒六出花。未遂功名身枉死。題橋深怨恨無加。

空床猶似病時陳。祇剩西窗影尙新。穗幕燈昏渾是夜。泉臺漏杳不知晨。恢違有志書生淚。報國無身草莽臣。回憶年來同學日。可憐烟雨付紅塵。

九京一去痛難尋。濕袖啼痕夜夜侵。蔓草碧苔寒月寂。梨花細雨暮天陰。清歌無奈長愁絕。樽酒難澆疊恨深。此別祇須石上會。來生又恐昧于今。

### 哭亡兄威期

十四歲葉世館星期

昔年共事謝齋前。今日分離歎棄捐。書帳無歸塵積網。硯几寥落冷淒煙。忽思欲信非真死。試想猶疑更可憐。此去休將有返望。祇留燕子故梁邊。

兄弟相安一室貧。豈虞遭此痛難伸。花朝聚袂商今事。月夜同床弔古人。語笑翻爲流涕淚。清談已作訴悲辛。追思莫挽徒嗟矣。沈日斜暉落水濱。

除夕他鄉隔闕嗟。斯時惟望好歸家。病離去歲遙相待。聚不三朝卽慘加。日落疏櫺空設

塵月明春樹但棲鴉。未知泉下知之否。仰視高天泣暮霞。

昔傷未久又今離。人世何其苦若茲。見室卽迫同學日。看花忽憶共遊時。傷心不忍翻遺卷。染淚無聊作悼詩。若報善人真不爽。吁嗟天道太堪疑。

靜以思之莫奮飛。架邊還掛舊時衣。春風淑景愁皆是。明月空庭境不非。千世于今難會聚。百花從此莫芳菲。回思昨夜殘燈影。猶似床前掩病帷。

幾年既翕忽焉消。故室淒其付寂寥。空奠酒樽惟鬼饗。虛燒錢紙作魂招。花將欲謝同誰看。烏待重啼亦黯銷。恍惚音容如在目。何時再與共良宵。

煙草淒淒曠遠天。滿庭光景最蕭然。生還哭死悲能訴。死去離生苦更煎。同酌風前可再日。共談月下永無年。我兄負志高于世。十載猶傷遜子淵。

不知重見在誰秋。一去昭昭就冥幽。自昔同居何誠苦。忽逢分別不勝愁。蕭蕭細雨添人泣。瑟瑟悲風吹淚流。若訝若驚終未信。哭聲有盡恨無休。

哭亡兄威期

十二歲葉世倅工期

同居一室好相期。倏忽天涯頓別離。夜半夢中驚寤起。猶疑還是讀書時。憶昔兄初哭母兄。猶然泣涕恨箚箚。誰知兄又爲人哭。舊怨今愁無數情。

當年舊恨未曾消。又見兄今卽隕凋。骨肉半爲泉下鬼。慳留遺跡冷蕭蕭。  
鳥見人哀亦且悲。生離死別豈無思。幾年歡樂飄然過。一去于今絕會期。  
月明共聚喜娟娟。不道今爲涕淚漣。從此幽明兩境隔。欲逢惟在夢中天。

### 輓威期姪

葉有震仲起

晤別瓶山隔一旬。竟乘黃鶴去無聞。於時微念憂偏切。深歎賢昆痛可分。筆蕊未能全吐  
彩。墨池竟爾不生雲。龍文遽逝殊堪悼。況篆君翁德復殷。（曾養荷瓶山精舍前數操日身候之留宿宿  
別去旬日遂聞訃音）

豈須琴破已名歸。何事修文帝命催。鸚鵡烏賦成君絕筆。鳳毛亡後世無才。歸從蘭若初心  
解。覽向蓮峰三乘該。埋玉于情何可已。徘徊清夜每生哀。

### 輓威期表弟

嚴與敬聖興

河陽標格雜陽才。勝質英文世共推。不分丁年她召疾。也知庚日鳥徵災。康成帶草淒應  
斷。子敬絃琴痛必摧。莫訴向來攜手恨。擬書天問寄泉臺。

最憐揖守似終童。羈越雄心一夢空。腸斷嚴親與昆弟。淚垂逝水動寒風。旌搖柏谷竟長  
往。笛急山陽難再逢。爲語淒涼竹林伴。涉江文在許誰工。

哭威期表弟

嚴祇敬仲日

丈夫重意氣，離別未忍輕。鍾情正我輩，如何隔死生。一去不復聚，千秋誰令名。古今同慨歎，況是弟與兄。鞞鞫余小子，提攜渭陽情。弱少登高堂，濟濟皆瑤瓊。荀氏稱八龍，顧子難爲甥。亂拋湘帙戲，時共棗栗爭。束髮知讀書，邁往君有聲。江上樂晨夕，風概敵無勅。睽違四三載，帶水佇盈盈。相逢歧路隅，子留我或行。壯志素有期，何必行跡并。昨歲聞臥痾，失意感和平。致身苦不速，大器鮮蚤成。由來貴知命，哲人當自明。奈彼二豎何，羈之若繞縈。我時問君疾，君爲強起迎。神理既憔悴，顏色猶鮮頰。語我病恐殆，聞言心怛怛。觸目琅玕姿，兼葭雜藍瑛。前年碎一璧，茲兆安可萌。頰首問天公，天公豈其肯。日月方幾時，念子中夜驚。南方果卑濕，鷓鴣飛來鳴。蘭蕙俄摧拆，春風萎芳英。惟彼蕭與艾，何爲盡敷榮。櫻茲造物忌，反復凋荃蘅。平生今已矣，一棺在兩楹。拜君總帳前，昆弟哭雨傾。舅氏痛君切，無言淚縱橫。我欲前致辭，不敢披微誠。死者無可追，此語他人評。理玉著土中，愴怛心骨營。空床滅陳跡，遺文發新硯。肅肅豈歸來，寒鷗吹素旌。白晝忽長夜，中宵餘短檠。荒郊自迢迢，流水何情清。掩涕返故廬，悲吟不能廢。

續郵

君張以渭陽至，情俯垂挽，悼賜至時，實六月十四日，已鐫及二十餘紙矣，不能攙入。

卷前。又不敢同于代木之求。俟諸異日。附于後簡。心又不安。列爲續云。

威期甥相法才而不壽。會向友人言之。不幸言而中矣。仲韶姊  
丈哀慟之餘。爲索挽詩。業以不文辭。而情又難已。夫數旣不移  
悲之何益。首借公明之語。用錫濬沖之傷。 沈自友

精爽煙浮何晏姿。才名富有少遐期。妖虹夜斷秦樓月。飛電春摧謝院芝。成佛定知先懸  
業。修文偏要及芳時。茂陵遺草應重緝。死後沈檀香更奇。

## 祭文

哀威期甥文（并誄）

沈自炳

嗚呼威期。爾生而穎。爾生而溫良。爾生而孝友。端恪。慈愛。惇信。氣峻而志方。爾生而軒朗  
英茂。藻耀高翔。孜孜匪懈。力學而自彊。器識傑然。自拔卓乎不可一世。意固未易以可量。乃奄  
然蛋世。芝焚蕙折。天地悲涼。親朋雨泣。高堂冤痛。幼婦頓絕。而摧傷。嗚呼哀哉。何賦材之明淑。  
乃厥命之難長。集世德之餘祐。胡善積而禍昌。世固有食肉衣錦。目如面墻。身鄙穢鷲。愔恣輕

狂。終身無恙。志樂身康。孰是東身飭行。勤思刻礪。當綺歲而死亡。割肌膚之至痛。掩壯志於泉下。入修夜而不陽。嗚呼哀哉。昔余先君。愛我伯姊。歲在洽協。投簪海畔。晏處故里。姊時歸寧。攜抱于爾。娟然玉苗。能笑能嬉。時余將婚。先君志喜。對姊命余曰。汝婚而有女。必將以配此子。予不敢忘。逮先君陟遐。而首誣爾支。（君唯女字）乃終執篋。箠于吾子。嗚呼。豈非天賦。晏爾一載。自春徂冬。僕僕于道。槐黃失意。而遂齋志以終。別鵠夜怨。悲鸞曉空。虛閨漠漠。幼整鞞。嗟弱息之無嗣。撫雛嬰以永終。誠天命之若斯。何荼毒而多凶。憶余秋居白下。被諱棘闌。同爾昆而慰余。切切備至。方掩涕而吁歎。逮冬之初。予遭沈疾。困臥牛衣。念爾昆友。時及予帷。惠我靈膏。解我愁思。閱我貧乏。分菹芥以進台。此時瞻爾顏色。氣浮面聲嘶。予實驚且懼。爾謂予曰。醫人告予以暑疾。舅氏不必于憂疑。予方信英年之無害。孰意其彌留而難移。嗚呼哀哉。予至冬未。雞骨乍興。走力問子。不獲爾音。繼聞就醫以入越。而翁而昆。時慰余以嘉音。逮歲逾盡而未返。子實耿耿而憂深。恨余疾之未艾。不得匍匐執手而言心。乃倉鶴寡術。神巫鮮靈。郵侯仙樂。既戾止而不同。王孫籥筆。入闔闔以宵冥。嗚呼。孰謂向之悲予者。予且死而更甦。而今之不克自悲者。遂一疾而限其生。能不痛哉。吁嗟已矣。生死長辭。春旭頰紅。珠魄傾輝。華叢霜折。丹翻風摧。丁令一去。歸來何期。紆懷軫結。疾首何知。既陳詞而引痛。復永歎而昧之。

誅曰分裔雲夢。表係江淮。宋聯星耀。明昭日回。家聲淵浚。國牒山巍。魚組曠棘。蟬珥垂槐。武繩孔揚。翼燕有奕。鳳謝世興。龍荀鮮敵。桂岫分紅。草池疑碧。玉勝王甥。珠驚敵客。母旣道韜。林下風清。妹亦令嫻。幽蘭載廢。美被夙愛。劉帶兼誠。分菓克讓。易衣忘貧。咏媿白鶴。賦同黃雀。警穎蚤年。芳英紛薄。囊錦心刳。床繩膝削。未配通經。成童入雒。意平南斗。氣過增城。雄文痛哭。厲志請纓。一蹶不遂。驟爾忘生。鑣鐻易折。豫章難成。命也如何。智豐福塞。簾鳳孤飛。笨鶴獨遠。風徑亡琴。月魄餘卷。丹壑煙霏。墨花露翦。遺詞若語。畫影疑臨。幃燈宵掩。簾曦晝陰。梧鷓獨嘯。竹霞齊吟。紅薇落錦。香粟飛金。涼暄代徂。悲恨靡訴。嚶嚶孤女。哀哀幼婦。蘭學徒陳。金鑪虛炷。帝魄難歸。夫山空駐。盤龍罷鏡。比翼辭裳。浥淚鑄墨。韻楚激商。才遜劉氏。哀同敬姜。兼葭自愧。冰玉偏傷。

### 清明祭文

葉紹袁

維崇禎十有三年歲次庚辰。閏正月二十四日丙午。第三子邑諸生世倬威期。法名靈護。年二十二歲。卒于東邨家庵園通精舍。稱佛鴻號。送歸徂化者。智靜智印寂通三上人。越七日。二月朔壬子。還殯于家。嗚呼痛哉。又越十六日丁卯。清明。父天寥灑淚爲文哭奠之曰。嗚呼痛哉。倬兒胡然死耶。我之所屬望于諸子者。於汝最深。而名塗文籍中。亦以汝與兄侄爲雙龍之

並起。二驥之齊軌也。而胡然死耶。我年五十二。而汝未哭我。汝年二十二。而我先哭汝耶。嗚呼痛哉。長沙有言。烈士殉名。汝爲名死。是耶非耶。非汝殉名。名實迫汝。己卯維夏。衡文之使奉簡書而至。則河朔初避之始也。檄下郡邑。更殿最前。柱史所讖者。戒期甚促。而茫無定居。汝與兄。侄倉皇應之。帆張笠澤。旋看三泖之雲。山望秦干。又逾五茸之水。一日夜間。往復二郡。跋涉至峴。僅得一當焉。扶桑赫熾。大火躡升。汝病新起。彤彤不勝暑矣。猶幸試無汰額。遂赴留都。家產囊破之餘。室困罄懸之久。勉棄汗菜十畝。稍治行裝。我送汝兄弟。與君服。勇于昌亭之許。金風初動。白月流天。傾樽高士之墟。弭楫真娘之墓。清談並暢。六簿分呼。自以暮年寂景。望汝兄弟。一爲舒吐快慰也。浸尋波苕光浮。雲明如畫。壺齋催曙。清露零葭。我棹來歸。汝艇北發。念言猶昨。而今焉適至此哉。嗚呼痛哉。迨八月二十二日。金陵竣事。返抵家廬。我喜溢心飛。歡生眉舞。但見汝子坐間。嗽聲頻咳。我即問汝致疾之繇。汝言傷風偶爾。盈旬日矣。亡何。桂蕊香銷。泥金夢阻。萃筳曲罷。瓊笈名遺。汝于爾時。能無鬱鬱。嗽原病本。鬱又爲標。衡罕均良。未識六微之技。經盧涪釣。誰探五瘵之方。金液膏艱。銀丸劑鮮。嗚呼痛哉。泊乎秋氣悲其蕭瑟。草木落而變衰。郡有桐君。咸稱盧氏。我聞聲致慕。攜汝就診。又恐汝以寂寞櫻懷。兄侄弟儔。結伴同往。居亭專諸之市。羈旅婁離之壩。原醫所言。昉於暑毒。而消暑之藥。不參一二。名高鶴視。若矜虢國之神。



見愧龍心。弗奏梁丘之效。嗚呼痛哉。北顧無徵。南溟遂徙。問巫彭於鶴渚。訪神砭於鴛湖。（嘉善）惟汝兄。佷與汝偕焉。歲盡無歸。臘殘不返。觴椒泛酒。符燕圖金。花開異地之春。人是他鄉之客。雖片雲尺水。雁影非遙。而古木寒風。魚波終渺。悽然愁別之襟。愴矣分岐之涕。汝兄弟既盤桓武水。何又低徊甥舍。嗟日月之其除。歎父子之各域。幼兒在膝。短髮鬢鬢。寥落黃昏。何殊旅館。爾愁鬢明朝之句。黯然自傷耳。因念汝兄弟二人。佷也愁中守歲。汝也病裏迎年。游子無親。寒閨有婦。此時此景。可忍思耶。亦以汝朝蹙而暮卽返。暫暎而永相聚也。今焉至此。可奈何哉。嗚呼痛哉。我于十二之午。至彼看汝。見汝兄弟。悲喜交集。隔年夜雨。頓開阻闕之懷。到處元宵。獨守蕭條之况。南枝發豔。惆悵相看。東道張筵。流連暫賞。于時風淒雨橫。雪霰雲迷。所幸坐少。籍朋戶稀。人跡杜門。靜對蕭蕭藥爐。酒鎗閒。聊一娛情。而醫人切脈。亦云漸有起色。膏盲已去。八九。我與汝暨佷。喜可知也。未幾醫擬赤城子役。計程廿日有餘。欲留伯玉。曾遺僧達之書。空歎徐陵。莫覩楊情之報。乃如之人。何其忍歎。書求嘉湖僑兵顧安彥年丈願辭不允醫逢洪台行我云或暫歸家。當俟醫回再來。而汝卽流涕被面。語辭哽咽。必欲勿藥有喜。方旋故園。我不忍逆汝之意。仍安假館之謀。攻病而病彌深。就醫而醫反去。此正月二十三日也。嗚呼痛哉。我以此故。日夕眷戀。汝不思歸。何能舍汝。望吳山以踟躕。依越水而假薄。十舅君晦。每馳翰音。我云平復有

期第俟台刻人返。非爲誕語以謾君晦也。察汝于微茫之朕。審汝于聽觀之外。庸肉未充。纖廉較緩。爰拊心而自喜。翼速效以圖全。誤聽人言。蚤投補劑。人參進而火上升。涼散服而脾下泄。桃膠艾葉。影嗟弓角之難移。麥麵芎藭。濕恨河魚之不止。真元從耗。危殆尋侵。嗚呼痛哉。汝兄世佺。乃言元正初夜。噩夢多妖。庭氏射聲之法。不辨十輝。士衡繞車之微。但驚三幕。詎云恍惚。恐或鬼神之通。言念徬徨。庶轉法華之藏。禮敦蓮社。義闡菩提。虔禱神天。祈延汝命。香花讚供。十有晝夜。法鼓慧燈。盡入光明之海。華幢寶筏。弘開仁壽之天。四道莊嚴。六時祕密。兄弟矢願。上疏東嶽。各減後來之算。續汝今日之生。碎心隕首。精誠終隔于幽明。瀝膽煎腸。運數無回于冥漠。嗚呼痛哉。十九之日。厲風冷雨。兄佺不避陽侯之險。無辭行路之難。夙駕武林。求所爲生。冥判者。苦情哀額。丹衷孰致于高天。宿障叢身。黑業方纏于下地。西湖人去。未歸瀟瀟之孤舟。東岱魂遊。遽切傷心之逝水。撫諸弟而言別。思晤兄以無從。嗚呼痛哉。二十二日。爲汝啓建道場。二十三日。風帆輕迅。挈汝邁返。汝終冠躡履。舒徐上下。亦知汝病體深矣。強爲健容。然念精氣還堪。猶能罄折。豈其奄忽卽兆于茲。嗚呼痛哉。汝婦中甸生女。未彌厥月。而金光明會正初。啟梵音。故我雖與汝歸。暫止圓通。爾若闕楹相望。家聲入耳。擬于朔日圓證維摩。卽望衡門。還栖環堵。而二十四夜。月落參橫。奄然長逝。命之衰矣。可奈何哉。半載愁眉。淺見開顏片晷。兩年

離緒。終于飲恨九原。嗚乎痛哉。是夕也。貝篆初鐘。星槎遲曉。景朦朧于夢迴。焰幢幢于人寂。青衣夜起。亟聲呼我。我即驚坐推床。心椎千擗。揭帳視汝。餘息憫然。我以氣接氣。抱汝連呼。汝寂焉閃響。歎焉淪謝。亟欲救汝。而丹無仙七。四顧茫茫。將思代汝。而死不繇人。孤身惘惘。腸游焦釜。心寄危旌。哭盡懸燈。照死別生。離之影。叫殘口血。斷青春白髮之魂。啓手足其疑冰。拊口目而不瞑。嗚呼痛哉。諸弟交哭。僮僕咨涕。我形雖生。我心已死。抵暮。君晦同一友人江干來至。筍藏赤餅。草服頰鞭。而汝魚符夕下。蚌車曉馭。贈瓊噙食。斗黍停炊。卽煮聚窟之香。豈返蓬萊之吏。嗚呼痛哉。二十七日。孝將來唁。欷歔悲感。追述泐公昔日君家雁行。還有凋傷之語。言猶在耳。何遽忘心。天乎人歟。咎焉疇委。準提千印。漫存黃絹之容。(泐公命以前編畫準提像)圓相六觀。遽缺青城之鏡。(持準提咒各鑿一鏡)嗚呼痛哉。汝對諸弟云。僅再得數年聚樂。卽爲至幸。又云恨不及見太兄一面。(在時往統)又云我若獲起。功名富貴。長付滔滔。弟生一子足矣。又云如有起日。卽當祝髮以報佛恩。更何生子之云。嗒嘻天乎。願後追前。字字肝腸之血。念兄訣弟。言言骨肉之悲。嗚呼痛哉。汝之妖祖。二十僅二鷗飛。駛逐固云促矣。而父母拊汝鞠汝。以迨于今日。居月諸。又豈日暮心情。易言及此哉。憶昔汝母。初將誕汝。夢觀某日。光彩流暎。煌煌煜煜。從海上升。升而復墮者三焉。三墮而不復能升也。母寤語我。是徵佳兒。第恐不得長大耳。如何非升突

矣。襦纈結矣。闔宮彩葍七載矣。山龍銜燭。終折若木之華。天雞曉鳴。亟閉濛汜之谷。嗚呼痛哉。汝三四歲時。偶嬰疥疾。醫人以藥滲塗。汝曰。其似漆身而爲癩者歟。夫以四歲小兒。胸中有豫讓故事。豈非夙慧。漢陰移柳。無愧蘇頌。擲瑯刈稻。何慚百藥。而造化忌才。高明瞰鬼。未曾賦夢。尚僅比于徐份。早擬神清。妖遂存于何爛。嗚呼痛哉。汝生而玉皎。軒朗映人。唇若涅丹。瞳如點漆。外祖懋所公。素性嚴重。不狎兒女。獨見汝深加鍾愛。時君晦夫人有綬帶之喜。公曰。若女必以字甥。于是太傅閨庭。簾飄柳絮。中郎內則。慧解桐枝。爰締婚姻。無嫌中表。悲夫。玉鏡臺空。徒感涓陽之送。葉簫聲斷。浪傳宅相之成。夢託津亭。寶釵折淑。旖還建業。素俎悲嫺。嗚呼痛哉。汝年十一。卽事操觚。天品清貴。而韶秀神姿。俊潔以安詳。孜孜芸牕。勤渠蒿屋。樵蘇未繼。先穿匡鼎之光。山鏡微明。還掃孫康之雪。銅梁度雨。卷對碧雞。峴渚歸雲。賦題黃雀。青練牙蹠之函。綠粉緗輝之表。萃篋玄詮。就研奧理。桃花疊片。書盈范汪之床。蒲葉裁巾。漏永管寧之榻。峴嶺一賦。拊石樅金。泗洲片碣。引商刻羽。若使金閨鼎族。生子盡汝。足稱有後。不忝象賢。而況以我涼薄。豈堪爲父。宜其天奪英華。地銷靈氣。匣金刀以畫掩。斫玉樹而長埋。嗚呼痛哉。我年十五。青其子衿。汝之曳裙。亦于此歲。襄陽諫書。見奇庾翼。平南哀誄。不減謝莊。汝才固遜于古人。年庶同于往哲。如名杜父。曾來標令之稱。因夢惠連。或有池塘之賞。而柴華蠶芝。烘燻焚柱。在長

在已。孔授鄭玄之識。非館非寺。邪推房瑄之亡。几冷殘芸。瓶留剩藥。舊帳蛸螿于鼠跡。故箱塵鎖于鴟裙。嗚呼痛哉。卽昨秋闈中棄。擯。擯。擯。披華風雅遺規。琅琅如也。自謂可以樹衣冠之幟。振雲漢之游。而乃賦擯甘泉。音理柯竹。望荆山而有淚。泣流水以無人。揮彩筆于題愁。悲征帆于失意。遂遭沛道之虞。頓困茂陵之渴。嗚呼痛哉。昔在戊寅之秋。完汝室家之事。我心窮拮据。顏覲干求。忍恥徒慚。空似胡奴之米。望門無路。仍分季子之金。（不得已告借馮茂讓許我以米。道遠不便取。載仍千家光祿處。那移五十金川之。竊窕初歸。蘋蘩方託。標標梅實。篋傾白奈之簪。灼灼桃夭。片落紅香之雨。嗚呼痛哉。曹子桓阮婦之篇。潘安仁楊娥之賦。紡雖哀于少寡。泣異愴于孤孩。昔固有之。今胡及汝。生人至慘。何相類歟。燕爨今春之縷。菱鑑霜寒。熊虛舊日之裳。蘭床月墜。流黃錦字。化爲寡鵠之歌。彤管椒花。更作孤鴻之序。嗚呼痛哉。我自汝母亡後。煢煢獨夫。幸汝兄弟六人。晨昏左右。朝于悲而語恨。夜萬緒以言愁。家無南越之裝。一樽對雨。樹有北窗之蔭。三徑臨風。（淵明謫子書）共慰寂寥。並堪清賞。六龍在御。又摧荀氏之星。五馬稱良。止博扶風之目。嗚呼痛哉。汝真死耶。舍五十餘年之老父而死耶。舍友于和樂之兄弟而死耶。舍二載新婚之婦而死耶。舍鏤心刊血不朽之業而死耶。雖無封禪之文。殊有太玄之草。鮑明遠河清之頌已矣。張仲蔚蓬蒿之跡。聞然。嗚呼痛哉。汝于儻輩。無一苛言加謫。汝于交友。無一迕色生訶。仁恕

開明。恬夷潤朗。餘甘墮粒。深存惜福之思。飭行修名。屢切求全之惕。程年則方逾弱冠。考志則實茂成人。天道靡謨。命途多蹇。豈汝數之宜。歟。諒我愆之致。然我死則家門之禍已完。汝死乃殄瘁之殃方大。我不爲惡。先民之言不爽。家有餘慶。大易之訓豈虛。然何追昔撫今。非望者遙。遙自古。援人問天。蓋高者夢夢無憑爾也。嗚呼痛哉。汝病我典衣以市藥。汝死我賣田以買棺。貧賤真羞。欲告人而誰語。死生此訣。俟何地以重逢。我若獲汝母之存。卽苦猶堪消遣。（元微之時道遺又來緣爾世）汝若爲他人之子。縱死亦免窮愁。轉輾尋思。徘徊引淚。悲風夜冽。恐霧朝凝。嗚呼痛哉。暮雲千里。極目增傷。一水天涯。故鄉亦恨。（死于庵中）紙飛蝴蝶。半饌人散之灰。血漬鴛鴦。兩焰更殘之火。鬢絲成雪。誰人憐腸斷之人。眼眊看朱。何日是淚乾之日。嗚呼痛哉。暮春三月。江南草長。雜花生樹。羣鶯亂飛。見故國之旗鼓。感生平于疇昔。慨邱遲之寄歎。恍涕泗其沾裳。而况年年芳草。怨王孫之不歸。歲歲江離。望湘波而永別。半生父子。委深恩于落絮。飄蓬數載弟兄。對傷情于零香碎墨。由來期許。稱此收場。無限淒涼。遂爲結局。嗚呼痛哉。沈翼生云。汝未死時。夢汝同僮來辭姊去。昔年旅雁。猶依連理之枝。此夜啼鵲。不顧相思之樹。想汝既可同僮。卽當見母。汝母亡後。五年以來。我之控地悲慘。呼天憤泣。汝皆親見于生前。豈無追適于死後。裙牽愛子。石慰望夫。紫臺長杳。重看遶掌之珠。青鳥遙傳。爲寄離絃之淚。黃泉墜下。此日

如生。白首膝前何年還再。嗚呼痛哉。云何吁矣。心之愁矣。我生不長。毀其泣矣。降濡雨露。又今朝舊鬼。燕燕（清明日）彷彿。靡靡。是汝母生時。說日（母生三月十六）日渺渺以漸移。恨荒荒而曷已。緊受戒于台宗。聊薦些于餽餉。嗚呼痛哉。

### 五七祭文

維崇禎十三年二月二十九日。世俗五七期也。父復草數言告之曰。嗚呼痛哉。我修金光。明憊。冀延汝生。生不可延。而力固甚殫矣。罄懸之室。百金卽千鎰也。且又不腆許田。易鄭伯之璧而用之。用方告匱。人已告亡。嗚呼痛哉。今纘阿之御。又將觀奠矣。鵝緹謝饒。鸚喙辭箱。資福何從。金輪莫轉。日以哀喚。當迴音之響。淚零作天女之花。爾茲者。勉設伊蒲。強宣饘口。實本汝婦。沈氏憲英。嫁時簪珥。平昔衣裳。泣賣金錢。苦營齋具。一佰紙灰。盡未亡人柔腸寸寸。半杯淡茗。皆閨中婦血點。潛潛也。嗚呼痛哉。方今羣葩爛曠。百卉葳蕤。汝書室前海棠。尤盛。憶昨歲賞花之日。是今春歌薤之時。兄弟所以揮淚而淒酸。周生于焉。騰懷而太息。誰獨無情。能不悲哉。凡諸戚族。以及良朋。交致欵欵。咸深愴惻。風流相悼。詎止東亭。棟梁哀折。競如洗馬。慨人琴其俱喪。怨玉樹之長埋。嗚呼痛哉。我也何人。其能晨夕。朝榮萬慘。暮結千腸。望明月以拊心。對飛雲于寄想。而乃疏簾夜靜。空落燕泥。曉帳春寒。但聽鷓鴣。曾無影響之餘。慰我焦焚之苦。嗚呼

痛哉。自頃二十二日。四叔慈仲偕來。我與小飲牡丹花下。人歸客散。我醉頽然。臥汝棺上。歷號大慟。雖悲來而忽發。實憤極以成狂。惟憤故誠。惟誠能感。遂于是夜。始夢見汝。在一畫廊西畔。雕欄左側。藥砌猶新。花磚可數。汝臨風斜倚。俛首無言。凝汝如愁。徘徊似憶。一月分離。此焉恍惚而已。是何地耶。汝乃在彼。恨不挈汝與夢同回。嗚呼痛哉。靈通匪爽。冥格斯微。以我精誠。猶能感汝。而況法王廣大。徧攝恆沙。爲汝瑜伽。汝豈不至。故鄉花草。仍來昔日之人。舊處亭臺。還想平生之跡。我念汝必爲追感。又惜汝反致傷心。轉輾徬徨。再三哽咽。無繇握手。罄我哀悰。嗚呼痛哉。二十二年。一去消息茫茫。二十五日。於茲游魂渺渺。仗法來歸。還入夢否。父子深恩。祇惟夢矣。舍汝夢中。更無望矣。漏鼓聲沈。幽明可接。務使一床夜雨。今宵爲再見之期。半盞孤燈。此夕又重逢之會。嗚呼痛哉。

### 斷七祭文

三月壬午朔。越十三日甲午。倍七盡矣。音容杳遠。又四十九日矣。汝父爲文侑奠。適五叔在。不能詳言。略紡哀情而告之曰。嗚呼痛哉。朝雲不停。水流如夢。天上青鸞。人間紫鳳。文銷金甌。頌虛銀甕。鶴駕無歸。雁沙長凍。門外花飛。簾前春送。十七卽立夏。日月幾何。江山摧慟。嗚呼痛哉。緬言昔昨。我杭遺旋。往思漸汝。生死因緣。人之無良。吐言奇癡。幽冥莫稽。中心懷然。誰浪



笑傲，憾不殲焉。依依楊柳，渺渺風烟。西湖之水，千古潺湲。涕泣如雨，與共涓涓。嗚呼痛哉，適也光祿。春帆錦衣，故園蘆荻。喧闐羽旂，齊竿趙瑟。絃筦樂嬉，二八迭進。越女吳姬，余胡不天。灑淚淋漓，蕭蕭汝幕。哀哀綵鸞，姊妹號擗。弟昆咨淒，嗚梵鐘與法鼓。借歌舞而同時，是何一室之邇。一日之期，異悲歡于各別。感氣候之參差，叩天而天胡可問。視人而人若非奇，夫人固欣華而趨盛。豈顧我汝而淒其，惟斷腸焉已矣。復何馳乎多辭，嗚呼痛哉。

### 百日祭文

五月辛巳朔，越五日乙酉，亡俗百日期也。父又爲文奠之曰：嗚呼痛哉，自汝徂亡，一彈指耳。又已百日耶。今日五日，所稱弔三閻大夫之日也。綵舟競渡，樓華遺線。樓九子而沈菰，臂五色而繞釧。夕辟惡面焚香，朝裁執而成扇。昨汝婦之初來，著靈符以相薦。今汝安歸，聞焉不見。惆恍音容，霑襟如霰。嗚呼痛哉，汝棺東壁。我在西閣，相依生死。一室涼溫，白髮孤親之影。青年愛子之魂，對荒庭之綠草。共細雨于黃昏，何百日之歎爾。淚潛潛于弟昆，蘭湯誰沐。艾虎辟門，榴花虛發。蒲酒停樽，僧歸一聲。灰佰空存，嗚呼痛哉。計日雖百，我傷則一。春風永訣，宛其昨日。頃儻試於芄支，隨兩兄而並出。指三徑以言旋，睇趨迎於六七。往無汝以偕行，歸無汝以御膝。歎我爾之奚讎，獨杳焉其長匿。倘一醉而狂號，庶九迴以暫釋。不然，卽日夕其漣瀝，徒悲愁其

鬱抑。雖大乘之飯依。終遺哀而莫息。洵父子之至情。豈肝腸其鐵石。嗚呼痛哉。

祭亡弟威期文

葉世佺

嗚呼痛哉。余聞天地之道。福善而禍淫。故善積者昌。惡積者亡。若夫志士懷憂。壯夫嬰侮。或哀歎而霜隕。或顛泣而城崩。則人之誠于中者。天未嘗不爲之感動也。蘇今以觀。乃知妄耳。嗚呼威期。自我先世。孝弟起家。我祖令聞著燾。我父清修自守。泊如也。故我諸兄弟臨淵執玉。永思勿替。不可謂不積善。而曾無福善之報何歟。遭家不造。遘閔滋多。三光幽昧。鞠凶薦至。自昔千申始禍。以迄於今。我母無祿。藐我諸昆。惟父是怙。凡而蝦虹冰雹。與我父子兄弟相爲厄者。匪伊朝夕。履載之德。余無獲焉。我諸昆及季。是用震悼于心。皇天后土。庶幾其恤之。不可謂不誠。而曾無阻霜崩城之感。乃天未悔禍。又殲我同氣何也。惟爾威期。生多奇異。長蘊文采。天姿性成人倫。無闕。胡然一疾弗瘳。降年不永。人之云亡。遽稱夭折。嗚呼痛哉。憶余兄弟。少相善。長而敦行。情誼之篤。自謂罕比。疇貽伊感。乃遭斯慘。昔歲薦歿。已傷埋玉。今滋淪喪。復悼沈珠。空慕萎被之風。再傾恆山之淚。嗚呼痛哉。我父年始知命。自爾之亡。皓然霜鬢。翹首悲風。靡甘寧息。嗚呼威期。爾則死矣。我爲人子。將如之何。爾生既不能久世。圖報罔極。死又貽怨。惘於吳天。嗚呼威期。爾忍乎哉。初歸少婦。始孩藐女。角枕生悲。錦衾墜泣。燕啣縷而孤鳴。鸞分鏡而獨

舞。凡斯慘狀。鮮勿傷懷。嗚呼威期。爾又忍哉。諸弟皆幼。所與共事。最久惟爾。及聲期。聲期又早歿。數年以來。入則秋風夜雨。塵几斷簡。出則長亭逆旅。蕭然書劍。非爾而誰。今爾一日長辭。舍我去也。嗚呼威期。爾又忍哉。猶憶聲期臥病時。余與爾每夜篝燈坐于榻前。各閱時藝。或古文詞。凡以更餘爲度。是時冬夜寒甚。吾母賜以壺酒。將睡則熱而飲之。僮僕皆先寢。余與爾自爲之耳。此亦貧士寒齋光景。天倫一樂也。乃未幾。吾母棄。吾輩而爾。今又繼聲期。矻亡。回思此日。黃犬東門。可復得哉。嗚呼痛哉。余兄弟性不羈。善謔笑。每酒後則相與狂呼。或以笑樂。或以威憤。間多有之。爾又益自負。一日與余舟行遇大雪。泊舟荒村。索酒對飲。飲竟。爾卽狂叫大呼。桓子野一往有深情。今冥冥黃泉。寧復得此豪興。余又何忍復爲此態也。嗚呼痛哉。去秋余偕爾赴南都。爾覽秦淮明月。長千桃葉之勝。愴然遠思。何其壯也。既而賢書報罷。江潭搖落之恨。情不能堪。凄慘一室間。泣數行下。相與讀關牘。岸然不顧。雖世不我知。我氣自足。凌人耳。其矜豪往往如此。何物二豎。乃敢爲孽。膏肓入深。遂云不起。天乎天乎。夫復何言。且爾之疾。本非沈痼。援厥所繇。醫言傷暑。遷延冬杪。藥弗奏靈。適聞武水有精倉公術者。將往就焉。爾癘然病體。親於獨行。父以諸弟撫鞠萃於一身。不能出戶。命余偕爾同往。羈旅孤踪。他鄉客思。我二人形影相依。愁病之況。言之有不墮淚者耶。父雖身栖汾水。心懸武邑。迨乎獻歲來視爾。遂留弗歸。我

父子兄弟。以憂惶憔悴之軀。萍踪浪跡。爲聚首者已盈旬月。冀爾一旦豁然。相與返故園。喜可知也。奈何日復一日。奄奄如故。然余私心念爾姿性高明。才致磊落。人方大器。屬爾寧有他慮。故爾雖死。余惘惘然。茫然疑爾不死也。音容故在。非采留人。德量之俊偉。賦情之慷慨。宛然可挹。無異生存。旅寓中瀟風零雨。悶景愁懷。尙淒然于心目之間。爾必不死。既又思爾形不見矣。聲不聞矣。爾病中呻吟之狀。遶矣往矣。繞床號哭。而爾不知。僮僕奔趨。而爾不識。然則爾真死也。嗚呼痛哉。嗚呼痛哉。爾寓武邑時。人言武林有生人司冥錄命數之事。可以情相叩者。余因爾病。久請命於父。特往謁彼。倘或不幸。如可哀求。則續命非難。返魂有術矣。是時爾病已劇。謀發歸棹。我舟南往。爾艇北還。本擬弗藥有喜。言旋故鄉。今居然病軀。匍匐作歸計也。豈不傷哉。歸假舍於圓通庵中。爾自料病必不起。與諸弟訣別。情詞抗爽。于塵世諸緣。一無顧戀。惟恐不及。余歸。以不見。余爲恨。地分吳越。人隔幽明。游子未旋。九京永訣。悲夫痛哉。余聞之肝腸寸裂。尙復能爲生乎。且余往杭。或冀鬼力可憑。碎首上蒼。弗敢自惜。孰知其人乃託術欺世者。既往無益。徒使我不得視爾之舍。我之飲恨。當復何如。及余情迫兼道而歸。則爾已瞑目五日矣。嗚呼痛哉。然余轉輾思之中。夜籌之。願不以聚散無常哭爾。不以天壽難測悲爾。不以死生異路哀爾。獨爾年甫弱冠。行希往哲。陳仲舉澄清天下之思。爾素自負。余雖不敏。以一日之長。謬

相砥礪。曰四海蒼生。將爾自賴。矧夫昌大衰宗。其餘蔭乎。凡我同人。期共勗焉。嗚呼。有人如此。天應寶之。亦當宜死而生。宜天而壽。宜困厄而亨通矣。如何昊天賜毒。英年凋謝。有志無時。昔人所悲。嗚呼痛哉。造物忌才。信非虛謬。揆之古哲。往往同符。王弼州先生文章九命。早天歷可指也。彼何罪戾。乃亦如斯。爾卽多才。何能倖免。命之不长。天乎何尤。嗚呼痛哉。雁字霜殘。棠花風隕。天涯有淚。故國無家。句迷春草之夢。望斷秋江之影。賦盡楚些。不問逝水。流盈鵲血。空怨寒根。已矣。不復言矣。略敘生平。用伸夙昔。嗚呼痛哉。

### 祭三兄威期文

葉世侗

嗚呼何辜。譴天奚罪。負地。鶻雛殷流。大災薦臻。殘花再折。斷夢重摧。疏迷之士。莫不聞風。傷感。痛心入骨。而不能忍也。況同氣乎。嗚呼痛哉。神魂震惶。精爽飛越。羌難得而明也。腸裂之餘。欲叩天而相詰焉。舉世閔壙之輩。咸得白首。衰年。獨至于今。頻肆奇毒。將謂雁羽既多。分飛不少。則古八荀六卜。鸞龍之盛。竹帛所共載也。俱享嘉名。並列朝榮。何其盛哉。何雖寡德。自謂聞風懷古。可幸無罪。而慚苟於昔。愧卞于今。厄運之來。抑何酷也。嗚呼痛哉。追憶生平。宛然心目。夜臺一去。總帷空懸。伊昔同居。多歷年所。春階夏簾。秋帳冬缸。綴志篇章。覃思文義。同秉光之夕照。共彩筆之晨題。翫新花之暎牕。看落葉之辭樹。時吟謝草。或慕宗風。覽前物以生哀。觸

萬類而共側。悲夫。此卽南筠可罄。書恨無窮。予尙何言哉。爰自壬申之歲。遭家不造。迭遇閔凶。聖善靡依。鶴鶴永歎。當此之時。天地幽昧。士林憤痛。余兄弟上懷蓼莪。罔極之哀。下悲棠棣。兄他之義。瞻彼卬之無津。覽此離而啜泣。死喪之戚。共嘗之矣。胡然長逝。身爲階厲。貽恨無窮。兄其忍諸。嗚呼。痛哉。猶念昔時。姑洗紀節。同游後館。砌草承風。雜花生野。遙情共賞。逸興過飛。餘樂未盡。有懷二兄。獨辭華屋。零落山丘。相顧而吁。愴然傷懷。因謂朝露易稀。流泉永逝。如斯聚首。亦復何常。莫不泣泣。阻涕。悲懷慷慨。觀景物之週迴。感風煙之依昔。撫節思人。寧不悲乎。然亦謂倚伏迭用。否泰相濟。多難者興榮。殷憂者肇福。斯天道之好還。人事之常然也。庶或立身揚名。光載前緒。慰生報死。斯爲可矣。故當雄心憤薄。涕淚橫流。進取之志。實厲於躬。潛精填籍。靡敢阻越。況復吾兄。早擯英名。硯橫河漢。紙落煙波。范孟博之志。身任澄清。是雖茂陵消渴。寢淫半載。而量兄志概。必不與瓦礫同埋。浮雲共盡也。何期夢夢。彼蒼實遷斯戚。殲殪良人。以疑爲善。萎絕高明。以懼多才。豈天威業謨。福豐有禮之符表乎。雖長沙歎歎于湘水。終軍畢命于南越。淪才之痛。方斯蔑如也。嗚呼痛哉。自吾兄久羈武水。契闊彌旬。白雲間之青鳥空傳。至於是月。往望吾兄。而吾兄容顏憔悴。殊異平時。凄然涕附。顧余語曰。自殘冬言別。謂歸期伊邇。豈料淹留異地。幾歷寒暄。繁雲飛霰。淡月懸燈。流光暗馳。病體彌臻。迄今梅梢辭影。芳草將芊。猶

復見吾弟於此。旅館寒牕，半床爐藥，作膏盲愁話也。終遙遙以奚極，孰知返以何期。言與淚俱，嗚咽難勝。情之悲矣，何忍言哉！既而崦嵫日迫，梁木將摧，與兄偕歸，辭越水之淒清，望吳山以幽咽。恨秦和之不效，怨重還之假塞，中流而歎，語多悲切。又云：百年何恃，忽焉短運相促。一棺賤身，萬事都已。宜徵讀史之論，可勝歎哉！我今而後，倘尙可延齡，得復與諸兄弟相從，舊歡連情發藻，卽人生至樂耳。須富貴何益，語訖掩面泣涕。嗚呼！言哀辭苦，宜感上蒼。此時吞聲飲泣，綢繆懋諭，而五情崩疇，尙復何言。嗚呼痛哉！辭故國以安適，訣親朋以何依。半壁空涼，榻懸虛影，遺書縈網，舊硯生苔，使我兄弟相聚於斯，盡日傷心。終朝淚眼，雖追隨相與，猶有五人。蓬雨形影寥寂，言笑無聊。日色荒荒，風聲颯颯，名花爭笑，有似悲秋。春鳥啼晴，如含淚雨。嗚呼痛哉！故死則一耳，慘生萬狀。昊天罔極，不思圖報，而深貽喪明之戚。萬楚千悲，況復城崩杞哭，竹染班痕，撫錦衾而歎息，提孤孩以徬徨。遭生民之至艱，備荼毒之極哀者乎！九原有知，量亦伊鬱而輿感，愴快而難懷者也。上天蒼蒼，肆虐何殷，嗚呼痛哉！鵲搖搖而淚血，草萋萋而隕黃，狂風號而泣雨，繁陰晦而凝霜。腸一夕而九迴，心終朝而百慮，涕流浪汗，詎聞稷下之琴，恨滿長平，甯消曼倩之酒，十年螢雪，漫酬李氏之居，半世英華，遽掩滕公之室。泣修文於荒碣，悲遺韻於寒風。素幕輕飄，彷徨步之欲出，寒風乍捲，僅瘦影之如橫。感泉夜之悠悠，觀靈衣之渺渺，山陽

舊笛惆悵徒聞子夜清歌寂寥空喚生平已矣茹恨何言

祭亡兄威期文

葉世儻

嗚呼痛哉家門不造橫罹多愆生聚未遙離憂驟劇控首蒼蒼何其酷耶豈以我兄弟相聚一室自念曾無敢放越將寶獲滔天罪戾用是吳穹不憫膺斯大戮歟抑造物夢夢而無情維陽年少隕玉于長沙龍門逸才泣珠于江水從古其如斯歟抑豈我兄抗志絕俗非久留塵寰子晉吹笙終歸縲嶺延年靈散遂入崑崙兄果飄然而去歟非然者則何爲而逝歟再委荆枝頻驚雁羽泣梨花之舊屋傷白楊之故園已矣已矣至於此矣夫復何言夫復何言念我兄弟相聚非一日也始稱八人永期長好亡何二兄不幸八弟繼殤然弟也尚幼昧焉寡知及今思之中心憊憊既又我護闈早世我兄弟六人數年之間冽風夜泣凝露晨悲至于今日越六年矣弟也又稍長立矣尊樓之相處日以深矣其間或挑燈以論古或啓簡以尋文或共寒月或對春花繇今以思豈伊異世哉而聚散無恆死生難測遂至于此遺書在架已歎人亡笑語如聞還疑夢杳餘絃舊軫哀子敬之長遙修竹盈壙悼穉生之遞隔疑耶信耶以我兄而遽亡耶天消良淑物忌人英有如斯耶嗚呼痛哉以我兄高才宏志逸思殊尤摘文吐鳳麗管離龍兼以李膺勁松邠原白鶴學重琅玕才爭武庫恆有范滂澄清之思梁竦封侯之志設使天假



情況不堪。且夜不能寐。我數人爲兄搥帷聚語。西風入戶。夜雨淋懣。子野牢騷之賦。簡文歎息之詩。此時病愁作惡。每言之涕下。而自今思此。樂又何如也。嗚呼痛哉。念言及此。傷如之何。廿三日。我兄猶披幃起坐。自料不能久持。因歔歔流涕。顧謂弟曰。自殘寒相別。又踰六旬。異鄉除夕。旅病花朝。或冀燕子來時。差可強起。及今榴花又發。桃柳相新矣。不意我奄奄遂至于此。大兄又往武林。我意必不能待。得相見死。死亦無恨。天涯遠隔。人各一方。望征雲以遙憶。對飛雁而傷情。我魂魄當往彼武林門外。作杜宇啼。使西湖潺潺爲流淚聲也。因相顧泣下沾襟。嗚呼痛哉。卽旁人聞此言。亦當爲之揮涕。況手足之間乎。夫人何敢怨天。至此亦莫能已矣。越有一日。而遂永訣也。呼天以莫應。捨地以無追。驚心叫斷。一見無期。血淚徒滋。自身莫贖。半庭春色。無情之花。遍開。一夜西風。入夢之草不綠。逝水難迴。胡香遠遶於西域。離魂莫返。靈根恨乏於瓊田。採仙人之菖蒲。九節無種。訪漢帝之藥草。三莖空傳。桓山之翼一分。田氏之枝不再。夜猿哀。無復姜公之枕。朝朝搗血。羞稱卞氏之龍。嗚呼痛哉。我兄武水初去。謂返日非遙。歸期可卜。是以圖書不卷。筆墨盈几。至春來日久。弟恐案頭瑣瑣。僕盡狼籍。悉爲兄置之。廂中匣藏綠管。篋緘朱爵。以俟兄歸也。誰料卽永無觀此之日也哉。嗚呼痛哉。故書蛛網。架上絲縈。塵堆傅子之筆。泥落蔡侯之紙。今日庭前。海棠正繁。玉英爭秀。蕪菁滿地。芳草盈階。兄其觀之否耶。

以年當必世蒙其益而顧子淵早死終軍少天豈不惜哉憑君意氣徒留白草黃沙何代英雄從古焚書折劍學擬相如有恨淩雲未賦夢遊仙女可憐織錦無名天實忌才言之非謬令人雄心壯志嗒焉灰懷固當燒書於秦坑碎玉於荆山矣嗚呼痛哉思之思之心之悲傷何日忘之念言昔日之情何如哉悲莫悲於生離哀莫哀於死別我兄弟自有生以來卽計歲月之別亦未嘗一日分袂也長楊何日瀛洲未登則若上林遙信故鄉遠思我兄弟無之游子長征壯夫千里攀薰草以傷心恨生南浦折楊柳以言別淚灑西陵我兄弟又無之也壁無疊卷素乏五車之書家乘蕭然實鮮石倉之籍惟是先世所傳一二一凡共覽同案遞觀雖一刻半响無不聚首自謂人之兄弟莫有若斯之樂矣何慕乎富貴何羨乎榮華是以嘗曰我輩若使百年之後蓼花凋盡荆葉摧殘昔人何處故館徒寥雖獨壽比喬松亦何樂哉城郭猶是無異漢南之島人民已非奚取遼東之鶴斯言尙在而遽遭此慘能不悲哉嗚呼痛哉我兄自去年南歸得消渴之疾遷延冬盡扁公不遇盧氏無功至就療武水曰除夕必奏效歸家既而不效矣又曰上元上元又莫效而遡巡于不可定之期矣數別日而傷遙怨歸音于屢失所望和陽可奏念言旋歸而太簇再月之二十二日我兄自彼抵家亦謂僂然病體日望日深又復愁向故園逆數往日徒自感耳誰曰卽有此變哉嗚呼痛哉去年冬殘寒夜我兄以病中鬱久

其神魄猶當依此耶。月明透樹，疑魂影之猶來。風雨臨花，恍音容之如在。吁！盡子規之血，難招望帝之魂。相思空杳，何年並夜之床。別恨無涯，莫共一樽之酒。嗚呼痛哉！試思二兄未喪，八弟未殤。世謂高陽人稱荀氏，何其盛歟。而今一旦昊天敷慘，手足淪亡。傷悲未已，痛恨重逢。又何毒也。慟深華亭之悲，長阻峴山之淚。生胡爲以忽聚，死胡爲以忽離。恨悠悠以莫盡，痛渺渺以難窮。悵幽明之不通，歎黃泉之杳隔。冷帳空懸，紙帷人寂。願三生石上，世世相逢。一敘今日斷腸話也。嗚呼痛哉。

### 祭從弟威期文

葉世儉

嗚呼威期，爾竟棄我而長逝也耶。憶我生不辰，自幼失怙，尤鮮昆弟。故與爾之周旋最久，而於爾之氣誼最深。今雖不能覩子之形容矣，猶能彷彿子之生平。惟弟孝友，出自性生。事兄如父，待弟如子。偶有一得，無不示之。弟偶有一難，無不質之。兄以故快心失意之事，則必相賞而相憐。風雨晦明之間，則必相啓而相發。甚至寒暑飲食之際，則必相維而相護。戲言一及，則必正色以隨之。疑義相商，則必婉容以晰之。卽衰頹如不肖，無不以誠相與。以義相勸，則弟之於我，實嚴帥也。畏友也。而今安在哉。自弟歿後，今昔異時，死生異路。日暗雲迷，肝腸碎裂。言及舊歡，更添新憶。憶爾之言貌，何款曲而委婉。憶爾之志氣，何磊落而英多。憶爾之向學，何勤渠。

而孜孜億爾之用情何渾厚而淵深億爾之風神何冰清而玉潤億爾之才藻何虎繼而龍騰則宜策名天府昂首天衢琴瑟之靜好蘭玉之森盈何竟奄然而逝也嗚呼痛哉煢煢之結髮仰望爲誰奄奄之幼女撫抱爲誰言念及之則又不禁淚之汪汪而下也雖天地者萬物之逆旅光陰者百代之過客而爾年幾何遽罹此慘禍也憶弟病時吾過瓶山旅館語言如在也復至圓通精舍神情亦如在也會幾何時而恍如隔世矣卽欲如昔一握手歎吁豈可得哉豈可得哉所恃者弟之雁行有五後嗣必繁則弟雖無子而有子或可慰幽靈於地下乎是亦不得已之思也嗚呼痛哉

期年祭文

葉紹袁

崇禎辛巳正月二十四日父告於亡笁曰嗚呼痛哉去春汝在武水也椒觴流酒我不及見汝矣迨十二日往彼視汝是時雨雪瀟瀟載途盈尺日子繁陰積蔽中候醫買藥至二十二日汝云病來數月兩夕始爲安枕我聞汝語神飛心舞汝與兄侄並皆色喜泊于閏月初餘忽增重困遂爾淹淪捐兄背父嗚呼痛哉故汝死于閏月之二十四日圓通精舍非今日也今日是與汝瓶山相對望汝慰汝之日豈料隔年之後卽是誦貝焚錢哭汝奠汝之日也去年今日猶有一月之生今日今年已盡一葦之數景光胡速日月胡摧嗚呼痛哉醫于是日正來診脈

云已萬無慮。惟有拭目平安。置酒高會。言猶在耳。回首依然。雪冷寒飈。梅橫凍影。兩度元宵。淒涼宛似。而居亭夢遠。鐘磬聲新。撫景興懷。九迴摧裂。嗚呼痛哉。歲暮。文宗校士。爭茅競茹。獨汝一棺纏悼。凡塵硯網。玉峰城外。流水潺湲。插遍茱萸。聞其少汝。閔宮探茹。已去汝名。嗚呼痛哉。謝齋已歸五叔。汝兄暨弟。負笈東遷。恐汝幽靈未知。低徊繫想。倘若羈栖故處。魂魄誰親。依冷月之哀鴟。對秋風于旅雁。念言及此。能不悲歎。嗚呼痛哉。昨日梵輪初轉。夢汝歸來。僮僕奔趨。舉家環視。汝舊衣敝服。憔悴如愁。我心怛怛。默憂汝病。正自徬徨。盡焉驚悟。真耶否耶。何去何歸。嗚呼痛哉。二十二載。父子深情。去年先斷三百六旬。衣冠凶禮。今日已除。杳矣渺矣。寢以遠矣。生矣死矣。無復言矣。湯若士云。不知向後三生石。更有杭州一斷腸。片辭留恨。千古傷心。嗚呼痛哉。

午夢堂全集

四四

靈護附集終

# 瓊花鏡

吳江 天寥道人葉紹袁 撰

酉陽雜俎載李相國固言元和六年游蜀見一老姥謂曰郎君明年於芙蓉鏡下及第明年果然賦有人鏡芙蓉之目也劇談錄載唐昌院玉蕊花開時有女郎年可十七八衣繡衣峨鬢雙鬢容色婉約從以二女冠三侍妾皆端麗無比直遣花所異香芬馥取花而出隨有清風拂塵已在半天嚴休復元微之劉夢得白樂天皆有玉蕊仙人之詩余女瓊章捐世十載今年有方士能招來於鏡中見之隔帷之望不減李夫人相傳玉蕊卽瓊花也女旣字瓊章而鏡語以爲仙去余紀其事貽諸好異效芙蓉之稱名瓊花鏡云壬午嘉平天寥識

昔吳門泐公以神道設教探抽冥醜參驗人區云瓊章今在縵山仙府前身爲月府侍書名寒簧最初則軒轅時王屋山小有清虛之洞真人侍女名成漱許爲撰瑤期外紀（二字瑤期）而久之不果時乙亥夏也越今壬午方士朱生其說又異於此大約泐公神氣霞舉襟想高上選其在世外者言之不屑拾記塵寰往來故寥寥曠邈千載其爲瓊章別卻芙蓉之語此又優

孟漆園不必信也。朱生則藉靈於圖籙，撫實於表象，微卽芒芴無朕，顯則溟滓有形，彼亦莫得而擬議焉。舉其在世內遷流者言之，或亦一道不妨互參爾。朱生名懋，字熙哲，淮陰人。善李少君之術，能招魂如生人，繪以金粟影筆法，當其磅礴丹青時，人皆得以目寓也。其法裝白紙於壁，以鏡對紙，凝神屏氣，先視鏡中，恍惚若覩，卽現紙上矣。余爲瓊章未傳遺照，故特邀之家。二月初一日，具壇設三几，几各備肴核酒茗之屬。朱生以黃紙書奏章，告之玉皇上帝，真武北極及冥府諸神，嚙雞冠血，渣丹砂書符，午間先焚疏，疏焚已，卽閉戶。晡時又然，迨虞淵後，朱生披髮跣足，手印仗劍，然六炬於堂，布七燈於地，爐香頻燎，清水頻吸，置二大圓鏡於壇前，一朱生自視，一俾余與諸子視焉。是夕焚符幾至百數，闐其杳然。朱生傍徨失色，將及夜分，忽鏡中現朱書一行云：葉小鸞冥中無魂，棺內無尸，遍訪無其人，更日再覈以報，不得已遂罷。初三日復治壇如前，又至夜分，朱生悲甚，曰：我行此術七載矣，招無不來，來無不見，見無不驚異，至泣下者，奈何若爾，其無文成五利之疑耶？又復祕誦虔請，則又現書云：葉小鸞實曹大家後身，應生世三十六年，不當與凡侶爲偶，故因嫁而亡，今已尸解，棺內惟存朽衣三件而已。（歟時不止此今時所存或然耳）冥役實不能持檄往仙府追攝也，是夕亦罷，然余必欲致之，朱生亦恐術之不驗也。初五日復如前，又不至，俄有一女子，藍裙碧袖，冉冉而來，朱生甚喜，以爲是矣。余與諸子諦



觀雖亦娟然端好。實非瓊章也。相顧詫訝。此何爲者。朱生又焚符叩之。則又現朱書云。瓊仙在九嶷山洞。頃上帝傳命召赴瑤華宮。擬御閣清晏賦。故不得來。此侍女瑣香也。沈夫人遣來慰其尊公心耳。容以異日。又遂告罷。興亦索然。且天氣異寒。三夕皆至。雞鳴方止。僮輩伺守亦盡。德甚。約風日和。暖時再舉。而朱生云。當往洞庭山上真宮建醮焚章。宣通上帝。三清仙真。卿伯方可遣符元都耳。別去。朱生又因循數月。至九月初六日。始得治壇如初。符籙俱奏。仙府不入冥矣。未幾從鏡中彷彿露影。卽紙上儼然在焉。白雲曉藹。蒼霧粉郁。瓊章立半身於雲端。神彩流溢。素姿玉暎。回眸動盼。韻態如生平。昔不喜衣紅衣。此夕衣淺紅色。輕如蟬翼。微風吹舉。天衣五銖。此殆然耶。漢武帝賦曰。縹飄姚摩。逾莊也。隨二青衣侍女。亦爲冶麗。但寫瓊章方已。卽如游絲隨風飛散。不及運管矣。得寫存之。尤更奇也。朱生亦賦曰。我自爲此術。凡所召至。必皆顏色慘黯。如逝時景狀。此獨姍姍在雲霞縹渺間。且求一得三。亦生平未覩。非仙而何。幸諸君其觀爾。不然以若是之美。且醜。我凡拙手。管能貌之出耶。稍有不似。疑不容釋矣。次日方募勸成。挂家庭尉促朱生治妖。載往入城。妖亦竟不果治。而余懷中有沈夫人遣來一語。耿耿不能忘。沈夫人必指余亡內也。豈亦在九嶷歟。洎十二月二十七日。朱生復來。余曰。招魂徵異矣。可試探冥中消息。如前朱書報者乎。朱生曰。可也。余卽齋沐具章。一一詢諸亡者。天道人道。仙境

冥境。朱生如余指叩焉。是夜將二鼓。仍有朱書云。云先大夫太宜人與兩亡兒。茲不必詳。云沈宛君九歲散仙。在唐爲李嘉婦王氏。名靜婉。大著才名。嘉少精道術。睿宗時與婦同昇。昇仙後。靜婉思凡再謫。今數盡還歸本山。葉昭齊在唐爲崔求婦張氏。名寒英。求舉進士不第。隱居零陵。故亦在九嶷。葉瓊章前身曹大家。天帝嘉其才藻。重其貞淑。召爲廣寒執節侍史。偶以節墜。誤碎玉笙。謫凡。靜婉引之。還九嶷山。俗緣未斷。五代末生士人李家。名李珊。才女也。色亦絕美。年十六歲死。今生葉家。亦因靜婉而至也。張倩倩（余問所未及。忽疑中及之。亦奇）前身王氏。名翠翹。卽靜婉族女。爲郭令公家姬。故亦有緣會合焉。今瓊章在九嶷山第七曲洞中。與梁綠珠何羅御張倩倩吳天容及母姊七人常遊於第三曲張仙臺。與張石翁劉青陽陸子春白樂天韓道奴諸人談道。皆是一靈真性也。前所隨二侍女。一名因風。一名益羞。皆十四五女子。民間之秀美有仙緣者。卽往從焉。又云上帝以朱生輕探幽冥之秘。將加大譴。朱生懼而辭去。

## 跋語

壬申玄英之月。喪我二女。爲刻返生香愁言。宛君謂余曰。女雖亡。幸矣。天下奩香形管。獨我女哉。古今湮沒不傳。寂寥罕紀者。蓋亦何限。甚可歎也。卽如袁履貞生於我郡。世家宦女。道蘊無年。遺篇散佚。猶幸因緣。君於主人之館。拾之。頤覆。藏十年矣。而世不知也。吳興又有吳翀部女。云有集行世。而求之。與其人俱杳矣。埋紅顏於荒草。燼綠字於寒煙。可勝道哉。君當爲我博蒐海內未行者。暇時手裏輯之。庶幾未死。積之一二十年之後。總爲表章。亦一美譚快事。若其流布已久。聲采籍甚。名字蚤豔人間。我不欲與幽芳並類也。嗟乎。言猶在耳。朝華甫披。而人已亡矣。嗚呼傷哉。君每誦黃皆令當年若見之句。輒神往泣下。以其室邈。留俟異日。微索耳。又金陵吳文如寄詩一緘。病困之中。猶爲眉舞。豈意薤歌。迺先此哉。手澤餘香。感恩惻愴。爰付諸梓。以無忘夙志。所恨日月未幾。半消磨於窮愁病況。耳目不廣。空悵望於春樹暮雲。塵篋所存。寥寥此爾。天寥葉紹袁識。

午夢堂全集

